

# श्रुतरत्न रत्नाकर

( प्रथमो भागः )

- संपादकः -

आचार्यप्रवर श्री हेमचन्द्रचूड़ीणां  
शिष्यः प्रद्युम्नविजयो मुंजिः

- प्रकाशकः -

स्याद्वादामृत प्रकाशन मंदिर ट्रस्ट

मुंबई - ४०००२०

प्रथमं रत्नम् (१)

## श्रुत रत्न रत्नाकरः ॥

( प्राकृत ग्रन्थ संग्रहरूप प्रथमो विभागः )

— संपादकः —

सौम्यमूर्ति पूज्याचार्य महाराज श्री

विजयदेवसूरीश्वराणां पट्टधरः

व्याकरणाचार्य आचार्यप्रवर श्री

हेमचन्द्रसूरीश्वराणां

शिष्याणुः मुनि श्री प्रद्युम्न विजयः ।

— प्रकाशिका संस्था—

विविधव्यक्तिप्रदत्तद्रव्यसाहाय्येन

स्याद्वादादामृत प्रकाशन मंदिर ट्रस्ट

मुंबई-२०

वी. सं.

२५०२

वि. सं.

२०३३

## प्रकाशक

स्था. प्र. मं. ट्रस्ट

भूण्यदं हरिलाद शाह

शांतिलाद नागरदास शाह

उप, सर, वी. टी. मार्ग.

मुंअध-४०० ०२०

## प्राप्तिस्थान :

- १ श्री अमृतोदय पुण्य पौषधशाणा  
धनासुतारणी पोण,  
अमदावाद-३८०००१
- २ सरस्वती पुस्तक लंडार  
हाथीआना, रतनपोण,  
अमदावाद. ३८० ००१
- ३ श्री स्याद्वादादामृत प्रकाशन मंदिर ट्रस्ट  
वृद्धिनेमि अमृतविहाराणी आगुभां,  
मु. पालिताणा.  
( सौराष्ट्र ) ३६४२७०

## मुद्रक :

साधनाथ टाडपोआडी

कुन्ती कोटेज.

छ रस्ता,

शान्ताकुंअ-पूर्व

मुंअध-४०० ०५४

किं. ३, ७-५०

## विषयानुक्रम : ॥

	पृ०
१ उत्तरज्झयणस्स चउत्थं अज्झयणं	१
२ चउसरणपयन्नेा	३
३ आउरपच्चक्खाणपयन्नेा	९
४ सिरिवोरभदद्दुणिरइओ भत्तपरिन्नापयन्नेा	१७
५ सिरिचिरंतनायरियविरइयं सिरिपंचसुत्तं	३३
६ सिरिधम्मदासगणिविरइया उवएसमाला	४७
७ सिरिसंतिस्सरिविरइयं धम्मरयणपगरणं	९७
८ मलधासिरिरिहेमचंदस्सरिविरइया भवभावना	१११
९ सिरिवेरगसययं	१६०
१० सिरि अभयदेवस्सरिविरइओ महावीरत्थवो	१७०

## સ્વાધ્યાય

“શ્રુતરત્નરત્નાકર” નામે આ ગ્રન્થમાં નાના મોટા દશ ગ્રન્થોનો સંગ્રહ છે. વિશાળ શ્રુત સાગરમાંથી ગૈરાગ્યને પુષ્ટિ આપે—આત્માને સ્પર્શી જાય એવા આ ગ્રન્થો વીણી વીણીને અત્રે આપવામાં આવ્યા છે. આજે પણ અનેક ભવ્ય આત્માઓ આ ગ્રન્થોનો નિયમિત સ્વાધ્યાય કરતા હોય છે. મૂળમાત્ર પણ મંત્રાક્ષરમય આ ગ્રન્થોનું વાચન-પઠન-જીવને ચડેલું મોહવિષ દૂર કરવાનું અદ્ભુત સામર્થ્ય ધરાવે છે ને તે અનુભૂતિ અનેકને થયેલી છે.

આર્યાવર્તમાં એક વ્યાપક ઉક્તિ પ્રચલિત છે

“સ્વાધ્યાય પ્રવચનાભ્યાં ન પ્રમદયિતવ્યમ્”

સ્વાધ્યાય અને પ્રવચનમાં પ્રમાદ ન કરવો. અર્થાત્ સતત સ્વાધ્યાય અને પ્રવચનમાં રત રહેવું. આત્માનું જેમને થોડું પણ લાગેવળગે છે તેઓ ઉપરનું કથન ધરાધર સમજીને આચરતા હોય છે. જેઓને આત્મા સાથે લાગતું-વળગતું નથી તેઓ પણ ઉપરના કથનમાં થોડું પરાવર્તન અર્થથી અને શબ્દથી કરીને અનુસરતા હોય છે. સ્વાધ્યાયનો અર્થ—સ્વ એટલે પોતે-પોતાનું, જ્ઞાતિ અને ધન એમ ચાર છે તેમાં ધન આદિ પોતાનો બાહ્ય સ્વાર્થ સાધવામાં-અધિક કાય થાય તેમ કરવું એવો કરે છે ને તેમાં પ્રમાદ ન કરવો

એવો પ્રથમનો ભાવ તારવે છે. પ્રવચનમાં વ ઉપર અનુસ્વાર ચડાવીને સતત પ્રવચન કરવામાં તત્પર રહે છે. વિશ્વને આવી વિષમતામાંથી ઉગારવાનું બળ આ સંગ્રહમાં આપેલા ગ્રન્થોમાં છે. એક વખત પણ ગીતાર્થ ગુરુ ભગવંત પાસે આનું શ્રવણ કરીને અનુભવ કરવા જેવો છે.

ઉત્તમ ભાવોનું સેવન કરી જગતના જીવો મોહવિષથી મુક્ત બની આત્મ સ્વરૂપમાં લીન બનો. એ જ ભાવના—

૯-૧૦-૭૭

વિજયધર્મધુરન્ધરસૂરિ

શ્રીનિમિસૂરિજી જ્ઞાનશાળા

પાંજરાપોળ

અમદાવાદ

## શ્રુત-સંજ્ઞનીનો આસ્વાદ.

શ્રુતજ્ઞાનના વાચના-પૃચ્છનાદિ પ્રકારો માનવલોકનું અમૃત છે, શ્રમણુજ્ઞવનનો પ્રાણ છે એ વાતની ખાતરી તો જે તેમાં એકાગ્ર થઈ જાય તેને જ થાય. સ્વાનુભવ સંવેદ્ય આ વાત છે. ગોળની મીઠાશ વર્ણુનનો વિષય નથી પણ ચાખવાનો પદાર્થ છે તેમ સ્વાધ્યાયમાં જેના મન-મતિ પરોવાઈ જાય તેને ‘ગયંપિ કાલં ન યાળંતિ’નો અનુભવ થવાનો જ. અને એ જ સંજ્ઞનીના સહારે વર્ષોનાં વર્ષો લીલ્યા પસાર થઈ જાય. નવપદ્મની પૂજામાં પણ ગાયું :

“ જ્ઞાન ધ્યાન કિરિયા સાધંતા કાઢે પૂરવના કાળ ”

પૂરવના કાળ પણ ત્યાં ઓછા પડે એવો એનો રસ છે. સ્વાધ્યાય રુચિવાળા જીવો જ એ જાણે છે અને મન ભરીને માણે છે. એ સ્વાધ્યાયના અર્થીઓના હિતને કાળે આ પુસ્તકમાં દશ અન્યો આપવામાં આવ્યા છે. એકે એક અન્ય અનુપમ છે. એનો મહિમા અને પ્રભાવ લોકોત્તર છે. એ દરેક અન્યનો ટૂંક પરિચય આ પ્રમાણે છે :

૧. ઉત્તરાધ્યયન સૂત્રનું ચોથું અસંખ્ય-અધ્યયન મોઘથી છલોછલ ભરેલું છે. પ્રમાણુ નાનું છે, શબ્દો થોડા છે, અર્થ અપાર છે. શ્રી ઉત્તરાધ્યયન સૂત્રના જોગ જે વહે તે આ અધ્યયન પ્રાયશઃ તે જ દિવસે કંઠસ્થ કરતાં હોય છે ને તે જ

દિવસે અનુજ્ઞાનો લાભ લેતા હોય છે. કેટલાક ખપી અને સવેગરુચિ આત્માઓ તો ધર્મો મંગલની સત્તર ગાથાની સાથે સાથે આ ૧૩ ગાથાનો પાઠ પણ નિયમિત કરતાં હોય છે.

૨. સદાપ્રસન્ન રહેવાની ગુરુચાવી એટલે જ ચઉ-સરણુ પયન્નો. પદાવલી મંગલમય અને સહેજે કાનને, મનને ગમી જાય તેવી છે. ઘણા આરાધક જીવો આનો ત્રિકાળપાઠ કરે છે.

૩-૪. આઉર પચ્ચક્ષ્ણાણુ અને ભત્તપરિણુ પયન્નો ગણે તેને સમાધિમરણુ મળે જ. આરાધનાના પ્રકાર ભિન્ન ભિન્ન હોય છે. કોઈ જીવને કોઈ અનુકૂળ આવે, કોઈને ખીજું અનુકૂળ આવે. ‘રોગ ઘણાં ઔષધ ઘણાં કોઈને કોઈ ઉપગાર’ છે. યદ્યાં જ અસમાધિ રોગના ઉપાયો-ઔષધો છે.

૫. પંચસૂત્રનું નામ શ્રી સંઘમાં છેલ્લાં ૨૦-૨૫ વર્ષથી ખૂબ ખૂબ ગાજતું ગવાતું થયું છે. ઘણા ભાવિકો પ્રથમ સૂત્રનો નિરંતર અને ત્રિકાળ પાઠ કરે છે અને એ મંત્રમય દિવ્ય પદો દ્વારા અપાર્થિવ આનંદ અનુભવે છે. અહીં પાંચે સૂત્રો આપ્યા છે.

૬. ઉપદેશમાળા પુણ્યશ્લોક શ્રી ધર્મદાસગણિ મહારાજે રચી છે. આજથી અઠી હજાર વર્ષ પૂર્વે, પણ વાચક-પાઠકને જાણે આજે પણ આજની પરિસ્થિતિમાં તે એટલી જ

અસરકારક જણાય છે. જગદ્ગુરુ શ્રી હીરસૂરિજી મહારાજ વગેરે ઘણા મહાપુરુષના જીવનમાં વૈરાગ્ય રસનો સ્રોત આ ઉપદેશમાળાના પાઠથી જ પ્રગટ થયાનું જણાય છે. તે ગ્રંથ એક કાળે આજે જીવ વિચાર નવતત્ત્વ ગોખાય છે તેવી જ રીતે સર્વ આરાધકસાધારણમાં તેનું અધ્યયન-અધ્યાપન પ્રવર્તમાન હતું. આજે ફરીથી તે રીતે આ ગ્રંથનું પઠન-પાઠન ફેલાવવું જરૂરી છે. પેથડમંત્રી મંત્રીશ્વરના અતિ-વ્યવસાયી જીવનમાં પણ રોજ આ ગ્રંથની એક ગાથા કંઠસ્થ કરતા એવો તેમના ચરિત્રમાં ઉલ્લેખ છે.

૭. ઉપદેશના ગ્રંથોમાં ધર્મરત્ન પ્રકરણ એ સુંદર ગ્રંથ છે. શ્રાવકના ગુણોનો વિચાર કરતાં દ્રવ્ય શ્રાવક ભાવશ્રાવક વગેરેનાં લક્ષણો તેમાં આપ્યાં છે. પૂન્યપાદ ઉપાધ્યાયજી શ્રી યશોવિજયજી મહારાજે સાડા ત્રણસો આથાના સ્તવનમાં- ઠાળ ૧૧-૧૨-૧૩-૧૪ એ ચાર ઠાળમાં એ ધર્મરત્ન પ્રકરણના ઘણા ભાવો સુપેરે પદ્યમાં ગૂંથ્યા છે.

૮. મલધારી પૂન્ય આચાર્યશ્રી હેમચંદ્રસૂરિજી મ.નો ભવભાવના ગ્રંથ વાંચે અને ભવ્યજીવને ભવ-સંસાર પ્રત્યે નફરત ન જાગે અને શિવ-મોક્ષ પ્રત્યે તીવ્ર રાગ ન પ્રકટે તેવું બને નહીં, ગ્રંથની અક્ષર યોજના એવી તો વેધક છે કે વાચક એક વાર વાંચે ને તે શબ્દો કાનમાં ગૂંજે અને ભાવ હૃદય સોંસરવા ઊતરી બધ એવો સંવેગ રસથી છલકતો આ ગ્રંથ છે. મૂળ ગ્રંથરૂપે સૌ પ્રથમ અહીં જ તે પ્રકાશિત થયો છે.

૬. વૈરાગ્યશતકની સોગાથા એટલે વૈરાગ્યનો ખબનો. એક એક ગાથાના અર્થ ચિંતવતા ઘણા આત્માઓએ આ દુઃખથી ઉભરાતા સંસારનો ત્યાગ કરી મહાવીર ભગવાનનો માર્ગ સ્વીકાર્યો છે. હુગુકમી જીવને વૈરાગ્યનો રંગ લગાવવા એક ગાથા પણ પર્યાપ્ત છે. ઘણા જીવોને આ કંઠે હોય છે.

૧૦. નવાંગી ટીકાકાર શ્રી અભયદેવસૂરીશ્વરજી મહારાજ રચિત આ મહાવીર સ્તવન છે. આગમિક શૈલીમાં લખાયેલું છે. શ્રી કલ્પસૂત્રના છઠ્ઠા વ્યાખ્યાનમાં જે પ્રભુનું વર્ણન છે તે સોળ ઉપમાઓને રમ્ય પદોમાં વર્ણવી છે. સર્વ પ્રથમ અહીં જ પ્રસિદ્ધ થાય છે.

આ દશે ગ્રન્થો પ્રાકૃતમાં છે. નાનકડો પણ સુંદર સંગ્રહ છે.

આ સંગ્રહગ્રન્થનો સંગ્રહ માત્ર ન કરતાં ભવ્ય આત્માઓ તેનો સવિશેષ ઉપયોગ કરે એવી અંજલિપૂર્વક શ્રમણુગણને પ્રાર્થના. પુસ્તકને અન્તે થોડા કેરા કાગળ રાખ્યા છે, જેને તેમાં કોઈ ઉપયોગી શ્લોક-ગાથા લખવાં હોય તો તેના ઉપયોગમાં લઈ શકાશે.

આ ગ્રન્થમાં અશુદ્ધિ ન રહે તે માટે બનતી કાળજી રાખી છે. છતાં બધાં અશુદ્ધિ રહી ગઈ હો ત્યાં ત્યાં શુદ્ધિ કરીને વાચવા નમ્રવિનંતિ—

શરદ્પૂર્ણિમા વિ. સં. ૨૦૩૩

પાંજરાપોળ

અમદાવાદ-૧

મુનિપ્રદ્યુમ્ન વિજય

## પ્રકાશકીય

‘શ્રી શ્રુતરત્ન રત્નાકર’ નામનું પૂજ્ય સાધુસાધ્વીજી મહારાજને સ્વાધ્યાય માટે ઉપયોગી થાય એવું આ પ્રકાશન પ્રકાશિત કરતાં અમે ઘણા જ આનંદ અનુભવીએ છીએ.

સ્વાધ્યાય માટે ઉપયોગી હોય એવા પ્રકરણ ગ્રન્થો જુદાં જુદાં પુસ્તકોમાં હોય તે બધાને સાથે રાખવા કે તેમાંથી સ્વાધ્યાય કરવો તે મુશ્કેલીભર્યું કાર્ય ગણાય. તેથી આ પહેલાં પણ આવા પ્રયત્નો તે તે મહાનુભાવો દ્વારા થયા જ છે. આ પ્રયત્ન પણ તે પૈકીનો જ સ્વાધ્યાય માટે કંઈક વધુ અનુકૂળતા થાય તે મુજબનો છે. આ ગ્રન્થના પ્રથમ વિભાગમાં પ્રાકૃતભાષામાં રચાયેલા તે તે વિશિષ્ટ કેટિના પ્રકરણ ગ્રન્થોનો સમાવેશ કર્યો છે.

આની પ્રેરણા પૂજ્યપાદ સૌમ્યમૂર્તિ આચાર્ય ભગવંત શ્રી વિજયદેવસૂરીશ્વરજી મહારાજશ્રીના શિષ્યરત્ન પૂજ્ય આચાર્ય શ્રી વિજયદેભચન્દ્રસૂરિજી મહારાજ પાસેથી મળી છે તથા આનું સંપાદન કાર્ય તેઓશ્રીના શિષ્યરત્ન પૂજ્ય મુનિરાજ શ્રી પ્રદુમ્ન વિજયજી મહારાજે કરી આપવા કૃપા કરી છે.

આ પુસ્તકના પ્રકાશનમાં નીચેના મહાનુભાવો દ્વારા ઉદારતાપૂર્વક સહાયતા પ્રાપ્ત થઈ છે તે સૌનો અમે અંતઃ-

કરણપૂર્વક આભાર માનીએ છીએ અને તેઓની જ્ઞાન ભક્તિની અનુમોદના કરીએ છીએ.

૧૦૦૬, શા. વ્રજલાલ રતિલાલ દૂધવાળાના આગ્રહથી તેમને ત્યાં પૂજ્યપાદ આચાર્ય મહારાજ શ્રી વિજયમેરુપ્રભ સૂરી-શ્વરજી મહારાજ તથા પૂજ્યપાદ આચાર્ય મહારાજ શ્રી વિજય દેવસૂરીશ્વરજી મહારાજ આદિએ ચતુર્વિધ સંઘ સાથે પગલાં કર્યાં તે વખતે જ્ઞાનપૂજનના.

૧૪૧, શા. શાન્તિલાલ માણેકચંદ દૂધવાળાના આગ્રહથી તેમને ત્યાં પૂજ્યપાદ આચાર્ય મહારાજ શ્રી વિજય મેરુપ્રભ સૂરીશ્વરજી મહારાજ તથા પૂજ્યપાદ આચાર્ય મહારાજ શ્રી વિજય દેવસૂરીશ્વરજી મહારાજ આદિએ ચતુર્વિધ સંઘ સાથે પગલાં કર્યાં તે વખતે જ્ઞાનપૂજનના.

૧૦૦૭, શ્રી ઘાટકોપર શ્રવેતાંબર મૂર્તિપૂજક જૈન સંઘ.

૧૦૦૭, મલાડ-દેવચંદનગર જૈન સંઘ.

આ રીતે પૂર્વોક્ત મહાનુભાવોની આર્થિક સહાયતાથી પ્રયત્નપૂર્વક સંપાદન કરીને પ્રકાશિત કરેલ આ પ્રકરણ અન્વયે સ્વાધ્યાયના ખર્ચ પૂજ્ય પુરુષો છન્નસ્થત્વ સુલભ સ્ખલનાઓનું પરિમાર્ગમ કરવા પૂર્વક લાલ લઈ સૌના શ્રમને સાર્થક બનાવે એ જ હાદ્દિક ભાવના.



# ॐ ह्रीं श्रीं ह्रीं

श्री गोडीपार्श्वनाथाय नमः ।

श्रीनेमि अमृत-देव-गुरुचरणेभ्यो नमः ।



॥ १ उत्तरज्ज्ञयणस्स चउत्थं अज्ज्ञयणं ॥

असंखयं जीविय मा पमायए, जरोवणीयस्य हु नत्थि ताणं ।  
एवं वियाणाहि जणे पमत्ते, किण्णू विहिंसा अजया गहिंन्ति ॥१॥  
जे पावकम्मेहि धगं मणूसा, समाययन्ती अमइं गहाय ।  
पहाय ते पासपयट्टिए नरे, वेराणुबद्धा नरयं उवेन्ति ॥२॥  
तेणे जहा सन्धिमुहे गहीए, सकम्मुणा किच्चइ पावकारी ।  
एवं पया पेच्च इहं च लोए, कडाण कम्माण न मोक्खु अत्थि ॥३॥  
संसारमावन्न परस्स अट्टा, साहारणं जं च करेइ कम्मं ।  
कम्मस्स ते तस्स उ बेयकाले, न बंधवा बंधवयं ह्वेति ॥४॥  
बित्तेण ताणं न लभे पमत्ते, इमंमि लोए अदुवा परत्था ।  
दीवप्पणट्टे व अणंतमोहे, नेयाउयं दट्टु मदट्टुमेव ॥५॥

सुत्तेसु यावी पडिबुद्धजीवी, न वीससे पण्डिए आसुपन्ने ।  
 घोरा मुहुत्ता अबलं सरीरं, भारुण्डपक्खी व चरप्पमत्ते ॥६॥  
 चरे पयाइं परिसंकमाणो, जं किंचि पासं इह मण्णमाणो ।  
 लाभंतरे जीविय बूहइत्ता पच्छा परिन्नाय मलावधंसी ॥७॥  
 छन्दं निरोहेण उवेइ मोक्खं, आसे जहा सिक्खियवम्मधारी ।  
 पुव्वाइं वासाइं चरप्पमत्ते तम्हा मुणी खिप्पमुवेइ मोक्खं ॥८॥  
 स पुव्वमेवं न लभेज्ज पच्छा एसोवमा सासयवाइयाणं ।  
 विसीयई सिढिले आउयंमि, कालोवणीए सरीरस्स भेए ॥९॥  
 खिप्पं न सक्केइ विवेगमेउं, तम्हा समुट्टाय पहाय कामे ।  
 समिच्च लोयं समयया महेसी, आयाणुरक्खी चरमप्पमत्ते ॥१०॥  
 मुहुं मुहुं मोहगुणे जयन्तं, अणेगरूवा समणं चरन्तं ।  
 फासा फुसन्ती असमंजसं च, न तेसु भिक्खू मणसा पउस्से ॥११॥  
 मन्दा य फासा बहुलोहणिज्जा, तहप्पगारेसु मणं न कुज्जा ।  
 रक्खिज्ज कोहं विणएज्ज माणं; मायं न सेवेज्ज पहेज्ज लोहं ॥१२॥  
 जेऽसंखया तुच्छपरप्पवांई, ते पिज्जदोसाणुगया परज्जा ।  
 एए अहम्मत्ति दुगंलमाणो; कंखे गुणे जाव सरीरभेओ त्तिवेमि ॥१३॥

॥ उत्तरज्झयणस्य चउत्थं अज्झयणं सम्मत्तं ॥

## ॥ २ चउसरणपयन्नो ॥

(त्रण दिवस आयंविल करी आ सूत्र भणवुं ॥)

सावज्जजोगविरई, उक्कित्तण गुणवओ अ पडिवत्ती ।  
खलियस्स निंदणा वण-तिगिच्छ गुणधारणा चेव ॥१॥  
चारित्तस्स विसोही, कीरइ सामाइएण किल इहयं ।  
सावज्जेयरजोगाण, वज्जणासेवणत्तणओ ॥२॥  
दंसणयारविसोही, चउवीसायत्थएण किञ्चइ य ।  
अच्चप्पुअगुणक्कित्तण-रूवेणं जिणवरिंदाणं ॥३॥  
नाणइआ उ गुणा, तस्संपन्नपडिवत्तिकरणाओ ।  
वंदणएणं विहिणा, कीरइ सोही उ तेसिं तु ॥४॥  
खलिअस्स य तेसि पुणो, विहिणा जं निंदणाइ पडिकमणं ।  
तेण पडिकमणेणं, तेसिं पि य कीरअे सोही ॥५॥  
चरणाई याराणं, जहक्कमं वणतिगिच्छरूवेणं ।  
पडिकमणासुद्धाणं, सोही तह काउरसग्गेणं ॥६॥  
गुणधारणरूवेणं, पच्चक्खाणेण तवइआरस्स ।  
विरिआयारस्स पुणो, सव्वेहि वि कीरए सोही ॥७॥  
गय-वसह-सीह-अभिसेअ-दाम-ससि-दिणयरं झयं कुंभं ।  
पउमसर-सागर-विमाण-भवण-रयगुच्चय सिहिं च ॥८॥  
अमरिंदनरिंदमुणिंद-वंदियं वंदिउं महावीरं ।  
कुसलागुबंधिवंधुर-मज्झयणं कित्तइस्सामि ॥९॥

चउसरणगमण दुक्कड-गारिहा सुकडाणुमोयणा चेव ।  
 एस गणो अणवरयं, कायव्वो कुसलहेउत्ति ॥१०॥  
 अरिहंतसिद्धसाहू, केवलि कहिओ सुहावहो धम्मो ।  
 एए चउरो चउगइ-हरणा सरणं लहइ धन्नो ॥११॥  
 अह सो जिणभत्तिभरु; च्छरंत-रोमंचकंचुअकरालो ।  
 पहरिसपणउम्मीसं, सीसंमि कयंजली भणइ ॥१२॥  
 रागद्वोसारीणं, हंता कम्मट्टगाइअरिहंता ।  
 विसयकसायारीणं, अरिहंता हुंतु मे सरणं ॥१३॥  
 रायसिरिमवकसित्ता, तवचरणं दुच्चरं अणुचरित्ता ।  
 केवलसिरिमरहंता, अरिहंता हुंतु मे सरणं ॥१४॥  
 थुइवंदणमरहंता, अमरिंदनरिंदपूअमरहंता ।  
 सासयसुहमरहंता, अरिहंता हुंतु मे सरणं ॥१५॥  
 परमणगयं मुणंता, जोइंद-महिंद-ज्ञाणमरहंता ।  
 धम्मकहं अरहंता, अरिहंता हुंतु मे सरणं ॥१६॥  
 सव्वजिआणमहिंसं, अरहंता-सच्चवयणमरहंता ।  
 बंभवयमरहंता, अरिहंता हुंतु मे सरणं ॥१७॥  
 ओसरणमवसरित्ता, चउतीसं अइसए निसेवित्ता ।  
 धम्मकहं च कहंता, अरिहंता हुंतु मे सरणं ॥१८॥  
 एगाइ गिराणेगे, संदेहे देहिणं समं छित्ता ।  
 तिहुअणमणुसासंता, अरिहंता हुंतु मे सरणं ॥१९॥  
 वयणामएण भुवणं, निव्वावंता गुणेषु ठवंता ।  
 जिअलोअमुद्धरंता, अरिहंता हुंतु मे सरणं ॥२०॥

अच्चम्भुअगुणवंते, नियजससहरपसाहिअदिअंते ।  
 निययमणाइअणंते, पडिवन्नो सरणमरिहंते ॥२१॥  
 उज्झियजरमरणाणं, समत्तदुक्खत्तसत्तसरणाणं ।  
 तिहुअणजणसुहयाणं, अरिहंताणं नमो ताणं ॥२२॥  
 अरिहंतसरण मलसुद्धि-लद्धसुविसुद्धिसिद्धबहुमाणो ।  
 पणयसिररइयकरकमल-सेहरो सहारिसं भणइ ॥२३॥  
 कम्मट्ठवखयसिद्धा, साहाविअनाणदंसणसमिद्धा ।  
 सव्वट्ठलद्धिसिद्धा, ते सिद्धा हुंतु मे सरणं ॥२४॥  
 तिअलोअमत्थयत्था, परमपयत्था अचिंतसामत्था ।  
 मंगलसिद्धपयत्था, सिद्धा सरणं सुहपसत्था ॥२५॥  
 मूलक्खयपडिवक्खा, अमूढलक्खा सजोगिपच्चक्खा ।  
 साहाविअत्तसुक्खा, सिद्धा सरणं परमसुक्खा ॥२६॥  
 पडिपिह्निअपडिणीआ, समग्गज्ञाणग्गि-दड्ढभववीआ ।  
 जोईसरसरणीआ, सिद्धा सरणं समरणीआ ॥२७॥  
 पाविअपरमाणंदा, गुणनीसंदा विदिन्नभवकंदा ।  
 लहुईकयरविचंदा, सिद्धा सरणं खविअदंदा ॥२८॥  
 उवलद्धपरमवंभा, दुल्लहलंभा विमुक्कसरंभा ।  
 भुवणघरधरणखंभा, सिद्धा सरणं निरारंभा ॥२९॥  
 सिद्धसरणेण नयबंभेउ-साहुगुणजणिअअपुराओ ।  
 मेइणिमिलंत-सुपसत्थ-मत्थओ तत्थिमं भणइ ॥३०॥  
 जिअलोअबंधुणो कुगइ-सिंधुणो पारगा महाभागा ।  
 नाणाइअहिं सिबसुक्ख- साहगा साहुणो सरणं ॥३१॥

केवलिंगो परमोही, विउलमई सुअहरा जिणमंयंमि ।  
 आयरियउवज्जाया, ते सव्वे साहुणो सरणं ॥३२॥  
 चउदस-दसनवपुव्वी, दुवालसिक्कारसंगिणो जे अ ।  
 जिणकप्पाहालंदिअ- परिहारविसुद्धिसाहू अ ॥३३॥  
 खीरासवमहुआसव, संभिन्नसोकुट्टबुद्धी अ ।  
 चारणवेउट्ठिपयाणु-सारिणो साहुणो सरणं ॥३४॥  
 उज्झियवइरविरोहा, निच्चमदोहां पसंतमुहसोहा ।  
 अभिमयगुणसंदोहा, ह्यमोहा साहुणो सरणं ॥३५॥  
 खंडिअसिणेहदामा, अकामधामा निकामसुहकामा ।  
 सुपुरिस मणाभिरामा, आयारामा मुणी सरणं ॥३६॥  
 मिट्ठिअविसयकसाया, उज्झिअघर-घरगिसंगसुहसाया ।  
 अकलिअहरिसविसाया, साहू सरणं गयपमाया ॥३७॥  
 हिंसाइदोससुन्ना, कयकारुन्ना सयंभुरुप्पन्ना  
 अजरामरपहखुन्ना, साहू सरणं सुकयपुन्ना ॥३८॥  
 कामविडंबणचुक्का, कलिमलमुक्का विमुक्कचोरिक्का ।  
 पावरयसुरयरिक्का, साहुगुणरयणचिच्चिक्का ॥३९॥  
 साहूत्तसुट्ठिआ जं, आयरियाइ तओ अ ते साहू ।  
 साहुभणिअण गहिआ, तम्हा ते साहुणो सरणं ॥४०॥  
 पडिवन्नसाहुसरणो, सरणं काउं पुणोवि जिणधम्मं ।  
 पहरिस-रोमंच-पवंच-कंचुअंचिअतणू भणइ ॥४१॥  
 पवरसुकएहि पत्तं, पत्तेहि वि नवरि केहि वि न पत्तं ।  
 तं केवलपन्नत्तं, धम्मं सरणं पवन्नोहं ॥४२॥

पत्तेण अपत्तेण य, पत्ताणि य जेण नरसुरसुहाइं ।  
 मुक्खसुहं पुण पत्तेण, नवरि धम्मो स मे सरणं ॥४३॥  
 निदल्लिअकलुसकम्मो, कयसुहजम्मो खलीकयअहम्मो ।  
 पमुहपरिणामरम्मो, सरणं मे होउ जिणधम्मो ॥४४॥  
 कालत्तएवि न मयं, जम्मणजरमरणवाहिसयसमयं ।  
 अमयं व बहुमयं, जिणमयं च सरणं पवन्नोहं ॥४५॥  
 पसमिअकामपमोहं, दिट्ठादिट्ठेसु न कलियविरोहं ।  
 सिवसुहफलयममोहं, धम्मं सरणं पवन्नोहं ॥४६॥  
 नरयगइगमणरोहं, गुणसंदोहं पवाइनिक्खोहं ।  
 निहणियवम्महजोहं, धम्मं सरणं पवन्नोहं ॥४७॥  
 भासुर-सुवन्तसुंदर-रयणालंकारगारवमहगघं ।  
 निहिमिव दोगच्चहरं, धम्मं जिणदेसिअं वंदे ॥४८॥  
 चउसरणगमणसंचिअ-सुचरिअ-रोमंचअंचिअसरीरो ।  
 कयदुक्कडगरिहा-असुह; कम्मक्खयकंखिरो भणइ ॥४९॥  
 इहभविअमन्नभविअं, मिच्छत्तपवत्तणं जमहिगरणं ।  
 जिणपवयणपडिकुट्टं, दुट्टं गरिहामि तं पावं ॥५०॥  
 मिच्छत्ततमंधेणं, अरिहंताइसु अवन्नवयणं जं ।  
 अन्नापेण विरइअं, इन्हि गरिहामि तं पावं ॥५१॥  
 सुअधम्मसंघसाहुसु, पावं पडिणीअयाइ जं रइअं ।  
 अन्नेसु अ पावेसुं, इन्हि गरिहामि तं पावं ॥५२॥  
 अन्नेसु अ जीवेसुं, मित्ती-करुणाइगोअरेसु कयं ।  
 परिआवणाइ दुक्खं, इन्हि गरिहामि तं पावं ॥५३॥

जं मणवयकाएहिं, कय-कारिअ-अणुमईहिं आयरियं ।  
धम्मविरुद्धमसुद्धं, सव्वं गरिहामि तं पावं ॥५४॥  
अह सो दुक्कडगरिहा-दलिउक्कडदुक्कडो फुडं भणइ ।  
सुकडाणुरायसमुइन्न-पुन्नपुलयंकुरकरालो ॥५५॥  
अरिहंतं अरिहंतेसु, जं च सिद्धत्तणं च सिद्धेसु ।  
आयारं आयरिए, उवज्जायत्तं उवज्जाए ॥५६॥  
साहूण साहुचरिअं, देसविरइं च सावयजणाणं ।  
अणुमन्ने सव्वेसिं, सम्मत्तं सम्मदिट्ठीणं ॥५७॥  
अहवा सव्वं चिय वीअ-रायवयणाणुसारि जं सुकडं ।  
कालत्तए वि तिविहं, अणुमोएमो तयं सव्वं ॥५८॥  
सुहपरिणामो निच्चं, चउसरणगमाइ आयरं जीवो ।  
कुसलपयडीउ बंधइ, बद्धाउ सुहाणुबंधाउ ॥५९॥  
मंदणुभावा बद्धा, तिच्चणुभावा उ कुणइ ता चेव ।  
असुहाउ निरणुबंधाउ कुणइ तिच्चाउ मंदाउ ॥६०॥  
ता अयं कायव्वं, बुहेहि निच्चंपि संकिलेसम्मि ।  
होइ तिकालं सम्मं, असंकिलेसम्मि सुकयफलं ॥६१॥  
चउरंगो जिणधम्मो, न कओ चउरंगसरणमवि न कयं ।  
चउरंगभवच्छेओ, न कओ हा हारिओ जम्मो ॥६२॥  
इय जीवपमायमहारि-बीरभदंतमेयमच्छयणं ।  
झाअेसु तिसंझ-मवंझ-कारणं निव्वुइसुहाणं ॥६३॥

॥ इह चउसरणपयन्नो संमत्तो ॥



## ॥ ३ आउरपच्चक्खाण पयन्तो ॥

( त्रण आयंबिल कर्या पछी आ सूत्र भणवुं )

देसिक्केदेसदिरओ, सम्मदिट्ठी मरिज्ज जो जीवो ।  
तं होइ बालपंडिय-मरणं जिणसासणे भणियं ॥१॥  
पंच य अणुव्वयाइं, सत्त उ सिक्खाउ देसजइधम्मो ।  
सव्वेण व देसेण व, तेण जुओ होइ देसजई ॥२॥  
पाणवह-मुसावाए, अदत्त-परदारनियमणेहि च ।  
अपरिमिइच्छओ वि य, अणुव्वयाइं विरमणाइं ॥३॥  
जं च दिसवेरमणं, अणत्थदंडाओ जं च वेरमणं ।  
देसावगासियंपि य, गुणव्वयाइं भवे ताइं ॥४॥  
भोगागं परिसंखा, सामाइय अतिहिसंविभागो य ।  
पोसहविही उ सव्वो, चउरो सिक्खाउ वुत्ताओ ॥५॥  
आसुक्कारे मरणे, अच्छिन्नाए य जीवियासाए ।  
नाएहि वा अमुक्को, पच्छिमसंलेहणमकिच्चा ॥६॥  
आलोइय निस्सल्लो, सधरे चवारुहित्तु संथारं ।  
जइ मरइ देसविरओ, तं वुत्तं बालपंडियं ॥७॥  
जो भत्तपरिन्नाए, उवक्कमो वित्थरेण निदिट्ठो ।  
सो चेव बालपंडिय-मरणे नेओ जहाजुग्गं ॥८॥  
वेमाणिसु कप्पो-वगेणमु नियमेण तस्स उववाओ ।  
नियमा सिज्जइ उक्को-सएण सो सत्तमंमि भवे ॥९॥

इय बालपंडियं होइ, मरणमरिहंतसासणे दिट्ठं ।

इत्तो पंडिय ! पंडिय-मरणं वुच्छं समासेणं ॥१०॥

इच्छामि भंते ! उत्तमद्वं पडिक्कमामि । अईयं पडिक्कमामि ।  
 अणागयं पडिक्कमामि । पच्चुप्पन्नं पडिक्कमापि । कयं पडिक्कमामि ।  
 कारियं पडिक्कमामि । अणुमोइयं पडिक्कमामि । मिच्छत्तं पडिक्कमामि ।  
 असंजमं पडिक्कमामि । कसायं पडिक्कमामि । पावपओगं पडिक्कमामि ।  
 मिच्छादंसणपरिणामेसु वा । इहं लोगेसु वा । परलोगेसु वा । सच्चित्तेसु  
 वा । अचित्तेसु वा पंचसु इंदियत्थेसु वा अन्नाणं ज्ञाणे १ ।  
 आणायारंज्ञाणे २ । कुदंसणंज्ञाणे ३ । कोहंज्ञाणे ४ । माणंज्ञाणे ५ ।  
 मायंज्ञाणे ६ । लोहं ज्ञाणे ७ । रागंज्ञाणे ८ । दोसंज्ञाणे ९ । मोहं-  
 ज्ञाणे १० । इच्छंज्ञाणे ११ । मिच्छंज्ञाणे १२ । मुच्छंज्ञाणे १३ ।  
 संकंज्ञाणे १४ । कंखंज्ञाणे १५ । गेहिंज्ञाणे १६ । आसंज्ञाणे १७ ।  
 तण्हंज्ञाणे १८ । छुहंज्ञाणे १९ । पंथंज्ञाणे २० । पंथाणंज्ञाणे २१ ।  
 निदूदंज्ञाणे २२ । नियानंज्ञाणे २३ । नेहंज्ञाणे २४ । कामंज्ञाणे २५ ।  
 कलुसंज्ञाणे २६ । कलहंज्ञाणे २७ । जुज्झंज्ञाणे २८ । निजुज्झंज्ञाणे  
 २९ । संगंज्ञाणे ३० । संगहंज्ञाणे ३१ ववहारंज्ञाणे ३२ । कयवि-  
 कयंज्ञाणे ३३ । अणत्थदंडंज्ञाणे ३४ । आभोगंज्ञाणे ३५ । अणा-  
 भोगंज्ञाणे ३६ । आणाइलंज्ञाणे ३७ । वेरंज्ञाणे ३८ । वियक्कंज्ञाणे  
 ३९ । हिंसंज्ञाणे ४० । हासंज्ञाणे ४१ । पहासंज्ञाणे ४२ । पओसं-  
 ज्ञाणे ४३ । फरुसंज्ञाणे ४४ । भयंज्ञाणे ४५ । रूवंज्ञाणे ४६ ।  
 अप्पपसंसंज्ञाणे ४७ । परनिदंज्ञाणे ४८ । परगरिहंज्ञाणे ४९ ।  
 परिग्गहंज्ञाणे ५० । परपरिवायंज्ञाणे ५१ । परदूसणंज्ञाणे ५२ ।  
 आरंभंज्ञाणे ५३ । संरंभंज्ञाणे ५४ । पावाणुमोयणंज्ञाणे ५५ ।

अहिगरणंझाणे ५६ । असमाहिमरणंझाणे ५७ । कम्मोदयपच्चयंझाणे  
इद्धिगारवंझाणे ५९ । रसगारवंझाणे ६० । सायागारवंझाणे ६१ ।  
अवेरमंझाणे ६२ । अमुत्तिमरणंझाणे ६३ ।

पसुत्तस्स वा पडिबुद्धस्स वा जो मे कोइ देवसिओ राइओ  
उत्तमठ्ठे अइक्कमो वइक्कमो अइयारो अणायारो तस्स मिच्छामि  
दुक्कडं ।

एस करेमि पणामं, जिणवरवसहस्स वद्धमाणस्स ।  
सेसागं च जिणाणं, सगणहरागं च सव्वेसिं ॥११॥  
सव्वं पाणारंभं, पच्चक्खामित्ति अलियवयणं च ।  
सव्वमदिन्नादाणं, मेहुन्न परिग्गहं चेव ॥१२॥  
सम्मं मे सव्वभूएसु, वेरं मज्झं न केणइ ।  
आसाओ वोसिरित्ता णं, समाहिमणुपालए ॥१३॥  
सव्वं चाहारविहिं, सन्नाओ गारवे कसाए य ।  
सव्वं चेव ममत्तं, चएमि सव्वं खमावेमि ॥१४॥  
हुज्जा इमम्मि समए, उवक्कमो जीविअस्स सइ मज्झं ।  
एयं पच्चक्खाणं, विउल्ल आराइणा होउ ॥१५॥  
सव्वदुक्खपहीणाणं, सिद्धाणं अरहओ नमो ।  
सइहे जिणपन्नत्तं, पच्चक्खामि य पावगं ॥१६॥  
नमुत्थु धुअपावाणं, सिद्धाणं च महेसिणं ।  
संथारं पडिवज्जामि, जहा कवल्लिदेसियं ॥१७॥  
जं किंचि वि दुच्चरियं, तं सव्वं वोसिरामि तिविहेणं ।  
सामाइयं च तिविहं, करेमि सव्वं निरागारं ॥१८॥

बज्ज अट्ठिभतरं उवहिं, सरीराइ सभोयणं ।  
 मणसा वय-काएहिं, सव्वं भावेण वोसिरे ॥१९॥  
 सव्वं पाणारभं, पञ्चक्खाभित्ति अलियवयणं च ।  
 सव्वमदिन्नादाणं, मेहुन्न परिग्गहं चेव ॥२०॥  
 सम्मं मे सव्वभूएस्स, वेरं मज्झं न केणइ ।  
 आसाओ वोसिरित्ता णं, समाहिमणुपालए ॥२१॥  
 रागं बध पओसं च, हरिसं वीणभावयं ।  
 उस्सुगतं भयं सोगं, रइं अरइं च वोसिरे ॥२२॥  
 ममत्तं परिवज्जामि, निम्ममत्तं उवट्ठिओ ।  
 आलंबणं च मे आया, अवसेसं च वोसिरे ॥२३॥  
 आया हु मंहं नाणे, आया मे दंसणे चरित्ते य ।  
 आया पञ्चक्खाणे, आया मे संजमे जोगे ॥२४॥  
 एगो वच्चइ जीवो, एगो चेवुववज्जए ।  
 एगस्स चेव मरणं, एगो सिज्झइ नीरओ ॥२५॥  
 एगो मे सासरो अप्पा, नाणदंसणसंजुओ ।  
 सेसा मे बाहिरा भावा, सव्वे संजोगलक्खणा ॥२६॥  
 संजोगमूला जीवेण, पत्ता दुक्खपरंपरा ।  
 तम्हा संजोगसंबंधं, सव्वं तिविहेण वोसिरे ॥२७॥  
 मूलगुणे उत्तरगुणे, जे मे नाराहिया पमाणं ।  
 तमहं सव्वं निंदे, पडिक्कमे आगमिस्साणं ॥२८॥  
 सत्त भए अट्ठ मए, सन्ना चत्तारि गारवे तिन्नि ।  
 आसायण तित्तीसं, रागं दोसं च गरिहामि ॥२९॥

असंजममन्नाणं, मिच्छत्तं सव्वमेव य ममत्तं ।  
 जीवेसु अजीवेसु अ, तं निदे तं च गरिहामि ॥३०॥  
 निदामि निदण्णिज्जं, गरिहामि अ च जं मे गरहण्णिज्जं ।  
 आलोणमि अ सव्वं, अट्ठिभतर-बाहिरं उवहिं ॥३१॥  
 जह् बालो जंपंतो, कज्जमकज्जं च उज्जुअं भणइ ।  
 तं तह् आलोइज्जा, मायामयविप्पमुक्को य ॥३२॥  
 नाणम्मि दंसणम्मि य, तवे चरित्ते य चउसु वि अकंपो ।  
 धीरो आगमकुसलो, अपरिस्सावी रहस्साणं ॥३३॥  
 रागेण व दोसेण व, जं भे अकयन्नुआ पमाणं ।  
 जो मे किंचिवि भण्णिओ, तमहं तिविहेण खामेमि ॥३४॥  
 तिविहं भणंति मरणं बालाणं बालपंडियाणं च ।  
 तइयं पंडियमरणं, जं केवल्लिणो अणुमरंति ॥३५॥  
 जे पुण अट्टमईया, पंयल्लियसन्ना य वक्कभावा य ।  
 असमाहिणा मरंति, नहु ते आराहगा भणिया ॥३६॥  
 मरणे विराहिए देव-दुग्गई दुल्लहा न्य किर बोही ।  
 संसारो य अणंतो, हवइ पुणो आगमिस्साणं ॥३७॥  
 का देवदुग्गई ? का अबोहि ?, केणेव वुज्झइ मरणं ? ।  
 केण अणंतंपारं, संसारं हिंडई ? जीवो ॥३८॥  
 कंदप्पदेवकिट्ठिवस- अभिओगा आसुरी य संमोहा ।  
 ता देवदुग्गईओ, मरणंमि विराहिए हुंति ॥३९॥  
 मिच्छादंसणरत्ता, सनियाणा किण्हल्लेसमोगाढा ।  
 इह जे मरंति जीवा, तेसिं दुल्लहा भवे बोही ॥४०॥

सम्भद्दंसणरत्ता, अनियाणा सुक्कल्लेसमोगाढा ।  
इह जे मरंति जीवा, तेसिं सुलहा भवे बोही ॥४१॥

जे पुण गुरुपडिणीया, बहुमोहा ससबला कुसीला य ।  
असमाहिणा मरंति, ते हुंति अणंतसंसारी ॥४२॥

जिणवयणे अणुरत्ता, गुरुवयणं जे करंति भावेणं ।  
असबल-असंकलिद्धा, ते हुंति परित्तसंसारी ॥४३॥

बालमरणाणि बहुसो, बहुआणि अकामगाणि मरणाणि ।  
मरिहंति ते वराया, जे जिणवयणं न याणंति ॥४४॥

सत्थग्गहणं विसभ-क्खणं च जलणं च जलप्पवेसो अ ।  
अणायारभंडसेवी, जम्मणमरणाणुबंधीणि ॥४५॥

उड्ढमहे तिरियंमि वि, मयाणि जीवेण बालमरणाणि ।  
दंसणनाणसहगओ, पंडियमरणं अणुमरिस्सं ॥४६॥

उब्बेयणयं जाई-मरणं नरएसु वेअणाओ य ।  
एआणि संभरंतो, पंडियमरणं मरसु इन्हि ॥४७॥

जइ उप्पज्जइ दुक्खं, तो दट्ठव्वो सहावओ नवरं ।  
किं किं मए न पत्तं, संसारे संसारंतेणं ॥४८॥

संसारचक्कवाले, सव्वे वि य पुग्गला मए बहुसो ।  
आहारिआ य परिणा-मिआ य न य हं गओ तत्ति ॥४९॥

तणकट्ठेहि व अग्गी, लवणजलो वा नईसहस्सेहिं ।  
न इमो जीवो सक्को, तिप्पेउं कामभोगेहिं ॥५०॥

आहारनिमित्तेणं, मच्छा गच्छंति सत्तमिं पुढविं ।  
सच्चित्तो आहारो, न खमो मणसा वि पत्थेउं ॥५१॥

पुर्वि कयपरिकम्मो, अनियाणो ऊहिऊण मइबुद्धि ।  
 पच्छा मलिअकसाओ, सज्जो मरणं पडिच्छामि ॥५२॥  
 अक्कंढेऽचिरभाविय, ते पुरिसा मरणदेसकालंमि ।  
 पुव्वकयकम्मपरिभा-वणाइ पच्छा परिवडंति ॥५३॥  
 तम्हा चंदगविज्झं, सकारणं उज्जुएण पुरिसेण ।  
 जीवो अविरहियगुणो, कायव्वो मुक्खमग्गम्मि ॥५४॥  
 बाहिरजोगविरहिओ, अट्ठिभतरझाणजोगमल्लीणो ।  
 जह तंमि देसकाले, अमूढसन्नो चयइ देहं ॥५५॥  
 हंतूण राग-दोसं, छित्तूण य अट्ठकम्मसंघायं ।  
 जम्मणमरणरहट्ठं, छित्तूण भवा विमुच्चिहिसी ॥५६॥  
 एवं सव्ववुएसं, जिणदिट्ठं सहहामि तिविहेणं ।  
 तस-थावरखेमकरं, पारं निव्वाणमग्गस्स ॥५७॥  
 नहि तम्मि देस काले, सक्को बारसविहो सुअक्खंधो ।  
 सव्वो अणुचितेउं, धुणियंमि समत्थचित्तेणं ॥५८॥  
 एगंमि वि जंमि पए, संवेगं वीअरायमग्गंमि ।  
 गच्छइ नरो अभिक्खं, तं मरणं तेणं मरियव्वं ॥५९॥  
 ता एगंमि सिलोगं, जो पुरिसो मरणदेसकालंमि ।  
 आराहणोवउत्तो, चिंततो राहगो होइ ॥६०॥  
 भाराहणोवउत्तो, कालं काऊण सुविहिओ सम्मं ।  
 उक्कोसं तिन्नि भवे, गंतूणं लहइ निव्वाणं ॥६१॥  
 समणुत्ति अहं पढमं, वीयं सव्वत्थ संजओमिच्चि ।  
 सव्वं च वोसिरामि, एयं भणियं समासेणं ॥६२॥

लद्धं अलद्धपुव्वं, जिणवयणसुभासियं अमयभूअं ।  
 गहिओ सुग्गइमग्गो, नाहं मरणस्स बीहेमि ॥६३॥  
 धीरेण वि मरियव्वं, काउरिसेण वि अवस्स मरियव्वं ।  
 दुन्हंपि हु मरिअव्वे, वरं खु धीरत्तणे मरिउं ॥६४॥  
 सीलेण वि मरिअव्वं निस्सीलेण वि अवस्स मरियव्वं ।  
 दुन्हंपि हु मरिअव्वे, वरं खु सीलत्तणे मरिउं ॥६५॥  
 नाणस्स दंसणस्स य, सम्मत्तस्स य चरित्तजुत्तस्स ।  
 जो काही उवओगं, संसारा सो विमुच्चिहिसि ॥६६॥  
 चिरउसिय वंभयारी, पण्णोडेऊण सेसयं कम्मं ।  
 अणुपुव्वीइ विसुद्धो, गच्छइ सिद्धि धुयक्खिलेसो ॥६७॥  
 निक्कसायस दंतरस्स, सूरस्स ववसाइणो ।  
 संसारपरिभीअस्स, पच्चक्खाणं सुहं भवे ॥६८॥  
 एयं पच्चक्खाणं, जो काही मरणदेसकालंमि ।  
 धीरो अमूढसन्नो, सो गच्छइ उत्तमं ठाणं ॥६९॥  
 धीरो-जर मरणविऊ, वीरो विन्नाणनाणसंपन्नो ।  
 लोगसुज्जोअगरो, दिसउ खयं सव्वदुक्खाणं ॥७०॥

॥ इइ आउरपच्चक्खाणपयन्नो संमत्तो ॥



## ॥ ३ अथ भक्तपरिन्नापयणो ॥



नमिऊण महाइसयं महाणुभावं मुणिं महावीरं ।  
भणिमो भक्तपरिणं निअसरणट्टा परट्टाय ॥१॥

भवगहणभमणरीणा लहंति निव्वुइसुहं जमल्लीणा ।  
तं कप्पदुमकाणणसुहयं जिणसासणं जयइ ॥२॥

मणुअत्तं जिणवयणं च दुल्लहं पाविऊण सप्पुरिसा ! ।  
सासयसुहिक्करसिएहिं नाणवसिएहिं होअव्वं ॥३॥

जं अज्ज सुहं भविणो संभरणीअं तयं भवे कल्लं ।  
मगंति निरुवसगं अपवग्गसुहं बुहा तेणं ॥४॥

नरविबुहेसरसुक्खं दुक्खं परमत्थओ तयं बिंति ।  
परिणामदारुणमसासयं च जं ता अलं तेण ॥५॥

जं सासयसुहसाहणमाणाआराहणं जिणिंदाणं ।  
ता तीए जइअव्वं जिणवयणविसुद्धबुद्धीहिं ॥६॥

तं नाणदंसणाणं चारित्ततवाण जिणपणीआणं ।  
जं आराहणमिणमो आणाआराहणं बिंति ॥७॥

पव्वज्जाए अब्भुज्जओवि आराहओ अहासुत्तं ।  
अब्भुज्जअमरणेणं अविगल्लमाराहणं लहइ ॥८॥

तं अब्भुज्जुअमरणं अमरणधम्मैहिं वन्निअं तिविहं ।  
भक्तपरिन्ना इंगिणि पाओवगमं च धीरेहिं ॥९॥

भक्तपरिन्नामरणं दुविहं सविआरमो य अविआरं ।  
 सपरकमस्स मुणिणो संलिहिअतगुस्स सविआरं ॥१०॥  
 अपरकमस्स काले अप्पहुप्पंतंमि जं तमविआरं ।  
 तमहं भक्तपरिन्नं जहापरिन्नं भणिस्सामि ॥११॥  
 धिइबलविअलाणमकालमच्चुकलिआणमकयकरणाणं ।  
 निरवज्जमज्जकालिअजईण जुगं निरुवस्सगं ॥१२॥  
 परमसुहसप्पिवासो असोअहासो सजीविअनिरासो ।  
 विसयसुहविगयरागो धम्मज्जमजायसंवेगो ॥१३॥  
 निच्छिअमरणावत्थो वाहिग्घत्थो जई गिहत्थो वा ।  
 भविओ भक्तपरिन्नाइ नायसंसारनिग्गुन्नो ॥१४॥  
 पच्छायावपरद्धो पियधम्मो दोसदूसणसयण्हो ।  
 अरहइ पासत्थाईवि दोसदोसिल्लकलिओवि ॥१५॥  
 वाहिजरमरणमयरो निरंतरुप्पत्तिनीरनिकुरंसो ।  
 परिणामदारुणदुहो अहो ! दुरंतो भवसमुदो ॥१६॥  
 इअ कलिउण सहरिसं गुरुपामूलेऽभिगम्म विणएणं ।  
 भालयलमिलिअकरकमलसेहरो वंदिउं भणइ ॥१७॥  
 आरुहिअमहं सुपुरिस ! भक्तपरिन्नापसत्थबोहित्थं ।  
 निज्जामएण गुरुणा इच्छामि भवन्नवं तरिउं ॥१८॥  
 कारुन्नामयनीसंदसुंदरो सोऽवि से गुरू भणइ ।  
 आलोअणावयस्वामणपुरस्सरं तं पवज्जेसु ॥१९॥  
 इच्छामुत्ति भणित्ता भत्तीवहुमाणसुद्धसंकप्पो ।  
 गुरूणो विगयावाए पाए अभिवंदिउं विहिणा ॥२०॥

सलं उद्धरिअमणो संवेगुव्वेअतिव्वसद्धाओ ।  
 जं कुणइ सुद्धिहेउं सो तेणाराहओ होइ ॥२१॥  
 अह सो आलोअणदोसवज्जिअ उज्जुअं जहाऽऽयरिअं ।  
 बालुव्व बालकाल्लउ देह आलोअणं सम्मं ॥२२॥  
 ठविए पायच्छित्ते गणिणत्तं गणिसंपयास्समग्गेणं ।  
 सम्ममणुमन्निअ तवं अपावभावो पुणो भणइ ॥२३॥  
 दारुणदुहजलयर-निअरभीमभवजलहितारणसमत्थे ।  
 निप्पञ्चवायपोए महव्वए अम्ह उक्खिवसु ॥२४॥  
 जइऽवि स खंडिअचंडो अखंडमहव्वओ जई जइवि ।  
 पव्वज्जवउट्टावणमुट्टावणमरिहइ तथावि ॥२५॥  
 पहुणो सुकयाणत्तिं भव्वा पञ्चप्पिणंति जह विहिणा ।  
 जावज्जीवपइण्णाणत्तिं गुरुणो तथा सोऽवि ॥२६॥  
 जो साइआरचरणो आउट्टिअदंडखंडिअवओ वा ।  
 तह तस्स विसम्ममुवट्ठिअस्य उट्टावणा भणिआ ॥२७॥  
 तत्तो तस्स महव्वयपव्वयभारोन्नमंतसीसस्स ।  
 सीसस्स समारोवइ सुगुरूवि महव्वए विहिणा ॥२८॥  
 अह हुज्ज देसविरओ सम्मत्तरओ रओ अ जिणधम्मो ।  
 तस्सवि अणुव्वयाइं आरोविज्जंति सुद्धाइं ॥२९॥  
 अनियाणोदारमणो हरिसवसविसट्टकंचुयकरालो ।  
 पूएइ गुरुं संघं साहम्मिअमाइ भत्तीए ॥३०॥  
 निअदव्वमपुव्वजिणिंदभवणजिणविंबवरपइट्टासु ।  
 विअरइ पसत्थपुत्थयसुत्तित्थतित्थयरपूआसु ॥३१॥

जइ सोऽवि सब्वविरईकयाणुराओ विसुद्धमइकाओ ।  
 छिन्नसयणाणुराओ विसयविसाओ विरत्तो अ ॥३२॥  
 संथारयपवज्जं पव्वज्जइ सोऽवि निअम निरवज्जं ।  
 सध्वविरइप्पहाणं सामाइअचरित्तमारुहइ ॥३३॥  
 अह सो सामाइअधरो पडिवन्न महव्वओ अ जो साहू ।  
 देसविरओ अ चरिमं पच्चक्खामित्ति निच्छइओ ॥३४॥  
 गुरुगुणगुरुणो गुरुणो पयंपकयं नमिअमत्थओ भणइ ।  
 भयवं ! भत्तपरिन्नं तुम्हाणुमयं पवज्जामि ॥३५॥  
 आराहणाइ खेमं तस्सेव य अत्पणो अ गणिवसहो ।  
 दिव्वेण निमित्तेणं पडिलेहइ इहरहा दोसा ॥३६॥  
 तत्तो भवचरिमं सो पच्चक्खाइत्ति तिविहमाहारं ।  
 उक्कोसिआणि दव्वाणि तस्स सव्वाणि दंसिज्जा ॥३७॥  
 पासित्तु ताइं कोई तीरं पत्तरिसमेहिं किं मज्झ ? ।  
 देसं च कोई भुच्चा संवेगओ विचित्तेइ ॥३८॥  
 किं चत्तं नोवभुत्तं मे परिणामासुई सुई ।  
 दिट्ठसारो सुहं ज्ञाइ चोअणेसाऽवसीअओ ॥३९॥  
 उअरमलसोहणट्ठा समाहिपाणं मणुन्नमेसोऽवि ।  
 महुरं पज्जेअव्वो मंदं च विरेयणं खमओ ॥४०॥  
 एल्लयनागकेसरतमालपत्तं ससक्करं दुद्धं ।  
 पाऊण कढिअसीअलसमाहिपाणं तओ पच्छा ॥४१॥  
 महुरविरेअणमेसो कायव्वो फोफलाइदव्वेहिं ।  
 निव्वाविओ अ अग्गी समाहिमेसो सुहं लहइ ॥४२॥

जावज्जीवं तिविहं आहारं वोसिरइ इहं खवगो ।  
 निजवगो आयरिओ संघरस निवेअणं कुणइ ॥४३॥  
 अराहणपञ्चइअं खमगस्स य निरुवसगपञ्चइअं ।  
 तो उस्सगो संघेण होइ सव्वेण कायव्वो ॥४४॥  
 पञ्चक्खाविति तओ तं ते खमयं चउव्विहाहारं ।  
 संघसमुदायमज्जे चिइवंदणपुव्वयं विहिणा ॥४५॥  
 अहवा समा हहेउं सागारं चयइ तिविहमाहारं ।  
 तो पाणयंपि पच्छा वोसिरिअव्वं जहाकालं ॥४६॥  
 तो सो नमंतसिरसंघडंतकरकमलसेहरो विहिणा ।  
 खामेइ सव्वसंघं संवेगं संजगेमाणो ॥४७॥  
 आयरिअ उवज्जाए सीसे साहम्मिए कुल्लाणे य ।  
 जे मे केइ कसाया सव्वे तिविहेण खामेमि ॥४८॥  
 सव्वे अवराहपए खामेह (मि) अहं खमेउ मे भयवं ! ।  
 अहमवि खमामि सुंद्रो गुणसंघायरस संघरस ॥४९॥  
 इअ वंदणखमणगरिहणाहिं भवसयसमज्जिअं कम्मं ।  
 उवगेइ खगेण खयं मिआवई रायपत्तिव्व ॥५०॥  
 अह तस्स महव्वयसुट्ठिअस्स जिणवयणभाविअमइस्स ।  
 पञ्चक्खायाहारस्स तिव्वसंवेगसुहयस्स ॥५१॥  
 आराहणलाभाओ कयत्थमप्पाणयं मुणंतस्स ।  
 कलुसकलतरणलट्ठिअ अणुसट्ठिअ देइ गणिवसहो ॥५२॥  
 कुग्गाहपरूढमूलं मूला उच्छिद वच्छ ! मिच्छत्तं ।  
 भावेसु परमतत्तं सम्मत्तं सुत्तनीईए ॥५३॥

भक्तिं च कुणसु तिष्ठं गुणाणुराण वीअरायाणं ।  
 तह पंचनमुक्कारे पवयणसारे रइं कुणसु ॥५४॥  
 सुविहिअहिअनिज्जाए सज्जाए उज्जुओ सया होसु ।  
 निच्चं पंचमहव्वयरक्खं कुण आयपच्चक्खं ॥५५॥  
 उज्जसु निआणसल्लं मोहमहल्लं सुकम्मनिसल्लं ।  
 दमसु अ मुण्णिदसंदोहनिदिए इंदिअमयंदे ॥५६॥  
 निव्वाणसुहावाए विइन्ननिरयाइदारुणावाए ।  
 हणसु कसायपिसाए विसयतिसाए सइसहाए ॥५७॥  
 काले अपहुप्पंते सामन्ने सावसेसिए इण्हि ।  
 मोहमहारिउदारणअसिलट्ठिं सुणसु अणुसट्ठिं ॥५८॥  
 संसारमूलवीअं मिच्छत्तं सव्वहा विवज्जेहि ।  
 सम्मत्ते दढचित्तो होसु नमुक्कारकुसलो अ ॥५९॥  
 मगतिण्हिआहि तोअं मन्नंति नरा जहा सतण्हाए ।  
 सुक्खाइं कुहम्माओ तहेव मिच्छत्तमूढमणो ॥६०॥  
 नवि तं करेइ अग्गी नेअ विसं नेअ किण्हसप्पो अ ।  
 जं कुणइ महादोसं तिष्ठं जीवस्स मिच्छत्तं ॥६१॥  
 पावइ इहेव वसणं तुरुमिणिदत्तुव्व दारुणं पुरिसो ।  
 मिच्छत्तमोहिअमणो साहुपओसाउ पावाओ ॥६२॥  
 मा कासि तं पमायं सम्मत्ते सव्वदुक्खनासणए ।  
 जं सम्मत्तपइट्ठाइं नाणतवविरिअचरणाइं ॥६३॥  
 भावाणुरायपेमाणुरायसुगुणाणुरायरत्तो अ ।  
 धम्माणुरायरत्तो अ होसु जिणसासणे निच्चं ॥६४॥

दंसणभट्ठो न हु भट्ठो होइ चरणपव्भट्ठो ।  
 दंसणमणुपत्तस्स हु परिअडणं नत्थि संसारे ॥६५॥  
 दंसणभट्ठो भट्ठो दंसणभट्ठस्स नत्थि निव्वाणं ।  
 सिज्झंति चरणरहिआ दंसणरहिआ न सिज्झंति ॥६६॥  
 सुद्धे सम्मत्ते अविरओऽवि अज्जेइ तित्थयरनामं ।  
 जह आगमेसिभदा हरिकुलपहुसेणिआईया ॥६७॥  
 कझणपरंपरयं लहंति जीवा विसुद्धसम्मत्ता ।  
 सम्महंसणरयणं नऽग्घइ ससुरासुरे लोए ॥६८॥  
 तेलुक्कस्स पहुत्तं लद्धूणवि परिवडंति कालेणं ।  
 सम्मत्तं पुण लद्धुं अक्खयसुक्खं लहइ मुक्खं ॥६९॥  
 अरिहंतसिद्धचेइयपवयणआयरिअसव्वसाहूसुं ।  
 तिव्वं करेसु भत्तिं तिगरणसुद्धेण भावेणं ॥७०॥  
 एगावि सा समत्था जिणभत्ती दुग्गइं निवारेउं ।  
 दुल्लाहइं ल्लावेउं आसिद्धि परंपरसुहाइं ॥७१॥  
 विज्जावि भत्तिमंततरस सिद्धिमुबयाइ होइ फलया य ।  
 किं पुण निव्वुइविज्जा सिज्झिहिइ अभत्तिमंतस्स ? ॥७२॥  
 तोसिं आराहणनायगाण न करिज्ज जो नरो भत्तिं ।  
 धणिअंपि उज्जमतो सालिं सो ऊसरे ववइ ॥७३॥  
 बीएण विणा सस्सं इच्छइ सो वासमब्भएण विणा ।  
 आराहणमिच्छंतो आराहयभत्तिमकरंतो ॥७४॥  
 उत्तमकुलसंपत्तिं मुहनिप्फत्तिं च कुणइ जिणभत्ती ।  
 मणियारसिट्ठजीवस्स ददुदुरस्सेव रायगिहे ॥७५॥

आराहणापुरस्सरमणन्नहियओ विसुद्धलेसाओ ।  
 संसारकखयकरणं तं मा मुंची नमुक्कारं ॥७६॥  
 अरिहंतनमुक्कारोऽवि हविज्ज जो मरणकाले ।  
 सो जिणवरोहिं दिट्ठो संसारुच्छेअणसमत्थो ॥७७॥  
 मिठो किलिट्ठकम्मो नमो जिणांगतिसुकयपणिहाणो ।  
 कमलदलखो जकखो जाओ चोरुत्ति सूलिहओ ॥७८॥  
 भावनमुक्कारविवज्जिआइं जीवेण अकयकरणाइं ।  
 गहियाणि अ मुक्काणि अ अंगंतसो दव्वलिंगाइं ॥७९॥  
 आराहणापडागागहणे हत्थो भवे नमोक्कारो ।  
 तह सुगइमग्गमणे रहुव्व जीवस्स अप्पडिहओ ॥८०॥  
 अन्नाणीऽवि अ गोवो आराहित्ता मओ नमुक्कारं ।  
 चंपाए सिट्ठिसुओ सुंदसणो विस्सुओ जाओ ॥८१॥  
 विज्जा जहा पिसायं सुट्ठुवउत्ता करेइ पुरिसवसं ।  
 नाणं हिअयपिसायं सुट्ठुवउत्तं तह करेइ ॥८२॥  
 उवसमइ किण्हसप्पो जह मंतेण विहिणा पउत्तेणं ।  
 तह हिययकिण्हसप्पो सुट्ठुवउत्तेण नाणेणं ॥८३॥  
 जह मक्कडओ खणमवि मज्झत्थो अच्चिउं न सक्केइ ।  
 तह खणमवि मज्झत्थो विसएहिं विणा न होइ मणो ॥८४॥  
 तम्हा स उट्ठिउमणो मणमक्कडओ जिणोवएसेणं ।  
 काउं सुत्तनिबद्धो रामेअव्वो सुहज्जाणे ॥८५॥  
 सुई जहा ससुत्ता न नस्सई कयवरंमि पडिआवि ।  
 जीवोऽवि तह ससुत्तो न नस्सइ गओवि संसारे ॥८६॥

खंडसिलोगेर्मेहि जघो जइ ता मरणाउ रक्खिओ राया ।  
 पत्तो अ सुसामन्नं किं पुण ज्जिणउत्तसुत्तेणं ? ॥८७॥  
 अहवा चिलाइपुत्तो पत्तो नाणं तहाऽमरत्तं च ।  
 उवसम-विवेग-संवर-पयसुमरणमित्तसुअनाणो ॥८८॥  
 परिहर छ्जीववहं सम्मं मण-त्रयण-कायजोगेहिं ।  
 जीवविसेसं नाउं जाव्जीवं पयत्तेणं ॥८९॥  
 जह ते न पिअं दुक्खं जाणिअ एमेव सव्वजीवाणं ।  
 सव्वायरमुवठत्तो अत्तोव्रम्मेण कुणसु दयं ॥९०॥  
 तुणं न मंदराओ आगासाओ विसालयं नत्थि ।  
 जह तह जयंमि जाणसु धम्ममहिंसासमं नत्थि ॥९१॥  
 सव्वेवि य संबंधा पत्ता जीवेण सव्वजीवेहिं ।  
 तो मारंतो जीवे मारइ संबंधिनो सव्वे ॥९२॥  
 जीववहो अप्पवहो जीवदया अघ्पओ दया होइ ।  
 ता सव्वजीवहिंसा परिचता अत्तक्कमेहिं ॥९३॥  
 जावइआइं दुक्खाइं हुंति चउगइगयंस्स जीयस्स ।  
 सव्वाइं ताइं हिंसाफ़लाइं निउणं विअण्णाहि ॥९४॥  
 जंकिंचि सुहसुआरं पट्टत्तणं पयइसुंदरं जं च ।  
 आरुगं सोहगं तं तमहिंसाफलं सव्वं ॥९५॥  
 पाणोऽवि पाडिहेरं पत्तो छूढोऽवि सुंसुमारदहे ।  
 एगेगवि एगदिणऽज्जिणऽहिंसावयगुणेणं ॥९६॥  
 परिहर असच्चवयणं सव्वंपि चउव्विहं पयत्तेणं ।  
 संजमवंतावि जओ भासादोसेण स्खिप्पंति ॥९७॥

हासेण व कोहेण व लोहेण भएण वावि तमसच्चं ।  
 मा भणसु भणसु सच्चं जीवहिअत्थं पसत्थमिणं ॥९८॥  
 विस्ससणिज्जो माया व होइ पुज्जो गुरुव्व लोअस्स ।  
 सयणुव्व सच्चवाई पुरिसो सव्वस्स होइ पिओ ॥९९॥  
 होउ व जडी सिंहडी मुंडी वा वक्कली व नग्गो वा ।  
 लोए असच्चवाई भन्नइ पासंडचंडालो ॥१००॥  
 अलिअं सइंपि भणिअं विहणइ बहुआइं सच्चवयणाइं ।  
 पडिओ नरयंमि वसू इक्केण असच्चवयणेणं ॥१०१॥  
 मा कुणसु धीर ! बुद्धि अप्पं व बहुं व परधणं धित्तुं ।  
 दंतंतर-सोहणयं किंलिचमित्तंपि अविदिन्नं ॥१०२॥  
 जो पुण अत्थं अवहरइ तस्स सो जीविअंपि अवहरइ ।  
 जं सो अत्थकएणं उज्झइ जीअं न उण अत्थं ॥१०३॥  
 तो जीवदयापरमं धम्मं गहिऊण गिण्ह माऽदिन्नं ।  
 जिण-गणहर-पडिसिद्धं लोगविरुद्धं अहम्मं च ॥१०४॥  
 चोरो परलोगंमिऽवि नारयतिरिएसु ल्हइ दुक्खाइं ।  
 मणुअत्तणेवि दीणो दारिदोवहुओ होइ ॥१०५॥  
 चोरिक्कनिवित्तीए सावयपुत्तो जहा सुहं ल्हई ।  
 किट्ठि मोरपिच्छचित्तिअ गुट्ठीचोराण चल्लणेसु ॥१०६॥  
 रक्खाहि बंभचरं बंभगुत्तीहिं नवहिं परिसुद्धं ।  
 निच्चं जिणाहि कामं दोसपकामं विआणित्ता ॥१०७॥  
 जावइआ किर दोसा इहपरलोए दुहावहा हुंति ।  
 आवहइ ते उ सव्वे मेहुणसन्ना मणूसस्स ॥१०८॥

रइ-अरइ-तरलजीहाजुएण संकप्पउच्चभडफणेणं ।  
 विसयविलवासिणा मयमुहेण विच्चोअरोसेणं ॥१०९॥  
 कामभुअंगेण दट्ठा लज्जा-निम्मोअदप्पदादेणं ।  
 नासंति नरा अवसा दुस्सहदुक्खावहविसेणं ॥११०॥  
 ललक्कनिरयविअणाओ घोरसंसार-सायरुव्वहणं ।  
 संगच्छइ न य पिच्छइ तुच्छत्तं कामिअसुहस्स ॥१११॥  
 वम्मह-सर-सयविद्धो गिद्धो वणिउव्व रायपत्तीए ।  
 पाउक्खालयगेहे दुग्गंधेऽणेगसो वसिओ ॥११२॥  
 कामासत्तो न मुणइ गम्मागम्मंपि वेसिआणुव्व ।  
 सिट्ठी कुवेरदत्तो निअयसुआ-सुरय-रइरत्तो ॥११३॥  
 पडिपिल्लिअ-कामकल्लि-कामग्घत्थासु-मुअसु-अणुबन्धं ।  
 महिलासु दोसविस-वल्लरीसु पयइं नियच्छंतो ॥११४॥  
 महिला कुलं सुवंसं पियं सुअं मायरं च पिअरं च ।  
 विसयंधा अगणंती दुक्खसमुहम्मि पाडेइ ॥११५॥  
 नीअं हिं सुपओहराहिं उप्पिच्छंमंथरगईहिं ।  
 महिलाहिं निन्नयाहि व गिरिवरगुरुआवि भिज्जंति ॥११६॥  
 सुट्ठुवि जिआसु सुट्ठुवि पिआसु सुट्ठुवि परूढ-पेमासु ।  
 महिलासु भुअंगीसु व वीसंभं नाम को कुणइ ? ॥११७॥  
 वीसंभनिच्चरंपि हु उवयारपरं परूढ-पणयंपि ।  
 कयविपेअं पिअं झत्ति न्ति न्हिणं हयासाओ ॥११८॥  
 रमणीअदंसणाओ सोमाल्लंणीओ गुणनिबद्धाओ ।  
 नवमालइमालाउ व हरंति हिअयं महिलिआओ ॥११९॥

किं तु महिलाण तासिं दंसणसुंदेरजणि-अमोहाणं ।  
 आलिगणमइरा देइ वज्जमालाण व विणासं ॥१२०॥  
 रमणीण दंसणं चेव सुंदरं होउ संगमसुहेणं ।  
 गंधुच्चिय मुरहो मालईइ मल्लणं पुणं विणासो ॥१२१॥  
 साकेअपुराहिवइ देवरई रज्जसुक्खपच्चभट्टे ।  
 पंगुल्लहेतुं छूढो बुद्धो अ नईइ देवीए ॥१२२॥  
 सोअसरी दुरिअ-दरीकवड-कुडी महिलिआ किलेसकरी ।  
 वइर-विरोअण-अरणी दुक्खसत्तणी सुक्खपडिवक्खा ॥१२३॥  
 अमुणिअ-मणपरिकम्मो सम्भंको नाम नासिउं तरइ ।  
 वम्मह-सरपसरोहे दिट्ठिच्छोहे मयच्छीणं ? ॥१२४॥  
 घणमालाओ व दूरुन्न-मंतसुमओहरसउ वड्ढंति ।  
 मोहविसं महिलाओ अल्लंकाविसं व पुरिसरस ॥१२५॥  
 परिहरसु तओ तासिं दिट्ठिं दिट्ठीविसरस व अहिसस ।  
 जं रमणि-नयणवाणां चरित्तपाणे विणासंति ॥१२६॥  
 महिला-संसग्गीए अग्गी इव जं च अप्पस्तररस ।  
 मयणं व मणो मुणिणोऽवि हंत सिग्घं चिअ विलाइ ॥१२७॥  
 जइवि परिचत्तसंनो तधत्तणुअंणो तहावि परिवडइ ।  
 महिला-संसग्गीए कोसाभवणूसिअव्व सिसी ॥१२८॥  
 सिंगारतरंगाए विलासवैलांइ जुव्वणजलांए ।  
 पहसिअ-फेणांइ मुणी न्तरिनईए न बुडुंति ॥१२९॥  
 विसयजलं मोहकलं विलास-विक्खोअ-जलयराइन्नं ।  
 मयमयरं उत्तिन्ना तारुन्नमहन्नं व धीरा ॥१३०॥

अन्विभत्तरवाहिरए सञ्चे संगे (गंथे) तुमं विवज्जेहि ।  
 कय-कारिअणुमईहिं काय-मणोवाय-जोगेहिं ॥१३१॥  
 संगनिमित्तं मारइ भणइ अलीअं करेइ चोरिक्कं ।  
 सेवइ मेहुण मुच्छं अप्परिमाणं कुणइ जीवो ॥१३२॥  
 संगो महाभयं जं विहेडिओ सावणण संतेणं ।  
 पुत्तेण हिए अत्थंमि मुणिवई कुंचिण जहा ॥१३३॥  
 सव्वगंथ-विमुक्को सीईभूओ पसंतचित्तो अ ।  
 जं पावइ मुत्तिमुहं न चक्कवटीवि तं लहइ ॥१३४॥  
 निरसल्लस्सेह महव्वयाइं अक्खंड-निव्वणगुणाइं ।  
 उवहम्मंति अ ताइं नियाणसल्लेण मुणिणोऽवि ॥१३५॥  
 अह रागदोसगढं मोहगढं च तं भवे तिविहं ।  
 धम्मत्थं हीणकुलाइ-पत्थणं मोहगढं च ॥१३६॥  
 रागेण गंगदत्तो दोसेणं विरसभूइमाईआ ।  
 मोहेण चंडपिगल-माईआ हुंति दिट्ठंता ॥१३७॥  
 णिअ जो मुक्खसुहं कुणइ निआणं असारसुहहेउं ।  
 सो कायमणिकएणं वेरुल्लिअमणिं पणासेइ ॥१३८॥  
 दुक्खक्खय कम्मक्खय समाहिमरणं च बोहिल्लभो अ ।  
 एअं पत्थेअव्वं न पत्थणिज्जं तओ अन्नं ॥१३९॥  
 उज्झिअनिआणसल्लो निस्सिभत्त-निअत्तिसमिइगुत्तीहिं ।  
 पंचमहव्वय-रक्खं कयसिक्खसुक्खं पसाहेइ ॥१४०॥  
 इदिअ-विसय-पसत्ता पडंति संसारसायेरे जीवा ।  
 पक्खिअव्व छिन्नपक्खा सुसीलगुण-पेहुणमविहूणा ॥१४१॥

न लहइ जहा लिहंतो मुहिल्लिअं अट्टिअं रसं सुणओ ।  
 सो तइ तालुअ-रसिअं विल्लिहंतो मन्नए सुक्खं ॥१४२॥  
 महिला-पसंगसेवी न लहइ किंचिवि सुहं तथा पुरिसो ।  
 सो मन्नए वराओ सयकाय-परिस्समं सुक्खं ॥१४३॥  
 सुट्ठुवि मग्गिज्जंतो कत्थवि केलीइ नत्थि जह सारो ।  
 इंदिअ-विसणसु तथा नत्थि सुहं सुट्ठुवि गविट्ठं ॥१४४॥  
 सोएण पवसिअपिआ चक्खूराएण माहुरो वणिओ ।  
 घाणेण रायपुत्तो निहओ जीहाइ सोदासो ॥१४५॥  
 फांसिदिएण दुट्ठो नट्ठो सोमालिआ-महीपालो ।  
 इक्किक्केणवि निहया किं पुण जे पंचसु पसत्ता ? ॥१४६॥  
 विसयाविवखो निवडइ निरविवखो तरइ दुत्तरभवोहं ।  
 देवी-देवसमागय-भाउयजुअलं व भणिअं च ॥१४७॥  
 छलिआ अवयवखंता निरावयवखा गया अविग्घेणं ।  
 तम्हा पवयणसारे निरावयवखेण होअव्वं ॥१४८॥  
 विसए अवियवखंता पडंति संसारसायरे घोरे ।  
 विसणसु निराविवखा तरंति संसारकंतारं ॥१४९॥  
 ता धीर ! धीबलेणं दुइंते दमसु इंदिअमइंदे ।  
 तेणुक्खयपडिववखो हराहि आराहणपडागं ॥१५०॥  
 कोहाईण विवागं नाऊण य तेसि निग्गहेण गुणं ।  
 निग्गिण्ह तेण सुपुरिस ! कसायकल्लिओ पयत्तेणं ॥१५१॥  
 जं अइतिकखं दुक्खं जं च सुहं उत्तमं तिलोईए ।  
 तंजाण कसायाणं बुद्धिडक्खय-हेइअं सव्वं ॥१५२॥

कोहेण नंदमाई निहया माणेण परसुरामाई ।  
 मायाइ पंडरजा लोहेण लोहनंदाई ॥१५३॥  
 ईअ उवएसामय-पाणएण पल्हाइअम्मि चित्तमि ।  
 जाओ सुनिव्वओ सो पाऊण व पाणिअं तिसिओ ॥१५४॥  
 इच्छामो अणुसट्ठिं भंते ! भवपंक-तरणदढलट्ठिं ।  
 जं जह उत्तं तं तह करेमि विणओणओ भणइ ॥१५५॥  
 जइ कहवि असुहकम्मोदएण देहम्मि संभवे विअणा ।  
 अहवा तण्हाईआ परीसहा से उदीरिज्जा ॥१५६॥  
 निद्धं मडुरं पल्हायणिज्ज-हिअयंगमं अगळिअं च ।  
 तो सेहावेअव्वो सो खवओ पन्नवंतेणं ॥१५७॥  
 संभरसु सुअण ! जं तं मज्झंमि चउव्विहस्स संघस्स ।  
 वूढा महापइन्ना अहयं आंराहइस्सामि ॥१५८॥  
 अरिहंत-सिद्ध-केवल्लि-पञ्चक्खं सव्वसंघ-सक्खिस्स ।  
 पञ्चक्खाणस्स कयस्स भंजणं नाम को कुणइ ? ॥१५९॥  
 भालुंकीए करुणं खज्जंतो घोरविअणत्तोवि ।  
 आराहणं पवन्नो ज्ञाणेण अवंतिसुकुमालो ॥१६०॥  
 मुग्गिल्लमिंरिंमि मुकोसलोऽवि सिद्धत्थदइअओ भयवं ।  
 वगधीए खज्जंतो पडिवन्नो उत्तमं अट्ठं ॥१६१॥  
 गुट्ठे पाओवगओ सुबंधुणा गोमए पलिअम्मि ।  
 डज्झंतो चाणक्को पडिवन्नो उत्तमं अट्ठं ॥१६२॥  
 अवलंबिऊण सत्तं तुमंपि ता धीर ! धीरयं कुणसु ।  
 भावेसु अ नेगुन्नं संसारमहासमुदस्स ॥१६३॥

जम्म-जरा-मरणजलो अणाइमं वसण-सावयाइन्नो ।  
 जीघाण दुक्खहेऊ कट्ठं रुद्धो भवसमुद्दो ॥१६४॥  
 धन्नोऽहं जेण मए अणोरपारंमि भवसमुद्दग्मि ।  
 भवसय-सहस्सदुलहं लद्धं सद्धम्मजाणमिणं ॥१६५॥  
 एअस्स पभावेणं पालिज्जत्तस्स सइ पयत्तेणं ।  
 जम्मंतरेऽपि जीवा पावंति न दुक्खदोगच्छं ॥१६६॥  
 चिंतामणी अउव्वो एअमपुव्वो अं कप्परुक्खुत्ति ।  
 एअं परमो मंतो एअं परमामय-सरिच्छं ॥१६७॥  
 अह मणमंदिर-सुंदरफुरंत-जिणगुणनिरंजणुज्जोओ ।  
 पंचनमुक्कारसमे पाणे पणओ विसज्जेइ ॥१६८॥  
 परिणाम-विसुद्धीए सोहम्मो सुरवरो महिड्डीओ ।  
 आराहिऊण जायइ भत्तपरिन्नं जहन्नं सो ॥१६९॥  
 उक्कोसेण निहत्यो अच्चुअकप्पंमि जायए अमरो ।  
 निव्वाणसुहं पावइ साहू सव्वट्ठसिद्धिं वा ॥१७०॥  
 इअ जोइसर-जिणवीरभद्द-भणिआणुसारिणीमिणमो ।  
 भत्तपरिन्नं धन्ना पढंति निसुणैति भावैति ॥१७१॥  
 सत्तरिसयं जिणाण व गाहाणं समयखित्तपन्नत्तं ।  
 आराहंतो विहिणा सासयसुक्खं लहइ सुक्खं ॥१७२॥

॥ इइ भत्तपरिण्णा-पयन्नो संमत्तो ॥



## ॥ सिरिचिरंतनायरिय-विरइयं सिरिपंचसुत्तं ॥



### तत्थ पठमं सुत्तं

णमो वीअरागाणं सच्चवण्णुणं देविंदपूर्इआणं जहट्टिअवत्थुवाईणं  
तेलुकगुरुणं अरुहंताणं भगवंताणं, जे एवमाइक्खंति-इह खलु अणाइ  
जीवे, अणाइ जीवस्स भवे, अणाइ कम्मसंजोगनिव्वत्तिए, दुक्खरूवे,  
दुक्खफले, दुक्खाणुबंधे; एअस्स णं वुच्छिंती सुद्धधम्माओ, सुद्ध  
धम्मसंपत्ती पावकम्मविगमाओ, पावकम्मविगमो तहाभव्वत्ताइ-  
भावओ; तस्स पुण विवागसाहणाणि चउसरणगमणं दुक्कडगरिहा  
सुकडाण सेवणं; अओ कायव्वमिणं होउकामेणं सया सुप्पणिहाणं  
भुज्जो भुज्जो संकिलेसे, तिकाळमसंकिलेसे; जावज्जीवं मे भगवंतो  
परमतिलोगनाहा अणुत्तरपुन्नसंभारा खीणरागदोसमोहा अचिंत-  
चितामणी भवजलहिपोआ एगंतसरणा अरहंता सरणं; तहा पहीण-  
ज्रामरणा अवेअकम्मकलंका पणट्टवाबाहा केवलनाणदंसणा सिद्धि-  
पुरनिवासी निरुवमसुहसंगया, सच्चवहा कयकिञ्चा सिद्धा सरणं;  
तहा पसंतगंभीरासया सावज्जजोगविरया पंचविहायारजाणगा परो-  
वयारनिरया पउमाइनिंदसणा ज्ञाणज्झयणसंगया, विसुज्जमाणभावा  
साहू सरणं; तहा सुरासुरमणुअपूइओ मोहतिमिरंसुमाली रागदोसवि-  
सपरममंतो, हेऊ सयलकहाणाणं, कम्मवणविहावसू, साहगो  
सिद्धभावस्स, केवलपण्णत्तो धम्मो जावज्जीवं मे भगवं सरणं;  
सरणमुवगओ अ एएसि ।

गरहामि दुक्कडं जणं अरहंतेसु वा, सिद्धेसु वा, आयरिणसु वा, उवज्झाएसु वा, साहूसु वा, साहुणीसु वा, अन्नेसु वा धम्मट्ठाणेषु माण-  
गिज्जेसु पूअणिज्जेसु; तथा माईसु वा, पिईसु वा, बंधुसु वा मित्तेसु वा, उवयारीसु वा, ओहेण वा जीवेसु मग्गट्ठिएसु मग्गसाहणेसु अमग्ग-  
साहणेसु; जं किंचि वितहमायरियं अणायरिअव्वं अणिच्छिअव्वं पावं पावाणुबंधि; सुहुमं वा वायरं वा; मणेण वा, वायाए वा, काएण वा; कयं वा, काराविअं वा, अणुमोइअं वा; रागेण दोसेण वा, मोहेण वा; इत्थ वा जम्मे, जम्मंतरेसु वा; गरहिअमेअं दुक्कडमेअं उज्झिय-  
व्वमेअं; विअणिअं मए कल्लाणमित्तगुरुभगवंतवयणाओ; एवमेअंति रोइअं सद्धाए; अरिहंतसिद्धसमक्खं गरहामि अहमिणं; दुक्कडमेअं उज्झियव्वमेअं इत्थ मिच्छामिदुक्कडं मिच्छामिदुक्कडं मिच्छामिदुक्कडं होउ मे एसा सम्मं गरिहा, होउ मे अकरणनिअमो, बहुमयं ममेअंति

इच्छामि अणुसट्ठि अरहंताणं भगवंताणं, गुरुणं कल्लाणमित्ताणंति; होउ मे एएहिं संजोगो, होउ मे एसा सुपत्थणा, होउ मे इत्थ बहु-  
माणो, होउ मे इओ मुक्खवीअंति; पत्तेसु एएसु अहं सेवारिहे सिआ आगारिहे सिआ, पडिवत्तिजुत्ते सिआ, निरइआरपारगे सिआ, संविग्गो जहासत्तीए सेवेमि सुकडं; अणुमोएमि सव्वेसिं अरहंताणं अणुट्ठाणं, सव्वेसिं सिद्धाणं सिद्धभावं, सव्वेसिं आयरिआणं आयारं सव्वेसिं उवज्झायाणं सुत्तप्पयाणं, सव्वेसिं साहूणं साहुकिरिअं, सव्वेसिं सावगागं मुक्खसाहणजोगे; सव्वेसिं देवाणं सव्वेसिं जीवाणं होउकामागं कल्लाणासयाणं मग्गसाहणजोगे; होउ मे एसा अणुमोअणा-सम्मं विहिपुव्विआ, सम्मं सुद्धासया सम्मं. पडिवत्तिरूवा, सम्मं निरइआरा, परमगुणजुत्तअरहंताइसामत्थओ; अचित्तसत्तिजुत्ता

हि ते भगवंतो वीअरागा सव्वण्णू परमकल्लाणा, परमकल्लाणहेऊ सत्ताणं; मूढे अम्हि पावे अणाइमोहवासिए, अणभिन्ने भावओ हिआहिआणं, अभिन्ने सिआ, अहिअनिवित्ते सिआ, हिअपवित्ते सिआ, आराहगे सिआ उच्चिअपडिवत्तीए सव्वसत्ताणं सहिअंति; इच्छामि सुक्कडं इच्छामि सुक्कडं ।

एवमेअं सम्मं पढमाणरस सुणमाणरस अणुप्पेहमाणरस सिढिली- भवंति परिहायंति विज्जंति अमुहकम्माणुबंधा, णिरणुबंधे वाऽसुह- कम्मे भग्गसामथ्थे सुहपरिणामेणं, कडगबद्धे विअ विसे अप्पफले सिआ, सुहावणिज्जे सिआ, अपुणभावे सिआ, तहा आसगलिज्जंति परिपोसिज्जंति निम्मविज्जंति मुहकम्माणुबंधा, साणुबंधं च सुहकम्मं पगिट्ठं पगिट्ठ भावज्जिअं नियमफलयं, सुपउत्ते विअ महागएसुहफले सिआ, मुह पवत्तगे सिआ, परमसुहसाहगे सिआ, अओ अपडिबंधमेअं अमुहभाव निरोहेणं सुहभाववीअंति, सुप्पणिहाणं सम्मं पढिअव्वं, सम्मं सोअव्वं, सम्मं अणुप्पेहिअव्वंति नमो नमिअनमिआणं परमगुरु- वीअरागाणं नमो सेसनमुक्करारिहाणं, जयउ सव्वणणुसासणं, परमसंबो- हीए सुहिणो भवंतु जीवा, सुहिणो भवंतु जीवा सुहिणो भवंतु जीवा ॥

इति पावपडिग्घाय-गुणबीजाहाणसुत्तं समत्तं ॥१॥



## अह बिइयं सुत्तं ।

जायाए धम्मगुणपडिवत्तिसद्दाए भाविज्जा । एणंसि सरूवं पयइ-  
सुंदरत्तं अणुगामित्तं परोवयारित्तं परमत्थहेउत्तं, तथा दुरणुचरत्तं,  
भंगे दारुणत्तं, महामोहजणगत्तं; भूओ दुल्लहत्तंति, एवं जहासत्तीए  
उचिअविहाणेणं अच्चंतभावसारं पडिवज्जिज्जा; तंजहा-थूल्लापाणाइ-  
वायविरमणं १ थूल्लासुसावायविरमणं २ थूल्लाअदत्तादाणविरमणं ३  
थूल्लामेहुणविरमणं ४ थूल्लापरिग्गह्विरमण ५ मिञ्चाइ, पडिवज्जिऊण  
पालणे जइज्जा, सयाणागाहगे सिआ, सयाणाभावगे सिआ, सयाणा-  
परतंते सिआ-आणा हि मोह विसपरमंतो, जलं रोसाइजलणस्स,  
कम्मवाहितिगिच्छासत्थं, कप्पपायवो सिवफलस्स, वज्जिज्जा अधम्म-  
मित्तजोगं चित्तिज्जाभिणवपाविए गुणे, अणाइभवसंगए अ अगुणे,  
उदग्गसहकारित्तं अधम्ममित्ताणं, उभयलोगगरिहित्तं, असुहजोग-  
परंपरंच, परिहरिज्जा सम्मं लोगविरुद्धे, करुणापेरे जणाणं, न खिसाविज्ज  
धम्मं, संकिलेसो खु एसा, परमबोहिबोअमबोहिफलमप्पणोत्ति,  
एवमालोएज्जा-न खलु इत्तो परो अणत्थोअंधत्तमेअं संसाराडवीए,  
जणगमणिट्ठावायाणं, अइदारुणं सरूवेणं, असुहाणबंधमच्चत्थं; सेविज्ज  
धम्ममित्तं विहाणेणं, अंधो विवाणुकट्टाए, वाहिए विव विज्जे, दरिदो  
विव ईसरे, भीओ विव महानायगे, न इओ सुंदरतरमन्नंति बहुमाणजुत्ते  
सिआ, आणाकंखी, आणापडिच्छगे आणाअविराहगे, आणानिप्फाय-  
गेति; पडिवन्नधम्मगुणारिहं च वट्टिज्जा गिहिसमुचिएसु गिहिसमा-  
योरसु, परिसुद्धाणुट्टाणे, परिसुद्धमणकिरिए, परिसुद्धवइकिरिए, परि-  
सुद्धकायकिरिए, वज्जिज्जाऽणेगोवघायकारणं गरहणिज्जं बहुकिलेस्सं  
आयइविराहगं समारंभं, न चित्तिज्जा परपीडं न भाविज्जा

दीणयं, न गच्छिज्ज हरिसं, न सेविज्जा वितहाभिनिवेशं, उचिअमण-  
 पवत्तगे सिआ; न भासिज्जा अलिअं, न फरुसं, न पेसुन्नं, नाणि-  
 बद्धं, हिअमिअभासगे सिआ; एदं न हिंसिज्जा भूआणि, न  
 गिण्हिज्ज अदत्तं, न निरिक्खिज्ज परदारं, न कुज्जा अणत्थदंडं, सुह-  
 कायजोगे सिआ; तथा लहोचिअदागे लहोचिअभोगे लहोचिअपरि-  
 वारे लहोचिअनिहिकरे सिआ; असंतावगे परिवारस्स, गुणक्रे  
 जहासत्ति, अणुकंपापरे, निम्ममे भावणं, एवं खु तप्पालणेवि धम्मो,  
 जह अन्नपालणेत्ति; सव्वे जीवा पुढो पुढो, ममत्तं बंधकारणं; तथा  
 तेसु तेसु समायारेसु सइसमण्णागए सिआ, अमुगेहं अमुगकुले  
 अमुगसिस्से अमुगधम्मट्ठाणट्टिए; न मे तव्विराहणा न मे तदारंभो  
 वुड्ढी ममेअस्स, एअमित्थ सारं, एअमायभूअं, एअं हिअं; असार-  
 मणं सव्वं, विसेसओ अविहिगहणेणं, एवमाह तिलोगबंधू परम-  
 कारुणिगे सम्मंसंबुद्धे भगवं अरहंतेत्ति, एवं समालोचिअ तदविरु-  
 द्धेसु समायारेसु सम्मं वट्टिज्जा, भावमंगलमेअं तन्निप्फत्तीए; तथा  
 जागरिज्ज धम्मजागरिआए, को मम कालो, किमेअस्स उचिअं,  
 असारा विसया, निअमगामिणो, विरसावसाणा, भीसणो मच्चू,  
 सव्वाभावकारी अविन्नायागमणो अणिवारणिज्जो पुणो पुणोणुबंधी;  
 धम्मो एअस्स ओसहं, एगंतविसुद्धो, महापुरिससेविओ सव्वहि-  
 अकारी निरइआरो परमाणंदहेऊ, नमो इमस्स धम्मस्स नमो एअधम्म-  
 पगासगाणं, नमो एअधम्मपालागाणं नमो एअधम्मपरूगाणं नमो  
 एअधम्मपवज्जगाणं, इच्छामि अहमिणं धम्मं पडिवज्जित्तए, सम्मं  
 मणवयणकायजोगेहिं होउ ममेअं कल्लाणं परमकल्लाणाणं जिणाणमणु-  
 भावओ, सुप्पणिहाणमेवं चित्तिज्जा पुणो पुणो, एअधम्मजुत्ताणमव-  
 वायकारी सिआ, पहाणं मोहच्छेअणमेअं, एवं विसुज्जमाणे भावणाए

कम्मापगमेणं उवेइ एअस्स जुग्गयं, तथा संसारविरत्ते संविग्गो भवइ  
अममे अपरोवतावी विसुद्धे विसुद्धमाणभावे ॥

इति साहुधम्मपरिभावणासुत्तं सम्मत्तं ॥२॥



तइयं सुत्तं ।

परिभाविए साहुधम्ममे जहोदिअगुणे जइज्जा सम्ममेयं पडिवाज्जि-  
त्तए; अपरोवतावं परोवतावो हि तप्पडिवत्तिविग्घं, अणुपाओ खु  
एसो, न खलु अकुसलारंभओ हिअं, अप्पडिबुद्धे कहिंवि पडि-  
बोहिज्जा अम्मापिअरे, उभयलोगसफलं जीविअं, समुदायकडा कम्मा  
समुदायफलत्ति, एवं सुदीहो अ विओगो, अण्णहा एगरुक्खनिवासि-  
सउणतुल्लमेअं, उद्दामो मच्चू पच्चासण्णो अ । दुल्लहं मणुअत्तं  
समुद्दपडिअरयणलाभतुल्लं; अइप्पभूआ अण्णे भवा दुक्खबहुला  
मोहंधयारा अकुसलाणुबंधिणो, अजुग्गा सुद्धधम्मरस; जुग्गं च एअं  
पोअभूअं भवसमुद्दे, जुत्तं सकज्जे निउंजिउं, संवरट्ठइअच्छिहं नाण-  
कण्णधारं तवपवणजवणं। खणे दुल्लहे सव्वकज्जोवमाईए सिद्धिसाहग-  
धम्मसाहगत्तेण, उवादेआ य एसा जीवाणं-जं न इमीए जम्मो, न  
जरा, न मरणं, न इट्ठविओगो। नाणिट्ठसंपओगो, न खुहा, न पिवासा,  
न अण्णो कोइ दोसो, सव्वहा अपरतंतं जीवावत्थाणं, असुभरागा-  
इरहिअं संतं सिवं अव्वाबाहंति, विवरीओ अ संसारो इमीए-अणवट्ठि-  
असहावो, इत्थ खलु सुहीवि असुही, संतमसंतं, सुविणुव्व सव्वमाल-

मालंति; ता-अलमित्थ पडिवंधेणं, करेह मे अणुग्गहं, उज्जमह एअं वुच्छिदित्तए, अहंपि तुम्हाणुमईए साहेमि एअं निव्विन्नो जम्म-मरणेहिं; समिज्जइ अ मे समीहिअं गुरुपभावेणं; एवं सेसेवि बोहिज्जा तओ सममेएहिं सेविज्ज धम्मं, करिज्जोचिअकरणिज्जं, निरासंसो उ सव्वदा; एअं परममुणिसासणं । अबुज्जमाणेसु अ कम्मपरिणईए विहिज्जा जहासत्ति तदुवकरणं आओवायसुद्धं समईए कयण्णुआ खु एसा; करुणा य धम्मप्पहाणजणणी जणम्मि, तओ अणुण्णाए पडिवज्जिज्ज धम्मं, अण्णहा अणुवहे चेव उवहिजुत्ते सिआ, धम्माराहणं खु हिअं सव्वसत्ताणं, तथा तहेअं संपाडिज्जा; सव्वहा अपडिवज्जमाणे चइज्जा ते अट्टाणगिलाणोसहत्थचागनाएणं से जहा नामए केइ पुरिसे कहं चि कंतारगए अम्मापिइसमेए तप्पडिबद्धे वच्चिज्जा, तेसिं तत्थ नियमघाई पुरिसमित्तासज्जे संभवओसहे महायंके सिआ तत्थ से पुरिसे तप्पडिवंधाओ एवमालोचिअ-न भवंति एए निअमओ ओसहमंतरेण, ओसहभावे अ संसओ, कालसहाणि अ एआणि, तथा संठविअ संठविअ तदोसहनिमित्तं सवित्तिनिमित्तं च चयमाणे साहू; एस चाए अचाए, अचाए चेव चाए, फलमित्थ पहाणं बुहाणं, धीरा एअदंसिणो; स ते ओसहसंपायणेण जीवाविज्जा संभवाओ पुरिसोचिअमेअं; एवं सुक्कपक्खिए महापुरिसे संसारकंतारपडिए अम्मापिइसंगए धम्मपडिबद्धे विहरिज्जा, तेसिं तत्थ निअमविणासगे अपत्तबीजाइपुरिसमित्तासज्जे संभवंतसम्मत्ताइओसहे मरणाइविवागे कम्मायंके सिआ, तत्थ से सुक्कपक्खिए पुरिसे धम्मपडिवंधाओ एवं समालोचिअ-‘विणस्संति एए अवस्सं सम्मत्ताइओसहविरहेण, तरस संपाडणे विभासा, कालसहाणि अ एआणि ववहारओ’, तथा संट्ट-विअ संट्टविअ इहलोगचिंताए तेसिं सम्मत्ताइओसहनिमित्तं विसिट्ट-

गुरुमाइभावेण, सवित्तिनिमित्तं च किञ्चकरणेण, चयमाणे संजमपडिव-  
 तीए साहुसिद्धीए, एस चाए अचाए, तत्तभावणाओ, अचाए चेव  
 चाए, मिच्छभावणाओ; तत्तफलमित्थ पहाणं परमत्थओ; धीरा एअदं-  
 सिणो आसन्नभव्वा; स ते सम्मत्ताइओसहसंपाडणेण जीवाविज्जा,  
 अच्चंतिअं अमरणावञ्जवीअजोगेणं संभवाओ; सुपुरिसोचिअमेअं;  
 दुप्पडिआराणि अ अम्मापिईणि, एस धम्मो सयाणं, भगवं इत्थ  
 नायं-परिहरमाणे अकुसलाणुबंधि अम्मापिइसोगंति; एवमपरोषतावं  
 सव्वहा सुगुरुसमीवे, पूइत्ता भगवंते वीअरागे साहू अ, तोसिऊण  
 विहवोचिअं किवणाई, सुप्पउत्तावस्सए सुविसुद्धनिमित्ते समहिवासिए  
 विसुज्जमाणो महया पमोएणं सम्मं पव्वइज्जा, लोअधम्मोहिंतो  
 लोउत्तरधम्मगमणेण; एसा जिणाणमाणा महाकह्णणत्ति न विराहि-  
 अव्वा बुहेणं, महाणत्थभयाओ सिद्धिकंखिणा ॥

इति पव्वज्जागह्णविहिसुत्तं सम्मत्तं ॥३॥



चउत्थं सुत्तं ।

स एवमभिपव्वइए समाणे सुविहिभावओ किरिआफलेण जुज्जइ  
 विसुद्धचरणे महासत्ते न विवज्जयमेइ । एअ अभावेऽभिप्पेअसिद्धी  
 उवायपवितीओ; नाविवज्जत्थोणुवाए पयट्टइ; उववाओ अ साहगो  
 निअमेण, तस्स तत्तच्चाओ; अण्णहा अइप्पसंगाओ; मिच्छयमयमेअं;  
 से समलिट्ठुकंचणे समसत्तुमित्ते निअत्तग्गाहदुक्खे पसमसुहसमेए

सम्मं सिक्खमाइअइगुरुकुलवासी गुरुपडिबद्धे विणीए भूअत्थदरिसी; न इओ हिअं तत्तंति मन्नइ, सुस्सूसाइगुणजुत्ते तत्ताभिनिवेसा विहि-  
 परे परममंतोत्ति अहिज्जइ सुत्तं, बद्धलक्खे आसंसाविप्पमुक्के आय-  
 यट्ठी; स तमवेइ सव्वहा, तओ सम्मं निउंजइ, एअं धीराण सासणं,  
 अण्णहा अणिओगो अविहिगहिअमंतनाएण अणाराहणाए न किंचि,  
 तदणारंभाओ धुवं, इत्थ मग्गदेसणाए दुक्खं अवधीरणा अत्पडिबत्ती,  
 नेवमहीअमहीअं अवगमविरहेण; न एसा मग्गगामिणो, विराहणा  
 अणत्थमुहा, अत्थहेऊ, तससारंभाओ धुवं, इत्थ मग्गदेसणाए अणभि-  
 निवेसो पडिबत्तिमित्तं किरिआरंभो, एवंपि अहीअं अहीअं अवगम-  
 लेसजोगओ, अयं सबीओ नियमेण, मग्गगामिणो खु एसा अवाय-  
 ब्हुल्लस, निरवाए जंहोदिए सुत्तुत्तकारी हवइ। पवयणमाइसंगए  
 पंचसमिए तिगुत्ते, अणत्थपरं एअच्चाए अविअत्तस सिसुजणणिचाय-  
 नाएण; विअत्ते इत्थ केवली एअफलभूए, सम्ममेअं विआणइ  
 दुविहाए परिण्णाए, तथा आसासपयासदीवं संदीणाऽथिराइभेअं,  
 असंदीणाथिरत्थमुज्जमइ जहासत्तिमसंभंते अणूसगे असंसत्तजो-  
 गाराहए भवइ; उत्तरुत्तरजोगसिद्धीए मुच्चइ पावकम्मणत्ति, विसुज्झ-  
 माणे आभवं भावकिरिअमाराहेइ, पसमसुहमए हवइ-अपीडिए संजमत-  
 थकिरिआए अव्वहिए परीसहोवसग्गेहि, वाहिअसुकिरिआनाएणं; से  
 जहा नामए केइ महावाहिगहिए अणुहूअतव्वेअणे विण्णाया सरूवेण  
 निव्विण्णे तत्तओ सुविज्जवयणेण सम्मं तमवगच्छिअ जहाविहाणओ  
 पवण्णे सुकिरिअं; निरुद्धजहिच्छाचारे, तुच्छपत्थभोई, मुच्चमाणे  
 वाहिणा, निअत्तमाणवेअणे समुवल्लभारोगं पवड्ढमाणतव्वभावे  
 तल्लोभनिव्वुईए तत्पडिबंधाओ सिराखाराइजोगेवि वाहिसमारुग्ग-

विष्णाणेण इट्टनिप्फत्तीओ अणाकुलभावयाए किरिओवओगेण अवी-  
 ङिए अक्वहिए सुह्लेस्साए वड्ढइ, विज्जं च बहु मण्णइ; एवं  
 कम्मवाहिगहिए अणुभूअजम्माइवेअणे, विष्णाया दुक्खरूवेणं,  
 निव्विण्णे तत्तओ, तओ सुगुरुवयणेण अणुट्टाणाइणा तमवगच्छिअ  
 पुव्वुत्तविहाणओ पवन्ने सुकिरिअं पव्वज्जं; निरुद्धपमायायारे असार-  
 सुद्धभोई मुच्चमाणे कम्मवाहिणा, निअत्तमाणिट्टविओगाईवेअणे, ससु-  
 वल्लभ चरणारुगं, पवड्ढमाणसुह्भावे, तल्लाभनिव्वुईए तप्पडि-  
 बंधविसेसओ परीसहोवसग्गभावेवि तत्तसंवेअणाओ कुसलासयबुड्ढी-  
 थिरासयत्ते; धम्मोवओगाओ, सया थिमिए तेउल्लेसाए पवड्ढइ,  
 गुरुं च बहु मन्नइ जहोचिअं असंगपडिवत्तीए, निसग्गपवित्तिभावेण  
 एसा गुरुई विआहिआ भावसारा, विसेसओ भगवंतबहुमाणेणं, ' जो  
 मं पडिमन्नइ से गुरुंति ' तदाणा; अन्नहा किरिआ, अकरिआ, कुल-  
 डानारीकिरिआसमा गरहिआ तत्तवेईणं, अफलजोगओ; विसण्णतत्ती-  
 फलमित्थ नायं, आवट्टे खु तप्पलं असुहाणुबंधे, आयओ गुरुबहु-  
 माणो अवंझकारणत्तेण, अओ परमगुरुसंजोगो, तओ सिद्धि असंखयं  
 एसेह सुहोदए पगिट्टतयणुबंधे भववाहितेगिच्छी, न इओ सुदरं परं,  
 उवमा इत्थ न विज्जई, स एवं पण्णे, एवं भावे, एवं परिणामे,  
 अप्पडिवडिए, वड्ढमाणे तेउल्लेसाए, दुवाल्लसमासिएणं परिआएणं  
 अइक्कमइ सव्वदेवतेउल्लेसं; एवमाह महामुणी; तओ सुक्के सुक्काभि-  
 जाई भवइ, पायं त्रिण्णकम्माणुबंधे, खवइ लोसण्णं, पडिसोअगामी,  
 अणुसोअनिवित्ते, सया सुहजोगे एस जोगी विआहिए; एस आराहगे  
 सामण्णस्स, जहा गहिअपइण्णे सव्वोवहासुद्धे संधइ सुद्धगं भवं  
 सम्मं अभवसाहगं-भोगकिरिआ सुरूवाइक्कपं, तओ ता संपुण्णा पाउ-

णइ अविगल्लहेउभावओ असंकिलिट्टसुहरूवाओ अपरोवताविणो सुंदरा  
 अणुबंधेणं, न य अण्णा संपुण्णा; तत्तत्तखंडणेणं एअं नाणंति वुच्चइ;  
 एअंमि सुहजोगसिद्धी उच्चिअपडिवत्तिपहाणा; इत्थ भावो पवत्तगो;  
 पायं विग्घो न विज्जइ निरणुबंधासुहकम्मभावेण, अक्खित्ताओ इमे  
 जोगा भावाराहणाओ, तथा तओ सम्मं पवत्तइ निष्फायइ अणाउले;  
 एवं किरिआ, सुकिरिआ, एंगंतनिक्कलंका निक्कलंक्थसाहिआ, तथा  
 सुहाणुबंधा उत्तरुत्तरजोगसिद्धीए; तओ से साहइ परं परत्थं सम्मं  
 तक्कुसले; सया, तेहिं तेहिं पगारेहिं साणुबंधं महोदए बीजबीजा-  
 दिट्ठावणेणं, कत्तिविरिआइजुत्ते अवंग्गसुहचिट्ठे समंतभदे सुप्पणि-  
 हाणाइहेऊ मोहतिमिरदीवे रागामयविज्जे दोसानलजलनिही संवेग-  
 सिद्धीकेरे हवइ अचिंतचित्तामणिकप्पे; स एवं परंपरत्थसाहए तथा  
 करुणाइभावओ, अणेगेहिं भवेहिं विमुच्चमाणे पावकम्मूणा, पवड्ड-  
 माणे अ सुहभावेहिं अणेगभविआए आराहणाए पाउणइ सव्वुत्तमं  
 भवं चरमं अचरमभवहेउं अविगलपरंपरत्थनिमित्तं, तत्थ काऊण  
 निरवसेसं किञ्चं विहूअरयमले सिज्जइ बुज्जइ मुच्चइ परिनिव्वाइ  
 सव्वदुक्खाणमंतं करेइ ॥

इइ पव्वज्जापरिपालाणासुत्तं सम्मत्तं ॥४॥



स एवमभिसिद्धे परमबंधे मंगलाले जन्मजरामरणरहिए पहीणा-  
सुहे अणुबंधसत्तिवज्जिए संपत्तनिअसरूवे अकिरिए सहावसंष्टिए  
अणंतनाणे अणंतदसणे; से न सदे, न रूवे, न गंधे, न रसे, न फासे,  
अरूवी सत्ता अणित्थंत्थसंष्टाणा, अणंतविरिआ, कयकिच्चा, सव्वा-  
बाहविवज्जिआ, सव्वहा निरविक्खा, थिमिआ, पसंता; असंजोगिए  
एसाणंदे, अओ चेव परे मए, अविक्खा अणाणंदे, संजोगो विओग-  
कारणं, अफलं फल मेआओ, विणिवायपरं खु तं, बहुमयं मोहाओ  
अबुहाणं, जमित्तो विवज्जओ, तओ अणत्था अपज्जवसिआ, एस  
भावरिऊ परे, अओ वुत्ते उ भगवया; नागासेण जोगो एअस, से  
सरूवसंष्टिए, नागासमण्णत्थ, न सत्ता सदंतरमुवेइ; अचित्तमेअं  
केवल्लिगम्मं तत्तं, निच्छयमयमेअं विजोगवं च जोगोत्ति न एस  
जोगो, भिण्णं लक्खणमेअस्स, न इत्थाविक्खा, सहावो खु एसो  
अणंतसुहसहावकप्पो, उवमा इत्थ न विज्जइ, तब्भावे अणुभावो परं  
तस्सेव, आणा एसा जिणाणं सव्वण्णूणं अवितहा एगंतओ, न वित-  
हत्ते निमित्तं, न चानिमित्तं कज्जति, निदंसणमित्तं तु नवरं; सव्वसत्तु-  
क्खए सव्ववाहिविगमे सव्वसंजोगेणं सव्विच्छासंपत्तीए जारिसमेयं,  
इत्तोणंतगुणं तं तु भावसत्तुक्खयादितो, रागादओ भावसत्तु, कम्मो-  
दया वाहिणो, परमलद्धीओ उ अट्टा, अणिच्छेच्छा इच्छा, एवं सुहुममेअं  
न तत्तओ इयरेण गम्मइ, जइसुहं व अजइणा, आरुगसुहं व रोगि-  
णत्ति विभासा, अचित्तमेअं सरूवेणं; साइअपज्जवसिअं एगसिद्धा-  
विक्खाए, पवाहओ अणाई, ते वि भगवंतो एवं, तहाभवत्ताइ-  
भावओ, विचित्तमेअं तहाफलभेएण, नाविचित्ते सहकारिभेओ, तद-  
विक्खो तओत्ति, अपेगंतवाओ तत्तवाओ, स खलु एवं, इहरहेगंतो,

मिच्छन्तमेसो, न इत्तो चवत्था, अणारिहमेअं; संसारिणो उ सिद्धत्तं, नाबद्धस्स मुत्ती, सदत्थरहिआ, अणाइमं बंधो पवाहेणं अईअकाल-तुल्लो, अबद्धबंधणे वा मुत्ती पुणो बंधपसंगओ, अविसेसो अबद्ध-मुक्काणं अणाइजोगे वि विओगो कंचणोवलनाएणं, न दिदिक्खा अकर-णस्स, नयादिट्ठंमि एसा न सहजाए निवित्ती, न निवित्तीए आय-ट्ठाणं, नयण्णाहा तस्सेसा, न भव्वत्ततुल्ला नाएणं, न केवलजीवरूव-मेअं, न भाविजोगाविक्खाए तुल्लत्तं, तथा केवलत्तेण सयाविसेसओ, तथा सहावकप्पणमप्पमाणमेव; एसेव दोसो परिकप्पिआए, परिणा-मभेआ बंधाइभेउत्ति साहू; सव्वनयविसुद्धिए निरुवचरिओभयभावेणं; न अप्पभूअं कम्मं, न परिकप्पिअमेअं, न एवं भवादिभेओ न भावाभावो उ सिद्धी, न तदुच्छेदेणुप्पाओ, न एवं समंजसत्तं, नाणाइमंतभवो, न हेउफलभावो, तस्स तथा सहावकप्पणमजुत्तं निराहारन्नयकओ निओगेणं; तस्सेव तथाभावे जुत्तमेअं सुहुममट्ठपय-मेअं विचिन्तिअव्वं महापण्णाएत्ति; अपज्जवसिअमेव सिद्धसुक्खं, इत्तो चेवुत्तमं इमं, सव्वहा अणुस्सुगत्तेणंतभावाओ, लोगतंसिद्धिवा-सिणो एए, जत्थ य एगो तत्थ, निअमा अणंतं; अकम्मणो गई पुव्व-पओगेण अलाउप्पभिइनायओ; निअमो अओ चेव अफुसमानगईए गमणं, उक्करिसविसेसओ इअं, अव्वुच्छओ भव्वाण अणंत भावेण, एअमणंताणंतयं, समया इत्थ नायं, भव्वत्तं जोगयामित्तमेव केसिंचि पडिमाजुग्गदारुनिंदसणेणं, ववहारमयमेअं, एसोऽवि तत्तंगं, पवि-त्तिविसोहणेण अणेगंतसिद्धीओ निच्छयंगभावेण, परिसुद्धो उ केवलं, एसा आणा इह भगवओ समंतभदा तिकोडिपरिसुद्धीए अपुणबंध-गाइगम्मा; एअप्पिअत्तं खलु इत्थ लिंअं; ओचित्तपवित्तिविन्नेअं सवे-

गसाहगं निअमा; न एसा अत्रेसिं देआ, लिंआविवज्जयाओ तप्परिण्णा,  
तयणुग्गहट्टयाए आमकुंभोदगनासनाएणं, एसा करुणत्ति वुच्चइ-  
एगंतपरिसुद्धा अविराहणाफला तिलोगनाहबहुमाणेणं निस्सेअससाहि-  
गत्ति ॥ पव्वज्जाफलसुत्तं ॥१॥

इह समत्तं पंचसुत्तं चिरंतनायरियविरइयं ।



\*\*\*\*\*

अनायासेन मरणं विनादैन्येन जीवनम् ।  
देहान्ते तव सान्निध्यं देहि मे परमेश्वर ! ॥  
भूयो भूयो जगन्नाथ ! त्वामदःप्रार्थनामहे ।  
त्वत्पादपङ्कजद्वन्द्वे मनो मे भ्रमरायताम् ॥  
मैत्रीप्रमोदकारुण्य माध्यस्थ्यमहितोदयम् ।  
स्मरामि क्लेशनाशाय जिनेशस्य पद द्वयम् ॥

\*\*\*\*\*

# सिरिधम्मदासगणी विरइया उवएसमाला ।



नमिऊणजिणवरिंदे इंदनरिंदश्चिए तिलोयगुरु ।  
उवएसमालमिणमो वुच्छामि गुरुवएसेणं ॥१॥  
जगचूडामणिभूओ उसभो वीरो तिलोय सिरितिलओ ।  
एगो लोगाइच्चो एगो चक्सुय तिहुअणस्स ॥२॥  
संवच्छरमुसभजिणो छम्मासावधमाणजिणचंदो ।  
इअ विहरिआ निरसणा जइज्ज एओवमाणेणं ॥३॥  
जइता तिलोअनाहो विसहइ बहुआइ असरिसजणस्स ।  
इअ जीअंतकराइं, एस खमा सव्वसाहूणं ॥४॥  
न चइज्जइचालेउं, महइमहावद्धमाणजिणचंदो ।  
उवसग्गसहरसेवि, मेरू जह वायगुंजाहिं ॥५॥  
भद्दो विणीअविणओ, पढमगणहरो समत्तसुअनाणी ।  
जाणंतोऽवि तमत्थं, विम्हिअहियओ सुणइ सव्वं ॥६॥  
जं आणवेइ राया, पगईओ तं सिरेण इच्छंति ।  
इअ गुरुजणमुहभणिअं कयंजलिउडेहिं सोअव्वं ॥७॥  
जह सुरगणाण इंदो, गहगणत्तारागणाण जह चंदो ।  
जह य पयाण नरिंदो, गणस्सवि गुरु तहाणंदो ॥८॥  
बालुत्ति महीपालो, न पया परिभचइ एस गुरु उवसा ।  
जं वा पुरओ काउं, विहरंति मुणी तहा सोवि ॥९॥

पडिरूवो तेयस्सी, जुगप्पहाणागमो महुरवक्को ।  
 गंभीरो धीमंतो, उवएसपरो अ आयरिओ ॥१०॥  
 अपरिस्सावी सोमो, संगहसीलो अभिग्गहमई य ।  
 अविकत्थणो अचवलो, पसंतहियओ गुरु होई ॥११॥  
 कइयावि जिणवरिंदा, पत्ता अयरामरं पहं दाउं ।  
 आयरिएहिं पवयणं, धारिज्जइ संपयं सयलं ॥१२॥  
 अणुगम्मए भगवई, रायसुअज्जासहरस्सविदेहिं ।  
 तहवि न करेइ माणं, परियच्छइ तं तथा नूणं ॥१३॥  
 दिणदिक्खिअस्स दमगरस, अभिमुहा अज्जचंदणा अज्जा ।  
 नेच्छइ आसणगहणं सो विणओ सव्वअज्जाणं ॥१४॥  
 वरिससयदिक्खिआए, अज्जाए अज्जदिक्खिओ साहू ।  
 अभिगमण-वंदण-नमंसणेण विणएण सो पुज्जो ॥१५॥  
 धम्मो पुरिसप्पभवो, पुरिसवरदेसिओ, पुरिसजिट्ठो ।  
 लोएवि पहू पुरिसो, किं पुण लोएगुत्तमे धम्मो ? ॥१६॥  
 संवाहणस्स रण्णो, तइया वाणारसीए नयरीए ।  
 कन्नासहरसमहिअं आसी किर रूववंतीणं ॥१७॥  
 तहवि य सा रायसिरी, उल्लुट्ठंती न ताइया ताहिं ।  
 उयरट्ठिएण इक्केण, ताइया अंगवीरेण ॥१८॥  
 महिलाण सुबहुआणवि, मज्झाओ इह समसघरसारो ।  
 रायपुरिसेहिं निज्जइ, जणेऽवि पुरिसो जहिं नत्थि ॥१९॥  
 किं परजणबहुजाणावणाहिं वरमप्पसक्खियं सुकयं ।  
 इह भरहचक्कवट्ठी, पसन्नचंदो य दिट्ठंता ॥२०॥

वेसोऽवि अप्पमाणो, असंजमपहेसु वट्टमाणस्स ।  
 किं परिअत्तिअवेसं, विसं न मारेइ खज्जंतं ? ॥२१॥  
 धम्मं रक्खइ वेसो, संकइ वेसेण दिक्खओ म्हि अहं ।  
 उम्मग्गेण पडंतं, रक्खइ राया जणवउन्व ॥२२॥  
 अप्पा जाणइ अप्पा, जहट्टिओ अप्पसविखओ धम्मो ।  
 अप्पा करेइ तं तह, जह अप्पसुहावहं होइ ॥२३॥  
 जं जं समयं जीवो, आविसइ जेण जेण भावेण ।  
 सो तम्मि तम्मि समये, सुहासुहं बंधए कम्मं ॥२४॥  
 धम्मो मएण हुंतो, तो नवि सीउण्ह-वायविज्झडिओ ।  
 संवच्छर मणसिओ, बाहुबली तह किलिस्संतो ॥२५॥  
 निअगमइ-विगप्पिअ-चित्तिएण सच्छंदबुद्धिरइएणं ।  
 कत्तो पारत्तहिअं कीरइ गुरुअणुवएसेणं ? ॥२६॥  
 थद्धो निरोवयारी, अविणीओ गच्चिओ निरुवणामो ।  
 साहुजणस्स गरहिओ, जणेऽवि वयणिज्जयं लहइ ॥२७॥  
 थोवेण वि सप्पुरिसा, सणंकुमारुव्व केइ बुज्झंति ।  
 देहे खणपरिहाणी, जं किर देवेहिं से कहिया ॥२८॥  
 जइ ता लवसत्तमसुरविमाणवासीवि परिवडंति सुरा ।  
 चित्तिज्जंतं सेसं, संसारे सासयं कयरं ? ॥२९॥  
 कह तं भण्णइ सुक्खं ? सुचिरेणवि जस्स दुक्खमल्लिअइ ।  
 जं च मरणावसाणे, भवसंसाराणुबंधि च ॥३०॥  
 षवएससहस्सेहिवि, बोहिज्जंतो न बुज्झइ कोई ।  
 जह बंधत्तराया, उदायिनिवमारओ चेव ॥३१॥

गयकण्णचंचलाए, अपरिञ्चत्ताएँ रायलच्छीए ।  
 जीवा सकम्मकलमलभरियभरा तो पडंति अहे ॥३२॥  
 वुत्तणवि जीवाणं, सुदुक्कराइंति पावचरिआइं ।  
 भयवं जा सा सा सा, पञ्चाएसो हु इणमो ते ॥३३॥  
 पडिवज्जिऊण दोसे, निअए सम्मं च पायवडिआए ।  
 तो किर मिगावईए, उप्पन्नं केवलं नाणं ॥३४॥  
 किं सक्का वुत्तुं जे सरागधम्मम्मि क्कोइ अकसाओ ? ।  
 जो पुण धरिज्ज धणिअं, दुव्वयणुज्जालिए स मुणी ॥३५॥  
 कडुअकसायतरूणं, पुपफं च फलं च दोऽवि विरसाइं ।  
 पुप्फेण ज्ञाइ कुविओ, फलेण पावं समायरइ ॥३६॥  
 संतेऽवि कोऽवि उज्झइ, कोऽवि असंतेऽवि अहिलसइ भोए ।  
 चयइ परपञ्चएणऽवि, पभवो ददूठूण जह जंवं ॥३७॥  
 दीसंति परमघोरावि पवरधम्मप्पभावपडिबुद्धा ।  
 जह सो चिलाइपुत्तो, पडिबुद्धो सुंसुमाणाए ॥३८॥  
 पुप्फियफलिए तह पिउघरम्मि तण्हा छुहा समणुबद्धा ।  
 ढंढेण तहा विसढा, विसढा जह सफलया जाया ॥३९॥  
 आहारसु सुहेसु अ, रम्मावसहेसु काणणेसुं च ।  
 साहूण नाहिगारो अहिगारो धम्मकज्जेसु ॥४०॥  
 साहू कांतारमहाभएसु अवि जणवएवि मुइअम्मि ।  
 अवि ते सरीरपीडं, सहंती न लहं ति य विरुद्धं ॥४१॥  
 जंतेहि पीलियावि हु, खंदगसीसा न चेव परिकुविया ।  
 विइयपरमत्थसारा, खमंति जे पंडिआ हुंति ॥४२॥

जिणवयणसुइसकण्णा, अवगयसंसारघोरपेयाला ।  
 ब्राह्मण खमंति जई, जइत्ति किं इत्थ अच्छेरं ? ॥४३॥  
 न कुलं इत्थ पहागं, हरिएसबलस्स किं कुलं आसी ? ।  
 आकंपिया तवेणं, सुरावि जं पज्जुवासंति ॥४४॥  
 देवो नेरइउत्ति य, कीड पयंगुत्ति माणुसो वेसो ।  
 रूवस्सी अ विरूवो, सुहभागी दुक्खभागी अ ॥४५॥  
 राउत्ति य दमगुत्ति य, एस सपागुत्ति एस वेयविऊ ।  
 सामी दासो पुज्जो, खलत्ति अधणो धणवइत्ति ॥४६॥  
 नवि इत्थ कोऽवि नियमो, सकम्मविणिविट्ठसरिसकयजिट्ठो ।  
 अन्नुरुववेसो, नडुव्व परियत्तए जीवो ॥४७॥  
 कोडीसएहिं धणसंचयस्स गुणसुभरियाए कन्नाए ।  
 नवि लुद्धो वयररिसी, अलोभया एस साहूणं ॥४८॥  
 अंतैउरपुरबलवाहणेहिं वरसिरिघरेहिं मुणिवसहा ।  
 कामेहिं बहुविहेहिं य, छंदिज्जंतावि नेच्छंति ॥४९॥  
 छेओ भेओ वसणं, आयासकिळेसभयविवागो अ ।  
 मरणं धम्मभंसो, अरई अत्थाउ सन्वाइं ॥५०॥  
 दोससयमूलजालं, पुव्वरिसिविबज्जियं जई वंतं ।  
 अत्थं वहसि अणत्थं, कीस अणत्थं तवं चरसी ? ॥५१॥  
 बह-बंधण-मारण-सेहणाओ काओ परिग्गहे नत्थि ।  
 तं जइ परिग्गहुच्चिय, जइधम्मो तो नणु पवंचो ॥५२॥  
 किं आसि नंदिसेणस्स कुलं जं हरिकुलस्स विउलस्स ।  
 आसी पियामहो सच्चरिएण वसुदेवनामुत्ति ॥५३॥

विज्जाहरीहिं सहारिसं, नरिंददुहियाहि अहमहंतीहिं ।  
 जं पत्थिज्जइ तइया, वसुदेवो तं तवस्स फलं ॥५४॥  
 सपरकमराउलवाइएण सीसे पलीविए निअए ।  
 गयसुकुमालेण खमा, तहा कया जह सिवं पत्तो ॥५५॥  
 रायकुल्लेसुऽवि जाया, भीया जरमरणगढभवसहीणं ।  
 साहू सहंति सव्वं, नीयाणऽवि पेसपेसाणं ॥५६॥  
 पणमंति य पुव्वयरं कुलया, न नमंति अकुलया पुरिसा ।  
 पणओ इह पुंवि जइजणस्स जह चक्कवट्टिसुणी ॥५७॥  
 जह चक्कवट्टिसाहू सामाइअसाहुणा निरुवयारं ।  
 भणिओ न चेव कुविओ, पणओ बहुअत्तणगुणेणं ॥५८॥  
 ते धन्ना ते साहू, तेसि नमो जे अकज्जपडिविरया ।  
 धीरा वयमसिहारं, चरंति जह थूलिभइसुणी ॥५९॥  
 विसयासिपंजरंमिव, लोए असिपंजरम्मि तिक्खम्मि ।  
 सिंहा व पंजरगया, वसंति तवपंजरे साहू ॥६०॥  
 जो कुणइ अप्पमाणं, गुरुवयणं न य लएइ उवएसं ।  
 सो पच्छा तह सोअइ, उवकोसघरे जह तवस्सी ॥६१॥  
 जिट्ठव्वयपव्वयभरसमुव्वहण-ववसिआरस अच्चंतं ।  
 जुवइजणसंवइयरे, जइत्तणं उभयओ भट्टं ॥६२॥  
 जइ ठाणी जइ मोणी, जइ मुंडी वक्कली तवस्सी वा ।  
 पत्थन्तो अ अबंभं, बंभावि न रोयए मज्झं ॥६३॥  
 तो पढियं तो गुणियं, तो मुणियं तो अ चेइओ अप्पा ।  
 आवडियपेल्लियामंतिओऽवि जइ न कुणइ अकज्जं ॥६४॥

पागडियसन्वसल्लो, गुरुपामूलम्मि लहइ साहुपयं ।  
 अविमुद्धस्स न वट्ठइ, गुणसेढी तत्तिया ठाइ ॥६५॥  
 जइ दुक्करदुक्करकारउत्ति भणिओ जहट्टिओ साहू ।  
 तो कीस अज्जसंभूअविजयसीसेहिं नवि खमिअं ? ॥६६॥  
 जइ ताव सन्वओ सुंदरुत्ति कम्माण उवसमेण जई ।  
 धम्मं वियाणमाणो, इयरो किं मच्छरं वहइ ? ॥६७॥  
 अइसुट्टिओत्ति गुणसमुइओत्ति जो न सहइ जइपसंसं ।  
 सो परिहाइ परभवे, जहा महापीढपीढरिस्सी ॥६८॥  
 परपरिवायं गिण्हइ, अट्टमयविरल्लणे सया रमइ ।  
 डज्जइ य परसिरीए, सकसाओ दुक्खिओ निच्चं ॥६९॥  
 विग्गहविवायरुइणो, कुल्लाणसंधेण बाहिरकयस्स ।  
 नत्थि किर देवलोएवि देवसमिईसु अवगासो ॥७०॥  
 जइ ता जणसंभवहारवज्जियमकज्जमायरइ अन्नो ।  
 जो तं पुणो विकत्थइ, परस्स वसणेण सो दुहिओ ॥७१॥  
 सुट्ठुवि उज्जव ( म ) माणं, पंचेव करिंति रित्तयं समणं ।  
 अप्परुइ परनिंदा, जिच्चोवत्था कसाया य ॥७२॥  
 परपरिवायमईओ, दूसइ वयणेहिं जेहिं जेहिं परं ।  
 ते ते पावइ दोसे, परपरिवाई इअ अपिच्छो ॥७३॥  
 थद्धा छिइप्पेही, अवण्णवाई सयंमई चवला ।  
 वंका कोहणसीला, सीसा उव्वेअगा गुरुणो ॥७४॥  
 जस्म गुरुम्मि न भत्ती, न य बहुमाणो न गउरवं न भयं ।  
 नवि लज्जा नवि नेहो, गुरुकुलवासेण किं तस्स ? ॥७५॥

रुसइ चोइज्जंतो, वहई हियएण अणुसयं भणिओ ।  
 न य कम्हि करणिजे, गुरुस्स आलो न सो सीसो ॥७६॥  
 उव्विल्लणसूअणपरिभवेहि अइभणियदुट्टभणिएहि ।  
 सत्ताहिया सुविहिया, न चेव भिदंति मुहरागं ॥७७॥  
 माणंसिणोवि अबमाणवंचणा ते परस्स न करंति ।  
 सुहदुक्खुगिगरणत्थं, साहू उअहिव्व गंभीरा ॥७८॥  
 मउआ निहुअसहावा, हासदवविवज्जिया विगहमुक्का ।  
 असमंजसमइबहुअं, न भणंति अपुच्छिआ साहू ॥७९॥  
 महुरं निउणं थोवं, कज्जावडिअं अगव्वियमतुच्छं ।  
 पुठ्ठि मइसंकलियं, भणंति जं धम्मसंजुत्तं ॥८०॥  
 सट्ठि वाससहस्सा, तिसत्तखुत्तोदयेण धोएण ।  
 अणुचिण्णं तामलिणा, अन्नाणतवुत्ति अप्पफलो ॥८१॥  
 छज्जीवकायवहगा, हिंसकसत्थाइं उवइसंति पुणो ।  
 सुबहुंपि तवकिलेसो, बालतवस्सीण अप्पफलो ॥८२॥  
 परियच्छंति अ सव्वं, जहट्ठियं अवितहं असंदिद्धं ।  
 तो जिणवयणविहिन्नु सहंति बहुअरस बहुआइं ॥८३॥  
 जो जरस बट्टइ हियए सो तं ठावेइ सुंदरसहावं ।  
 वग्घी छावं जणणी, भइं सोमं च मत्तेइ ॥८४॥  
 मणि-कणग-रयण-धणपूरियम्मि भवणम्मि सालिभहोडवि ।  
 अन्नो किर मज्झवि सामिओत्ति जाओ विगयकामो ॥८५॥  
 न करंति जे तवसंजमं च तुल्लपाणिपायाणं ।  
 पुरिसा समपुरिसाणं, अवस्स पेसत्तणमुर्विति ॥८६॥

सुंदरसुकुमालसुहोइएण विविहेहिं तवविसेसेहिं ।  
 तह सोसविओ अप्पा जह नवि नाओ सभवणेऽवि ॥८७॥  
 दुकरमुद्धोसकरं, अवंतिसुकुमालमहरिसीचरियं ।  
 अप्पावि नाम तह तज्जइत्ति अच्छेयरं एअं ॥८८॥  
 उच्चद्धसरीरघरा, अन्नो जीवो सरीरमन्नंति ।  
 धम्मस्स कारणे सुविहिया सरीरंपि छडुंति ॥८९॥  
 एगदिवसंपि जीवो, पव्वज्जमुवागओ अनन्नमणो ।  
 जइवि न पावइ मुक्खं, अवस्स वेमाणो होइ ॥९०॥  
 सीसावेढेण सिरम्मि वेढिए निग्गयाणि अच्छीणि ।  
 मेयज्जरस भगवओ, न य सो मणसावि परिकुविओ ॥९१॥  
 जो चंदणेण बाहुं, आलिंपइ वासिणा वि तच्छेइ ।  
 संथुणइ जो अ निंदइ, महरिसिणो तत्थ समभावा ॥९२॥  
 सिंहगिरिसुसीसाणं, भइं गुरुवयणसइहंताणं ।  
 वयरो किर दाही वायणत्ति न विकोविअं वयणं ॥९३॥  
 मिण गोणसंगुलीहिं, गणेहि वा दंतचक्कलाइं से ।  
 इच्छंति भाणिरुणं, (भाणियव्वं) कज्जं तु त एव जाणंति ॥९४॥  
 कारणविऊ कयाई, सेयं कायं वयंति आयरिया ।  
 तं तह सइहिअव्वं भविअव्वं कारणेण तहिं ॥९५॥  
 जो गिणहइ गुरुवयणं, भण्णंतं भावओ विसुद्धमणो ।  
 ओसहमिव पिज्जंतं, तं तरस सुहावहं होइ ॥९६॥  
 अणुवत्तगा विणीआ, बहुक्खमा निच्चभत्तिमंता य ।  
 गुरुकुलवासी अमुई, धन्ना सीसा इह सुशीला ॥९७॥

जीवंतस्स इह जसो, किच्ची य मयस्स परभवे धम्मं  
 सुगुणस्स य, निगुणस्स य अजसाऽकिच्ची अहम्मो य ॥९८॥  
 बुद्धावासेऽवि ठियं, अहव गिलाणं गुरुं परिभवन्ति ।  
 दत्तुव्व धम्मवीमंसएण दुस्सिक्खियं तंपि ॥९९॥  
 आयरियभत्तिरागो, कस्स मुनक्खत्तमहरिसीसरिसो ।  
 अवि जीविअं ववसिअं, न चेव गुरुपरिभवो सहिओ ॥१००॥  
 पुण्णेहिं चोइआ पुरक्खडेहिं सिरिभायणं भविअसत्ता ।  
 गुरुमागमेसिभदा, देवयमिव पज्जुवासन्ति ॥१०१॥  
 बहुसुक्खसयसहरसाण दायगा मोअगा दुहसयाणं ।  
 आयरिआ फुडभेअं, केसिपएसीअ (व) ते हेऊ ॥१०२॥  
 नरयगइगमणपडिहत्थए कए तह पएसिणा रण्णा ।  
 अमरविमाणं पत्तं, तं आयरिअप्पभावेणं ॥१०३॥  
 धम्ममइएहिं अइसुंदरेहिं कारणगुणोवणीएहिं ।  
 पल्हायंतो य मणं, सीसं चोएइ आयरिओ ॥१०४॥  
 जीअं काऊण पणं, तुरमिणिदत्तरस कालिअज्जेणं ।  
 अविअ सरीरं चत्तं, न य भणिअमहम्मसंजुत्तं ॥१०५॥  
 फुडपागडमकहंतो, जहट्टिअं बोहिलाभमुवहणइ ।  
 जह भगवओ विसालो, जरमरणमहोअही आसि ॥१०६॥  
 कारुण्णरुण्णसिगारभावभयजीविअंतकरणेहिं ।  
 साहू अविअ मरंति, न य निअनिअमं विराहंति ॥१०७॥  
 अप्पहियमायरंतो अणुमोअंतो अ सुगगइं लहइ ।  
 रहकारदाणअणुमोअगो मिगो जह य बलदेवो ॥१०८॥

जंतं कयं पुरा पूरणेण अइदुक्करं चिरं कालं ।  
 जइ तं दयावरो इह, करित्तु तो सफल्यं हुंतं ॥१०९॥  
 कारणनीयावासी, सुट्ठुयं उज्जमेण जइयव्वं ।  
 जह ते संगमथेरा, सपाडिहेरा तथा आसी ॥११०॥  
 एगंतनियावासी, घरसरणाईसु जइ ममत्तंपि ।  
 कह न पडिहंति कलिकलुस-रोसदोसाण आवाए ॥१११॥  
 अविक्त्तिऊण जीवे, कत्तो घरसरणगुत्तिसंठप्पं ।  
 अवि कत्तिआ य तं तह, पडिआ अस्संजयाण पहे ॥११२॥  
 थोवोऽवि गिहिपसंगो, जइणो सुद्धस्स पंकमावहई ।  
 जह सो वारत्तरिसी, हसिओ पज्जोअनरवइणा ॥११३॥  
 सब्भावो वीसंभो, नेहो रइवइयो अ जुवइजणे ।  
 सयणघरसंपसारो, तवसीलवयाइं फेडिज्जा ॥११४॥  
 जोइस-निमित्तअक्खर-कोउआएस-भूइकम्मेहिं ।  
 करणाणुमोअणाहि अ, साहुस्स तवक्खओ होइ ॥११५॥  
 जह जह कीरइ संगो, तह तह पंसरो खणे खणे होइ ।  
 थोवोवि होइ बहुओ, न य लहइ धिइं निरुंभंतो ॥११६॥  
 जो चयइ उत्तरगुणे, मूलगुणेऽवि अचिरेण सो चयइ ।  
 जह जह कुणइ पमायं, पिडिजइ तह कसाएहिं ॥११७॥  
 जो निच्छएण गिण्हइ, देहच्चाएवि न य धिइं मुअइ ।  
 सो साहेइ सकज्जं, जह चंदवडिसओ राया ॥११८॥  
 सीउण्हखुप्पिवासं, दुरिसज्जपरीसहं किलेसं च ।  
 जो सहइ तस्स धम्मो, जो धिइमं सो तवं चरइ ॥११९॥

धम्ममिणं जाणंता, गिहिणोऽवि दढव्वया किमुअ साहू ? ।  
 कमलामेलाहरणे, सागरचंदेण इत्थुवमा ॥१२०॥  
 देवेहिं कामदेवो, गिहीवि नवि चालिओ (चाइओ) तवगुणेहिं ।  
 मत्तगयंद-भुयंगम-रक्खसघोरट्टहासेहिं ॥१२१॥  
 भोगे अभुंजमाणावि केइ मोहा पडंति अहरगइं ।  
 कुविओ आहारत्थी, जत्ताइ जणस्स दमगुव्व ॥१२२॥  
 भवसयसहस्सदुल्लहे, जाइजरामरणसागरुत्तारे ।  
 जिणवयणम्मि गुणायर ! खणमवि मा काहिसि पमायं ॥१२३॥  
 जं न लहइ सम्मत्तं, लद्धूणवि जं न एइ संवेगं ।  
 विसयसुहेसु य रज्जइ, सो दोसो रागदोसाणं ॥१२४॥  
 तो बहुगुणनासाणं, सम्मत्तचरित्तगुणविणासाणं ।  
 न हु वसमागंतव्वं, रागदोसाण पावाणं ॥१२५॥  
 नवि तं कुणइ अभित्तो, सुट्ठुवि सुविराहिओ समत्थोऽवि ।  
 जं दोऽवि अणिग्गहिया, करंति रागो अ दोसो अ ॥१२६॥  
 इहलोए आयासं अजसं च करंति गुणविणासं च ।  
 पसवंति अ परलोए, सारीरमणोगए दुक्खे ॥१२७॥  
 धिद्धी अहो अकज्जं, जं जाणंतोऽवि रागदोसेहिं ।  
 फल्लमउलं कडुअरसं, तं चेव निसेवए जीवो ॥१२८॥  
 को दुक्खं पाविज्जा ? कस्स व सुक्खेहिं विम्हओ हुज्जा ? ।  
 को व न लभिज्ज मुक्खं ? रागदोसा जइ न हुज्जा ॥१२९॥  
 माणी गुरुपडिणीओ, अणत्थभरिओ अमग्गचारी य ।  
 मोहं किलेसजालं, सो खाइ जहेव गोसालो ॥१३०॥

कलहण-कोहणसीलो भंडणसीलो विवायसीलो य ।  
 जीवो-निच्चुज्जलिओ, निरत्थयं संयमं चरइ ॥१३१॥  
 जह वणदवो वणं दवदवस्स जलिओ खणेण निदहइ ।  
 एवं कसायपरिणओ, जीवो तवसंजमं देहइ ॥१३२॥  
 परिणामवसेण पुणो, अहिओ ऊणयरओ व हुज्ज खओ ।  
 तहवी ववहारमित्तेण, भण्णइ इमं जहा थूलं ॥१३३॥  
 फरुसवयणेण, दिणतवं, अहिविखवंतो अ हणइ मासतवं ।  
 वरिसतवं सवमाणो, हणइ हणंतो अ सामण्णं ॥१३४॥  
 अह जीविअं निकितइ, हंतूण य संजमं मलं चिणइ ।  
 जीवो पमायबहुलो, परिभमइ अ जेण संसारे ॥१३५॥  
 अक्कोसण-तज्जण-ताडणा य अवमाणहीलणाओ अ ।  
 मुणियो मुणियपरभवा दढप्पहारिव्व विसहंति ॥१३६॥  
 अहमाहओत्ति न य पडिहणंति सत्ताऽवि न य पडिसवंति ।  
 मारिज्जंताऽवि जई; सहंति साहस्समल्लुव्व ॥१३७॥  
 दुज्जणमुहकोदंडा, वयणसरा पुव्वकम्मनिम्माया ।  
 साहूण ते न लग्गा, खंतीफल्यं वहंताणं ॥१३८॥  
 पत्थरेणाहओ कीवो, पत्थरं डक्कुमिच्छइ ।  
 मिगारिओ सरं पप्प, सरुप्पत्ति विमग्गइ ॥१३९॥  
 तह पुठ्ठिं किं न कयं, न बाहए जेण मे समत्थोऽवि ? ।  
 इण्हं किं कस्स व कुप्पिमुत्ति धीरा अणुप्पिच्छ ॥१४०॥  
 अणुराएण जइस्सऽवि, सियायपत्तं पिया धरावेइ ।  
 तहवि य खंदकुमारो, न बंधुपासेहिं पडिबद्धो ॥१४१॥

गुरु गुरुतरो अ अइगुरु, पियभाइ-अवच्च-पियजणसिणेहो ।  
 चिंतिजमाणगुविलो, चत्तो अइधम्मतिस्सिण्हिं ॥१४२॥  
 अमुणियपरमत्थणं बंधुजणसिणेहवइयरो होइ ।  
 अवगयसंसारसहवनिच्छयार्ण समं हिययं ॥१४३॥  
 माया पिया य भाया, भज्जा पुत्ता सुही य नियमय ।  
 इह चेव बहुविहाई, करंति भयवेमणस्साईं ॥१४४॥  
 माया नियमइच्चिगपियम्मि अत्थे अपूरमाणम्मि ।  
 पुत्तस्स कुणइ वसणं, चुलणीं जह वंभदत्तरस ॥१४५॥  
 सव्वंगोवंगविगत्तणाओ जगडणविहेडणाओ अ ।  
 कासी य रज्जत्तिसिओ पुत्ताण पिया कण्यकेज्ज ॥१४६॥  
 विसयसुहरागवसओ, घोरो भायाऽवि भावरं हणइ ।  
 आहाविओ वहत्थं, जह बाहुबल्लिस्स भरहवई ॥१४७॥  
 भज्जाऽवि इंदियविगार-दोसनडिया करेइ पइपावं ।  
 जह सो पणसिराथा सूरियकंताई तह वहिओ ॥१४८॥  
 सासयसुखतरस्सी, नियअंगसमुब्भवेण पियपुत्तो ।  
 जह सो सेणियराया, कोणियरण्णा खयं नीओ ॥१४९॥  
 लुद्धा सकज्जतुरिआ, सुहिणोऽवि विसंवयंति कयकज्जा ।  
 जह चंदगुत्तगुरुण्णं, पन्वयओ घाइओ राया ॥१५०॥  
 निययाऽवि निययकज्जे, विसंवयंतम्मि हुंति खरफरुसा ।  
 जह रामसुमूमकओ, वंभक्खत्तरस आसि खओ ॥१५१॥  
 कुलघरनिययसुहेसु अ, सयणे अ जणे अ निच्च मुणिवसहा ।  
 विहरंति अणिस्साए, जह अज्जमहागिरी भयवं ॥१५२॥

रूवेण जुव्वणेण य कन्नाहि सुहेहिं वरसिरीए य ।  
 न य लुब्भंति सुविहिया, निदरिसणं जंबुनामुत्ति ॥१५३॥  
 उत्तमकुलप्पसूया, रायकुलवडिसगाऽवि मुणिवसहा ।  
 बहुजणजइसंघट्टं, मेहकुमारु व्व विसहंति ॥१५४॥  
 अवरुप्परसंबाहं, सुक्खं तुच्छं सरीरपीडा य ।  
 सारण वारण चोयण, गुरुज्जणआयत्तया य गणे ॥१५५॥  
 इक्कस्स कओ धम्मो ?, सच्छंदगईमईपयारस्स ।  
 किं वा करेइ इक्को ?, परिहरत्त कहं अकज्जं वा ? ॥१५६॥  
 कत्तो सुत्तथागम, पडिपुच्छण चोयणा व इक्कस्स ।  
 विणओ वेयावच्चं, आराहणया य मरणंते ? ॥१५७॥  
 पिल्लिज्जेसणमिक्को, पइन्नपमयाजणाउ निच्च भयं ।  
 काउमणोऽवि अकज्जं, न तरइ काऊण बहुमज्जे ॥१५८॥  
 उच्चार-पासवण-वंतपित्तमुच्छाइमोहिओ इक्को ।  
 सहवभाणविहत्थो, निक्खिस्सवइ व कुणइ उड्डाहं ॥१५९॥  
 एगदिवसेण बहुआ, सुहा य असुहां य जीवपरिणामा ।  
 इक्को असुहपरिणओ, चइज्ज आलंबणं लद्धुं ॥१६०॥  
 सव्वजिणप्पडिकुट्टं, अणवत्था थेरक्कप्पभेओ अ ।  
 इक्को अ सुआउत्तोऽवि हणइ तवसंजमं अइरा ॥१६१॥  
 वेसं जुण्णकुमारिं, पउत्थवइअं च बालविहवं च ।  
 पासंडरोहमसइं, नवतरुणिं थेरमज्जं च ॥१६२॥  
 सविडंकुव्वभडरूवा, दिट्ठा मोहेइ जा मणं इत्थी ।  
 आयहियं चिंतता, दूरयरेणं परिहरंति ॥१६३॥

सम्मद्द्विष्टीवि कयागमोवि अइविसयरागसुहवसओ ।  
 भवसंकडम्मि पविसइ, इत्थं तुह सच्चई नायं ॥१६४॥  
 सुतवस्सियाण पूया, पणाम-सक्कार-विणयकज्जपरो ।  
 बद्धंपि कम्ममसुहं, सिद्धिलेइ दसारनेया व ॥१६५॥  
 अभिगमण-वंदण-नमंसणेण पडिपुच्छणेण साहूणं ।  
 चिरसंचियंऽपि कम्मं, खणेण विरलत्तणमुवेइ ॥१६६॥  
 केइ सुसीला सुहम्माइ सज्जणा गुरुस्सऽवि सुसीसा ।  
 विउलं जणंति सद्धं, जह सीसो चंडरुइस्स ॥१६७॥  
 अंगारजीववहगो, कोई कुगुरु सुसीसपरिवारो ।  
 सुमिणे जईहि दिट्ठो, कोलो गयकलहपरिकिण्णो ॥१६८॥  
 सो उग्गभवसमुद्दे, सयंवरमुवागएहि राएहिं ।  
 करहोवक्खरभरिओ, दिट्ठो पोरणसीसेहिं ॥१६९॥  
 संसारवंचना नवि, गणंति संसारसूअरा जीवा ।  
 सुमिणगएणऽवि केई, बुज्जंति पुप्फचूला वा ॥१७०॥  
 जो अविकलं तवं संजमं च साहू करिज्ज पच्छऽवि ।  
 अन्नियसुयव्व सो नियगमट्टमचिरेणं साहेइ ॥१७१॥  
 सुहिओ न चयइ भोए, चयइ जहा दुक्खिओत्ति अलियमिणं ।  
 चिक्कणकम्मोलित्तो न इमो न इमो परिच्चयई ॥१७२॥  
 जह चयइ चक्कवट्ठी, पवित्थरं तत्तियं मुहुत्तेणं ।  
 न चयइ तथा अहन्नो, दुब्बुद्धी खप्परं दमओ ॥१७३॥  
 देहो पिवीलियाहिं, चिलाइपुत्तस्स चालणी व्व कओ ।  
 तनुओवि मणपओसो, न चालिओ तेण ताणुवरिं ॥१७४॥

पाणञ्चएऽवि पावं, पिवीलियाएऽवि जे न इच्छंति ।  
 ते कह जई अपावा, पावाइँ करंति अन्नस्स ? ॥१७५॥  
 जिणपहअपंडियाणं, पाणहराणंऽपि पहरमाणं ।  
 न करंति य पावाइँ, पावस्स फलं वियाणंता ॥१७६॥  
 वह-मारण-अब्भक्खाण-दाणपरधनविलोवणाईणं ।  
 सव्वजहन्नो उदओ, दसगुणिओ इक्कसि कयाणं ॥१७७॥  
 तिव्वयरे उ पओसे, सयगुणिओ सयसहस्सकोडिगुणो ।  
 कोढाकोडिगुणो वा, हुज्ज विवागो बहुतरो वा ॥१७८॥  
 के इत्थ करंतालंबणं इमं तिहुयणस्स अच्छेरे ।  
 जह नियमा खवियंगी, मरुदेवी भगवई सिद्धा ॥१७९॥  
 किंपि क्किहिपि कयाई, एगे लद्धीहिं केहिऽवि निभेहिं ।  
 पत्तेअबुद्धलाभा, हवंति अच्छेरयब्भूया ॥१८०॥  
 निहिसंपत्तमहन्नो, पत्थितो जह जणो निरुत्तप्पो ।  
 इह नासइ तह पत्तेअबुद्धलद्धि(च्छि)पडिच्छंतो ॥१८१॥  
 सोऊण गइं सुकुमालिए तह ससगभसगभइणीए ।  
 ताव न वीससियव्वं, सेयट्ठी धम्मिओ जाव ॥१८२॥  
 खर-करह-तुरय-वसहा, मत्तगइंदाऽवि नाम दम्मंति ।  
 इक्को नवरि न दम्मइ, निरंकुसो अप्पणो अप्पा ॥१८३॥  
 वरं मे अप्पा दंतो, संजमेण तवेण य ।  
 मांऽहं परेहिं दम्मंतो, बंधणेहिं वहेहि अ ॥१८४॥  
 अप्पा चेव दमेयव्वो, अप्पा हु खलु दुहमो ।  
 अप्पा दंतो सुही होइ, अस्सि लोए परत्थ य ॥१८५॥

निश्चं दोससहगओ जीवो अविरहियमसुहपरिणामो ।  
 नवरं दिन्ने पसेरे, तो देइ पमायमयरेसु ॥१८६॥  
 अञ्चिय वंदिय पूइअ, सक्कारिय पणमिओ सहग्घविओ ।  
 तं तह करेइ जीवो, पाडेइ जहप्पणो ठाणं ॥१८७॥  
 सीलव्वयाइं जो बहुफलाइं हंतूण सुक्खमहिलसइ ।  
 धिइदुब्बलो तवस्सी, कोडीए कागिणिं क्किणई ॥१८८॥  
 जीवो जहामणसियं, हियइच्छियपत्थिअहिं सुक्खेहिं ।  
 तोसेऊण न तिरई, जावज्जीवेण सव्वेण ॥१८९॥  
 सुमिणंतराणुभूयं, सुक्खं समइच्छियं जहा नत्थि ।  
 एवमिमंपि अईयं, सुक्खं सुमिणोवमं होई ॥१९०॥  
 पुरनिद्धमणे जक्खो, महुरामंगू तहेव सुयनिहंसो ।  
 बोहेई सुविहियजणं, विसूरइ बहुं च हियएण ॥१९१॥  
 निगंतूण घराओ, न कओ धम्मो मए जिणक्खाओ ।  
 इड्ढरससायगुरुयत्तणेण न य चेइओ अप्पा ॥१९२॥  
 ओसन्नविहारेणं, हा जह झीणम्मि आउए सव्वे ।  
 किं काहामि अहन्नो संपइ सोयामि अप्पाणं ॥१९३॥  
 हा जीव ! पाव भमिहिसि, जाईजोणीसयाइं बहुयाइं ।  
 भवसयहस्सदुलहंपि जिणमयं एरिसं लद्धुं ॥१९४॥  
 पावो पमायवसओ, जीवो संसारकज्जमुज्जुत्तो ।  
 दुक्खेहिं न निव्विण्णो सुक्खेहिं न चेव परितुट्ठो ॥१९५॥  
 परितप्पिएण तणुओ, साहारो जइ घणं न उज्जमइ ।  
 सेणियराया तं तह, परितप्पंतो गओ नरयं ॥१९६॥

जीवेण जाणि विसज्जियाणि जाईसएसु देहाणि ।  
 थोवेहिं तओ सयलंपि तिहुयणं हुज्ज पडिहत्थं ॥१९७॥  
 नहदंतमंसकेसट्टिएसु जीवेण विप्पमुक्केसु ।  
 तेसुवि हविज्ज कइलासमेरुगिरिसन्निभा कूडा ॥१९८॥  
 हिमवंतमलयमंदरदीवोदहिधरणिसरिसरासीओ ।  
 अहिअयरो आहारो, छुहिण्णाहारिओ होज्जा ॥१९९॥  
 जं णेण जलं पियं, घम्मायवज्जगडिएण तंपि इहं ।  
 सव्वेसुवि अगडतलायनईसमुद्देसु नवि हुज्जा ॥२००॥  
 पीयं थणयच्छीरं, सागरसलिलाओ होज्ज बहुअयरं ।  
 संसारम्मि अगंते, माऊणं अन्नमन्नाणं ॥२०१॥  
 पत्ता य कामभोग, कालमगंतं इहं संउवभोगां ।  
 अप्पुव्वं पिव मन्नई, तहवि य जीवो मणे सुक्खं ॥२०२॥  
 जाणइ अ जहा भोगिड्ढिसंपया सव्वमेव धम्मफलं ।  
 तहवि दढमूढहियओ, पावे कम्मे जणो रमई ॥२०३॥  
 जाणिज्जइ चित्तिज्जइ, जम्मजरा मरणसंभवं दुक्खं ।  
 न य विसएसु विरज्जई, अहो सुबद्धो कवडगंठी ॥२०४॥  
 जाणइ य जह मरिज्जइ, अमरंतंपि हु जरा विणासेई ।  
 न य उव्विगो लोओ, अहो रहस्सं सुनिम्मायं ॥२०५॥  
 दुपयं चउप्पयं बहुपयं च अपयं समिद्धमहणं वा ।  
 अणवकएऽवि कयंतो, हरइ हयासो अपरितंतो ॥२०६॥  
 न य नज्जइ सो दियहो, मरियव्वं चाऽवसेण सव्वेण ।  
 आसापासपरद्धो, न करेइ य जं हियं बज्झो ॥२०७॥

संझरागजलबुबुओवमे, जीविए अ जलबिंदुचंचले ।  
 जुव्वणे य नइवेगसंनिभे, पाव जीव ! किमयं न बुज्झसि ? ॥२०८॥  
 जं जं नज्जइ अस्सुइं, लज्जिज्जइ कुच्छणिज्जमेयंति ।  
 तं तं मग्गइ अंगं, नवरमणंगुत्थ पडिकूलो ॥२०९॥  
 सव्वगहाणं पभवो, महागहो सव्वदोसपायट्ठी ।  
 कामग्गहो दुरप्पा, जेणभिभूयं जगं सव्वं ॥२१०॥  
 जो सेवइ किं लहइ, थामं हारेइ दुव्वलो होइ ।  
 पावेइ वेमणस्सं, दुक्खाणि अ अत्तदोसेणं ॥२११॥  
 जह कच्छुल्लो कच्छुं, कंडुयमाणो दुहं मुणइ सुक्खं ।  
 मोहाउरा मणुस्सा, तह कामदुहं सुहं विति ॥२१२॥  
 विसयविसं हालहलं, विसयविसं उक्कडं पियंताणं ।  
 विसयविसाइन्नंपिव, विसयविसविसूइया होई ॥२१३॥  
 एवं तु पंचहिं आसवेहिं रयमायणित्तु अणुसमयं ।  
 चउगदुहपेरंतं, अणुपरियंढंति संसारे ॥२१४॥  
 सव्वगईपक्खंदे, काहंति अणंतए अकयपुण्णा ।  
 जे य न सुणंति धम्मं, सोऊण य जे पमायंति ॥२१५॥  
 अणुसिद्धा य बहुविहं, मिच्छदिट्ठी य जे नरा अहमा ।  
 बद्धनिकाइयकम्मा, सुणंति धम्मं न य करंति ॥२१६॥  
 पंचेव उज्झिऊणं, पंचेव य रक्खिऊण भावेणं ।  
 कम्म रयविप्पमुक्का, सिद्धिगइमणुत्तरं पत्ता ॥२१७॥  
 नाणे दंसणचरणे, तवसंजमसमिइगुत्तिपच्छित्ते ।  
 दमउस्सग्गववाए, दव्वइअभिग्गहे चेव ॥२१८॥

सदहणायरणाए; निच्चं उज्जुत्त एसणाइ ठिओ ।  
 तस्स भवोअहितरणं, पव्वज्जाए य स म्मं तु ॥२१९॥  
 जे घरसरणसत्ता, छक्कायरिऊ सकिंचणा अजया ।  
 नवरं मुत्तूण घरं, घरसंकमणं कयं तेहिं ॥२२०॥  
 उस्सुत्तमायरंतो, बंधइ कम्मं सुचिक्कणं जीवो ।  
 संसारं च पवट्ठइ, मायामोसं च कुव्वइ य ॥२२१॥  
 जइ गिण्हइ वयलोवो, अहव न गिण्हइ सरीरवुच्छेओ ।  
 पासत्थसंगमोऽविय, वयलोवो तो वरमसंगो ॥२२२॥  
 आलावो संवासो, वीसंभो संथवो पसंगो अ ।  
 हीणायारेहिं समं, सव्वजिणिंदेहिं पडिकुट्ठो ॥२२३॥  
 अन्नुन्नजंपिएहिं हसिउद्धसिएहिं खिप्पमाणो अ ।  
 पासत्थमज्झयारे, बलाऽवि जइ वाउलीहोइ ॥२२४॥  
 लोएऽवि कुसंसग्गीपियं जणं दुन्नियच्छम्मइवसणं ।  
 निंदइ निरुज्जमं पियकुसीलजणमेव साहुजणो ॥२२५॥  
 निच्चं संकिय भीओ गम्मो सव्वस्सु खलियचारित्तो ।  
 साहुजणस्स अवमओ, मओऽवि पुण दुग्गइं जाइ ॥२२६॥  
 गिरिसुअपुप्फसुआणं, सुविहिय ! आहरणकारणविहन्नु ।  
 वज्जेज्ज सीलविगले उज्जुयसीले हविज्ज जई ॥२२७॥  
 ओसन्नचरणकरणं, जइणो वंदंति कारणं पप्प ।  
 जे सुविइयपरमत्था, ते वंदंते निवारंति ॥२२८॥  
 सुविहिय वंदावंतो, नासेई अप्पयं तु सुपहाओ ।  
 दुविहपहविप्पमुक्को, कहमप्प न याणई मूढो ॥२२९॥

वंदइ उभओ कालंपि चेइयाइं थइंथुई परमा ।  
 जिणवरपडिमाघरधूवपुप्फगंधच्चणुज्जुत्तो ॥२३०॥  
 सुविणिच्छियएगमई, धम्मम्मि अनन्नदेवओ अ पुणो ।  
 न य कुसमए स रज्जइ, पुव्वावरबाहियत्थेसु ॥२३१॥  
 दट्ठूण कुलिंणीणं, तसथावरभूयमइणं विविहं ।  
 धम्माओ न चालिज्जइ, देवेहिं सइंदुएहिंपि ॥२३२॥  
 वंदइ पडिपुच्छइ पज्जुवासई साहुणो सययमेव ।  
 पढइ सुणइ गुणेइ अ, जणस्स धम्मं परिकहेइ ॥२३३॥  
 दढसीलव्वयनियमो, पोसहआवस्सएसु अक्खलिओ ।  
 महुमज्जमंसपंचविहबहुबीयफलेसु पडिकंतो ॥२३४॥  
 नाहम्मकम्मजीवी, पच्चक्खाणे अभिक्खमुज्जुत्तो ।  
 सव्वं परिमाणकडं, अवरज्जइ तंपि संकंतो ॥२३५॥  
 निक्खमण-नाण-निव्वाण-जम्मभूमीउ वंदइ जिणाणं ।  
 न य वसइ साहुजणविरहियम्मि देसे बहुगुणेऽवि ॥२३६॥  
 परतित्थियाण पणमण, उब्भावण धुगण भत्तिरागं च ।  
 सक्कारं सम्माणं, दाणं विणयं च वज्जेइ ॥२३७॥  
 पढं जईण दाऊण, अप्पणा पणमिऊण पारेइ ।  
 असई अ सुविहिआणं, भुंजई कयदिसालोओ ॥२३८॥  
 साहूण कप्पणिज्जं, जं नवि दिन्नं कहिंपि किंचि तहिं ।  
 धीरा जहुत्तकारी, सुसावगा तं न भुंजंति ॥२३९॥  
 वसही-सयणासण-भत्त-पाणभेसज्जवत्थपत्ताइं ।  
 जइऽवि न पज्जत्तधणो थोवाऽविहु थोवयं देई ॥२४०॥

संवच्छरचाउम्मासिएसु अट्टाहियासु अ तिहीसु ।  
 सव्वायरेण लग्गइ जिणवरपूयातवगुणेसु ॥२४१॥  
 साहूण चेइयाण य पडिणीयं तह अवण्णवायं च ।  
 जिणपवयणस्स अहिअं, सव्वत्थामेण वारेई ॥२४२॥  
 विरया पाणिवहाओ, विरया निच्चं च अलियवयणाओ ।  
 विरया चोरिक्काओ, विरया परदारगमणाओ ॥२४३॥  
 विरया परिग्गहाओ, अपरिमिआओ अणंततण्हाओ ।  
 बहुदोससंकुलाओ, नरयगइगमणपंथाओ ॥२४४॥  
 मुक्का दुज्जणमिप्पि, गहिया गुरुवयणसाहूपडिवत्ती ।  
 मुक्को परपरिवाओ गहिओ जिणदेसिओ धम्मो ॥२४५॥  
 तवनियमसीलकलियां, सुसावगा जे हवंति इह सुगुणा,  
 तेसिं न दुल्लहाइं, निव्वाणविमाणमुक्खाइं ॥२४६॥  
 सीइज्ज कयावि गुरु, तंपि सुसीसा सुनिउणमहुरेहिं ।  
 मग्गे ठवंति पुणरवि, जह सेलगपंथगो नायं ॥२४७॥  
 दस दस दिवसे दिवसे, धम्मे बोहेइ अँहव अहिअयरे ।  
 इअ नंदिसेणसत्ती, तहविय से संजमविवत्ती ॥२४८॥  
 कलुसीकओ अ किट्टिकओ अ खयरीकओ मलिणिओ अ ।  
 कम्मेहिं एस जीवो, नाऊणऽवि मुज्झई जेण ॥२४९॥  
 कम्मेहिं वज्जसारोवमेहिं जउनंदणोऽवि पडिबुद्धो ।  
 सुबहुंपि विसूरंतो, न तरइं अप्पक्खमं काउं ॥२५०॥  
 वांससहरसंऽपि जई, काऊणं संजमं सुविउलंपि ।  
 अंतं किलिट्ठभावो, न विसुज्झइ कंडरीउ व्व ॥२५१॥

अप्पेणऽवि कालेणं, केइ जहागहियसीलसामण्णा ।  
 साहंति निययकज्जं, पुंडरियमहारिसिन्व जहा ॥२५२॥  
 काऊण संकिलिट्ठं, सामण्णं दुल्लहं विसोहिपयं ।  
 मुज्झिज्जा एगयरो, करिज्ज जइ उज्जमं पच्छ ॥२५३  
 उज्झिज्ज अंतरि च्चिय, खंडिय सबलादड व्व हुज्ज खणं ।  
 ओसन्नो सुहलेहड न तरिज्ज व पच्छ उज्जमिउं ॥२५४॥  
 अवि नाम चक्कवट्टी, चइज्ज सव्वंपिं चक्कवट्टिसुहं ।  
 न य ओसन्नविहारी, दुहिओ ओसन्नयं चयई ॥२५५॥  
 नरयत्थो ससिराया, बहु भणई देहललणासुहिओ ।  
 पडिओ मि भए भाउअ ! तो मे जाएह तं देहं ॥२५६॥  
 को तेण जीवरहिण्ण, संपयं जाइएण हुज्ज गुणो ? ।  
 जइऽसि पुरा जायंतो, तो नरए नेव निवडंतो ॥२५७॥  
 जावाऽऽउ सावसेसं, जाव य थोवोऽवि अत्थि ववसाओ ।  
 ताव करिःज्जपहिय, मा ससिराया व सोइहिसि ॥२५८॥  
 विचूणऽवि सामण्णं, संजमजोगेसु होइ जो सिढिले ।  
 पडइ जई वयणिज्जे सोअइ अ गओ कुदेवत्तं ॥२५९॥  
 मुच्चा ते जिअलोए, जिणवयणं जे नरा न याणंति ।  
 मुच्चाणवि ते मुच्चा, जे नाऊणं नवि करेंति ॥२६०॥  
 दावेऊण धणनिहिं, तेसिं उप्पाडियाणि अच्छीणि ।  
 नाऊणऽवि जिणवयणं, जे इह विहलंति धम्मधणं ॥२६१॥  
 ठागं उच्चुच्चयरं, मज्झं हीणं च हीणतरगं वा ।  
 जेण जहिं गंतव्वं, चिट्ठाऽवि से तारिसी होई ॥२६२॥

जस्स गुरुम्मि परिभवो, साहूसु अणायरो खमा तुच्छा ।  
धम्मे य अणहिल्लसो, अहिल्लसो दुग्गईए उ ॥२६३॥  
सारीरमाणसाणं, दुक्खसहस्साण वसणपरिभीया ।  
नाणंकुसेग मुणिणो, रागगइदं निरुंभंति ॥२६४॥  
सुग्गइमग्गपईवं, नाणं दिंतस्स हुज्ज किम्भदेयं ? ।  
जह तं पुल्लिदएणं, दिन्नं सिवगस्स नियगच्छि ॥२६५॥  
सिंहासणे निसणं सोवागं सेगिओ नरवारिंदो ।  
विज्जं मग्गइ पयओ, इअ साहुजणस्स सुअविणओ ॥ २६६॥  
विज्जाए कासवसंतिआए दगसूअरी सिरिं पत्तो ।  
पडिओ मुसं वयंतो, सुअनिण्हवणा इय अपत्था ॥२६७॥  
सयलम्मिऽवि जियलोए, तेण इहं घोसिओ अमाघाओ ।  
इक्कंऽपि जो दुहत्तं, सत्तं बोहेइ जिणवयणे ॥२६८॥  
सम्मत्तदायगाणं, दुप्पडियारं भवेसु बहुएसु ।  
सव्वगुग्गमेलियाहिऽवि, उवयारसहस्सकोडीहिं ॥२६९॥  
सम्मत्तम्मि उ लद्धे, ठइयाइं नरयतिरियदाराइं ।  
दिव्वाणि माणुसाणि य मोक्खसुहाइं सहीणाइं ॥२७०॥  
कुसमयसुइण महणं, सम्मत्तं जस्स सुट्ठियं हियए ।  
तस्स जगुज्जोयकरं, नागं चरणं च भवमहणं ॥२७१॥  
सुपरिच्छियसम्मत्तो, नाणेणालोइयऽत्थसव्वभावो ।  
निव्वणचरणाउत्तो, इच्छियमत्थं पसाहेइ ॥२७२॥  
जहं मूलताणए पंडुरम्मि दुव्वण्णरागवण्णेहिं ।  
बीभच्छ पडसोहा, इय सम्मत्तं पमाएहिं ॥२७३॥

नरएसु सुरवरेसु य, जो बंधइ सागरोवमं इक्कं ।  
 पलिओवमाण बंधइ, कोडिसहस्साणि दिवसेण ॥२७४॥  
 पलिओवमसंखिज्जं, भागं जो बंधई सुरगणेसु ।  
 दिवसे दिवसे बंधइ, स वासकोडी असंखिज्जा ॥२७५॥  
 एस कमो नरएसुऽवि, बुहेण नाऊण नाम एयंमि ।  
 धम्मम्मि कह पमाओ, निमेसमित्तंपि कायव्यो ! ॥२७६॥  
 दिव्वालंकारविभूसणाइं रयणुज्जलाणि य घराइं ।  
 रूवं भोगसमुदओ; सुरलोगसमो कओ इहयं ? ॥२७७॥  
 देवाण देवलोए जं सुक्खं तं नरो सुभणिओऽवि ।  
 न भणइ वाससएणऽवि जस्सऽवि जीहासयं हुज्जा ॥२७८॥  
 नरएसु जाइं अइकक्खडाइं दुक्खाइं परमतिक्खाइं ।  
 को वण्णेही ताइं ?, जीवंतो वासकोडीऽवि ॥२७९॥  
 कक्खडदाह सामलिअसिबणवेयरणिपहरणसएहिं ।  
 जा जायणाउ पावंति, नारया तं अहम्मफलं ॥२८०॥  
 तिरिया कसंकुसारानिवायवहबंधमारणसयाइं ।  
 नऽवि इहयं पावंता, परत्थ जइ नियमिया हुंता ॥२८१॥  
 आजीव संकिलेसो, सुक्खं तुच्छं उवद्वा बहुया ।  
 नीयजणसिट्ठणावि य, अणिट्ठवासो अ माणुस्से ॥२८२॥  
 चारगनिरोहवहबंधरोगधणहरणमरणवसणाइं ।  
 मणसंतावो अजसो, विग्गोवणया य माणुस्से ॥२८३॥  
 चिंतासंतावेहि य, दरिदरूआहिं दुप्पउत्ताहिं ।  
 लद्धूणऽवि माणुस्सं, मरंति केई सुनिच्चिण्णा ॥२८४॥

देवाऽवि देवलोए, दिव्वाभरणाणुरंजियसरीरा ।  
 जं परिवडंति तत्तो, तं दुक्खं दारुणं तेसिं ॥२८५॥  
 तं सुरविमाणविभवं, चितिय चवगं च देवलोगाओ ।  
 अइबलियं चिय जं नवि, फुट्टइ सयसक्करं हिहयं ॥२८६॥  
 ईसा-विसाय-मय-कोह-माया-लोभेहिं एवमाईहिं ।  
 देवाऽवि समभिभूया, तेसिं कत्तो सुहं नाम ? ॥२८७॥  
 धम्मंपि नाम नाऊण, कीस पुरिसा सहंति पुरिसाणं ? ।  
 सामित्ते साहीगे, को नाम करिज्ज दासत्तं ? ॥२८८॥  
 संसारचारए चारए व्व आवीलियस्स बंधेहिं ।  
 उव्विगगो जस्स मगो, सो किर आसन्नसिद्धिपहो ॥२८९॥  
 आसन्नकालभवसिद्धियस्स जीवस्स लक्खणं इणमो ।  
 विसयसुहेसु न रज्जइ, सव्वत्थामेसु उज्जमइ ॥२९०॥  
 हुज्ज व न व देहबलं, धिइमइसत्तेण जइ न उज्जमसि ।  
 अत्तिहिसि चिरं कालं, ब्रलं च कालं च सोअंतो ॥२९१॥  
 लद्धिल्लियं च बोहिं, अकरितोऽणागयं च पत्थितो ।  
 अन्नं दाइं बोहिं, लब्भिसि कयरेण मुल्लेण ? ॥२९२॥  
 संघयण-काल-बल-दूसमारुयालंबणाइं धित्तूणं ।  
 सव्वं चिय नियमधुरं, निरुज्जमाओ पमुच्चंति ॥२९३॥  
 कालस्स य परिहाणी, संजमजोगाइं नत्थि खित्ताइं ।  
 जयणाइ वट्टियव्वं नहु जयणा भंजए अंगं ॥२९४॥  
 समिई-कसाय-गारव-इंदिय-मयबंभचेरगुत्तीसु ।  
 सज्जायविणयतवसत्तिओ अ जयणा सुणिहियाणं ॥२९५॥

जुगमित्तंतरदिट्टी, पयं पयं चक्खुणा विसोहितो ।  
 अव्वक्खित्ताउत्तो, इरियासमिओ मुणी होई ॥२९६॥  
 कज्जे भासइ भासं, अणवज्जमकारणे न भासइ य ।  
 विगह्विसुत्तियपरिवज्जिओ अ जइ भासणासमिओ ॥२९७॥  
 बायालमेसणाओ, भोयणदोसे य पंच सोहेइ ।  
 सो एसणाइसमिओ, आजीवी अन्नहा होइ ॥२९८॥  
 पुर्व्वि चक्खु परिवक्खय, पमज्जिउं जो ठवेइ गिण्हइ वा ।  
 आयाणभंडनिकखवणाइ समिओ मुणी होइ ॥२९९॥  
 उच्चारपासवणखेलजल्लसिघाणए य पाणविही ।  
 सुविवेइए पएसे, निसिरंतो होइ तस्समिओ ॥३००॥  
 कोहो माणो माया, लोभो हासो रई य अरई य ।  
 सोगो भयं दुगुंछा, पच्चक्खकली इमे सव्वे ॥३०१॥  
 कोहो कलहो खारो, अवरुप्परमच्छरो अणुसओ अ ।  
 चंडत्तणमणुवसमो, तामसभावो अ संतावो ॥३०२॥  
 निच्छोडण निब्भंछण निराणुवत्तित्तणं असंवासो ।  
 कयनासो अ असम्मं, बंधइ घणच्चिक्कणं कम्मं ॥३०३॥ युग्मम् ॥  
 माणो मयऽहंकारो, परपरिवाओ अ अत्तउक्करिसो ।  
 परपरिभवोऽवि य तहा, परस्स निंदा असूआ य ॥३०४॥  
 हीला निरुवयारित्तणं निरवणामया अविणओ अ ।  
 परगुणपच्चज्जयगया, जीवं पाडंति संसारे ॥३०५॥ युग्मम् ॥  
 माया कुडंग पच्चन्नपावया कूड कवड वंचणया ।  
 सव्वत्थ असव्वभावो, परनिक्खेवावहारो अ ॥३०६॥

छल छोम संवइयरो, गूढायारत्तणं मई कुडिला ।  
 वीसंभघायणं पिय भवकोडिसएसुविनडंति ॥३०७॥ युगमम् ॥  
 लोभो अइसंचयसीलया य किलिट्टत्तणं अइममत्तं ।  
 कप्पन्नमपरिभोगो. नट्टविनट्टे य आगल्लं ॥३०८॥  
 मुच्छा अइबहुधणलोभया य तच्चभावभावणा य सया ।  
 बोलंति महाघोरे,, जरमरणमहासमुद्धंमि ॥३०९॥ युगमम् ॥  
 एसु जो न वट्टिज्जा (वट्टे), तेणं अप्पा जहट्टिओ नाओ ।  
 मणुआण माणणिज्जो, देवाणवि देवयं हुज्जा ॥३१०॥  
 जो भासुरं मुअंगं, पयंडदाढाविसं विघट्टेइ ।  
 तत्तो चिय तस्संतो रोसमुअंगोवमाणमिणं ॥३११॥  
 जो आगलेइ मत्तं, कयंतकालोवमं वणगइंदं ।  
 सो तेणं चिय छुज्जइ, माणंगइंदेण इत्थुवमा ॥३१२॥  
 विसवल्लिमहागहणं, जो पविसइ साणुवायफरिसविसं ।  
 सो अचिरेण विणस्सइ, माया विसवल्लिगहणसमा ॥३१३॥  
 घोरे भयागरे सागरम्मि तिमिमगरगाहपडरम्मि ।  
 जो पविसइ सो पविसइ, लोभमहासागरे भीमे ॥३१४॥  
 गुणदोसबहुविसेसं, पयं पयं जाणिऊण नीसेसं ।  
 दोसेसु जगो न विरज्जइत्ति कम्माण अहिगारो ॥३१५॥  
 अट्टट्टहासकेलीकिलत्तणं हासखिड्डुजमगरुई ।  
 कंदप्पं उपहसंगं, परस्स न करंति अगगारा ॥३१६॥  
 साहूणं अप्परुइ, ससरीरपलोअणा तवे अरई ।  
 सुत्थिअवन्नो अइपहरिसो य नत्थी सुसाहूणं ॥३१७॥

उव्वेयओ अ अरणामओ अ अरमंतिया य अरई य ।  
 कलिमलओ अ अणगगया य कत्तो सुविहियाणं ? ॥३१८॥  
 सोगं संतावं अधिइ च मनुं च वेमणस्सं च ।  
 कारुन्न रुन्नभावं, न साहु धम्मम्मि इच्छंति ॥३१९॥  
 भयसंखोहविसाओ, मग्गविभेओ विभीसियाओ अ ।  
 परमग्गदंसगाणि य, दढधम्मगं कओ हुंति ? ॥३२०॥  
 कुच्छा चिलीणमलसंकडेसु उव्वेयओ अणिट्टेसु ।  
 चक्खुनियत्तणमसुभेसु नत्थि दव्वेसुं दंताणं ॥३२१॥  
 एयंपि नाम नाऊग, मुञ्जियव्वंति नूण जीवस्स ।  
 फेडेऊण न तीरंइ, अइबलिओ कम्मसंघाओ ॥३२२॥  
 जह जह बहुस्सुंओ सम्मओ अ सीसगणसंपरिवुडो अ ।  
 अविणिच्छिओ अ समए, तह तह सिद्धंतपडिणीओ ॥३२३॥  
 पवराइं वत्थपायासणोवगरणाइं एस विभवो मे ।  
 अविय महाजणनेया, अहंति अह इडिडगारविओ ॥३२४॥  
 अरसं विरसं ल्हं जहोववन्नं च निच्छए भुत्तुं ।  
 निद्धाणि पेसलाणि य, मग्गइ रसगारवे गिद्धो ॥३२५॥  
 सुस्सूसई सरीरं, सयणासणवाहणापंसगपरो ।  
 सायागारवगुरुओ दुक्खस्स न देइ अप्पाणं ॥३२६॥  
 तवकुल्लजयाभंसो, पंडिच्चप्फंसणा अणिट्टपहो ।  
 वसणाणि रणमुहाणि य, इंदियवसगा अणुहवंति ॥३२७॥  
 सहेसु न रंजिज्जा, रूवं दट्ठुं पुणो न इक्खिज्जा ।  
 गंधे रसे अ फासे, अमुच्छिओ उज्जमिज्ज मुणी ॥३२८॥

निहयाणि ह्याणि य इंदिआणि घाएहऽणं पयत्तेणं ।  
 अहियत्थे निहयाइं, हियकज्जे पूयणिज्जाइं ॥३२९॥  
 जाइकुलरूवबलसुअतवलाभिस्सरिय अट्टमयमत्तो ।  
 एयाइं चिय बंधइ, असुहाइं बहुं च संसारे ॥३३०॥  
 जाईए उत्तमाए, कुले पहाणम्मि रूवमिस्सरियं ।  
 बलविज्जा य तवेण य, लाभमएणं च जो विसे ॥३३१॥  
 संसारमणवयगं, नीयट्टाणाइं पावमाणो य ।  
 भमइ अणंतं कालं, तम्हा उ मए विवज्जिज्जा ॥३३२॥ युग्मम ॥  
 सुट्ठुंऽपि जई जयंतो, जाइमयाईसु मज्जई जो उ ।  
 सो मेअज्जरिसि जहा, हरिएसबलु व्व परिहाई ॥३३३॥  
 इत्थिपसुसंकिलिट्ठं, वसहिं इत्थीकहं च वज्जंतो ।  
 इत्थिजणसंनिसिज्जं, निरूवणं अंगुवंगाणं ॥३३४॥  
 पुव्वरयाणुस्सरणं, इत्थीजणविरहरूवविलवं च ।  
 अइबहुअं अइबहुसो; विवज्जयंतो अ आहारं ॥३३५॥  
 वज्जंतो अ विभूसं, जइज्ज इह ब्रंभचेरगुत्तीसु ।  
 साहू तिगुत्तिगुत्तो, निहुओ दंतो पसंतो अ ॥३३६॥ त्रिभिर्विशेषकम ॥  
 गुज्झोरूवयणकक्खोरुअंतरे तह थणंतरे दट्ठुं ।  
 साहरइ तओ दिट्ठिं, न य बंधइ दिट्ठिए दिट्ठिं ॥३३७॥  
 सज्झाएण पसत्थं, ज्ञाणं जाणइ य सव्वपरमत्थं ।  
 सज्झाए वट्ठंतो, खणे खणे जाइ वेरगं ॥३३८॥  
 उद्धमहतिरियलोए, जोइसवेमाणिया य सिद्धी य ।  
 सव्वो लोगालो गो, सज्झायविउस्स पक्खो ॥३३९॥

जो निञ्चकाल तवसंजमुञ्जओ नवि करेइ सञ्जायं ।  
 अलसं सुहसीलजणं, नवि तं ठावेइ साहुपए ॥३४०॥  
 विणओ सासगे मूलं, विणीओ संजओ भवे ।  
 विणयाओ विप्पमुक्कस्स, कओ धम्मो कओ तवो ? ॥३४१॥  
 विणओ आवहइ सिरिं, ल्हइ विणीओ जसं च किंत्ति च ।  
 न कयाइ दुव्विणीओ, सकज्जसिद्धि समाणेइ ॥३४२॥  
 जह जह खमइ सरीरं, धुवजोगा जह जहा न हायंति ।  
 कम्मक्खओ अ विउलो, विवित्तया इंदियदमो अ ॥३४३॥  
 जइ ता असक्कणिज्जं, न तरसि काऊण तो इमं कीस ।  
 अप्पायत्तं न कुणसि, संजमजयणं जईजोगं ? ॥३४४॥  
 जायम्मि देहसंदेहयम्मि जयणाइ किचि सेविज्जा ।  
 अह पुण सज्जो अ निरुज्जमो अ तो संजमो कत्तो ? ॥३४५॥  
 मा कुणउ जइ तिगिच्छं, अहियासेऊण जइ तरइ सम्मं ।  
 अहियासितस्स पुणो, जइ से जोगा न हायंति ॥३४६॥  
 निञ्चं पवयणसोहाकरण चरणुज्जुआण साहूणं ।  
 संविग्गविहारीणं, सच्चपयत्तेण कायव्वं ॥३४७॥  
 हीणस्सऽवि सुद्धपरूवगस्स नाणाहियस्स कायव्वं ।  
 जणचित्तग्गहणत्थं, करिंत्ति लिगावसेसेऽवि ॥३४८॥  
 दगपाणं पुप्फफलं, अणेसणिज्जं गिहत्थकिञ्चाइं ।  
 अजया पडिसेवंती, जइवेसविडंबगा नवरं ॥३४९॥  
 ओसन्नया अबोही, पवयणउच्चभावणा य बोहिफलं ।  
 ओसन्नोऽवि वरंपिहु पवयणउच्चभावणापरमो ॥३५०॥

गुणहीगो गुणरयणायरेसु जो कुणइ तुल्लमप्पाणं ।  
 सुत्तवस्सिगो अ हीलइ, सम्मत्तं कोमलं तस्स ॥३५१॥  
 ओसन्नस्स गिहिस्स व, जिणपवयणतिव्वभावियमइस्स ।  
 कीरइ जं अणवज्जं, दढसम्मत्तस्सऽवत्थासु ॥३५२॥  
 पासत्थोसन्नकुसीलनीयसंसत्तजणमहाच्छंदं ।  
 नाऊण तं सुविहिया, सब्वपयत्तेण वज्जंति ॥३५३॥  
 बायाल्लमेसणाओ, न रक्खई धाइसिज्जपिंडं च ।  
 आहारेई अभिक्खं, विगईओ सन्निहिं खाई ॥३५४॥  
 सूरप्पमाणभोजी, आहारेई अभिक्खमाहारं ।  
 न य मंडलीइ मुंजइ, न य भिक्खं हिंडई अलसो ॥३५५॥  
 कीवो न कुणइ लोअं, लज्जई पडिमाइ जल्लमवणेइ ।  
 सोवाहणो अ हिंडइ, बंधइ कडिपट्टयमकज्जे ॥३५६॥  
 गामं देसं च कुलं, ममायए पीठ-फलग-पडिबद्धो ।  
 घरसरणेसु पसज्जइ, विहरइ य सक्किंचणो रिक्को ॥३५७॥  
 नहदंतकेसरोमे, जमेइ उच्छोलोधोअणो अजवो ।  
 वाहेइ य पलियंकं, अइरेगपमाणमत्थुरइ ॥३५८॥  
 सोवइ य सब्वराइं, नीसट्टमचेयणो न वा झरइ ।  
 न पमज्जंतो पविसइ, निसिहीयावस्सियं न करे ॥३५९॥  
 पाय पहे न पमज्जइ, जुगमायाए न सोहए इरियं ।  
 पुढवी-दग-अगणि-मारुअ-वणस्सइ-तसेसु निरविक्खो ॥३६०॥  
 सव्वं थोवं उवहिं, न पेहए न य करेइ सज्जायं ।  
 सइकरो, झंझकरो, लहुओ गणभेयतत्तिलो ॥३६१॥

खित्ताईयं भुंजइ, कालाईयं तहेव अविदिन्नं ।  
 गिण्हइ अगुइयसूरे, असगाई अहव उवगरणं ॥३६२॥  
 ठवणकुले न ठवेई, पासत्थेहिं च संगयं कुणई ।  
 निच्चमवज्जाणरओ, न य पेहपमज्जणासीलो ॥३६३॥  
 रीयइ य दवदवाए, मूढो परिभवइ तहय रायणिण ।  
 परपरिवायं गिण्हई, निट्ठुरभासी विगहसीलो ॥३६४॥  
 विज्जं मंतं जोगं, तेगिच्छं कुणइ भूइकम्मं च ।  
 अक्खरनिमित्तजीवी, आरंभपरिग्गहे रम्मइ ॥३६५॥  
 कज्जेण विणा उग्गहमगुजाणावेइ दिवसओ सुअइ ।  
 अज्जियलाभं भुंजइ, इत्थिनिसिज्जासु अभिरमइ ॥३६६॥  
 उच्चारे पासवणे, खेले सिंघाणए अणाउत्तो ।  
 संथारग उवहीणं, पडिक्कमइ वा सपाउरणो ॥३६७॥  
 न करेइ पहे जयणं, तलियाणं तह करेइ परिभोगं ।  
 चरइ अणुबद्धवासे, सपक्खपरपक्खओमाणे ॥३६८॥  
 संजोअइ अइबहुअं, इंगाल सधूमगं अणट्टाए ।  
 भुंजइ रूवबलट्टा न धरेइ अ पायपुंछणयं ॥३६९॥  
 अट्टम छट्ट चउत्थं, संवच्छर चाउमास पक्खेसु ।  
 न करेइ सायबहुलो, न य विहरइ मासकप्पेणं ॥३७०॥  
 नीयं गिण्हइ पिंडं, एगागी अच्छए गिहत्थकहो ।  
 पावसुआगि अहिज्जइ, अहिगारो लोगगहणम्मि ॥३७१॥  
 परिभवइ उग्गकारी, सुद्धं मग्गं निगूहए बालो ।  
 विरहइ सायागुरुओ, संजमविगालेसु खित्तेसु ॥३७२॥

परिभवइ उगगकारी, सुद्धं मगं निगूहए बालो ।  
 विहरइ सायागुरुओ, संजमविगलेसु खित्तेसु ॥३७२॥  
 उग्गाइ गाइ हसई, असंवुडो सइ करेइ कंदप्पं ।  
 गिहिकज्जचित्तगोऽविय, ओसन्ने देइ गिण्हइ वा ॥३७३॥  
 धम्मकहाओ अहिज्जइ, घरा घरं भंमइ परिकहंतो अ ।  
 गणणाइ पमागेण य, अइरित्तं वहइ उवगरणं ॥३७४॥  
 बारस बारस तिण्णिय, काइयउच्चारकालभूमीओ ।  
 अंतो बहिं च अहियासि अगहियासे न पडिलेहे ॥३७५॥  
 गीयत्थं संविग्गं, आयरिअं मुअइ वलइ गच्छस्स ।  
 गुरुणो य अणापुच्छ, जं किंचिवि देइ गिण्हइ वा ॥३७६॥  
 गुरुपरिभोगं भुंजइ, सिज्जासंशारउवकरणजायं ।  
 किन्तिय तुमंति भासई, अविणीओ गन्विओ लुद्धो ॥३७७॥  
 गुरुपच्चक्खाणगिलाणसेहबालाउल्लस्स गच्छस्स ।  
 न करेइ नेव पुच्छइ, निद्धम्मो लिंगमुवजीवी ॥३७८॥  
 पहगमण-वसहि-आहार-सुयण-थंडिहिविहिपरिट्ठवणं ।  
 नायरइ नेव जाणइ, अज्जावट्टावगं चेव ॥३७९॥  
 सच्छंदगमणउट्टाणसोअणो अप्पणेण चरणेण ।  
 समणगुणमुक्कजोगी, बहुजीवखयंकरो भमइ ॥३८०॥  
 वत्थिव्व वायपुण्णो, परिभमई जिणमयं अयाणंतो ।  
 थद्धो निव्विन्नागो, नय पिच्छइ कंचि अप्पसमं ॥३८१॥  
 सच्छंदगमणउट्टाणसोअणो भुंजई गिहीणं च ।  
 पासत्थाइट्टाणा, हवंति एमाइया एए ॥३८२॥

जो हुज्ज उ असमत्थो, रोगेण व पिङ्गिओ झरियदेहो ।  
सव्वमवि जहाभणियं, कयाइ न तरिज्ज काउं जे ॥३८३॥  
सोऽविय निययपरक्कमववसायधिईबलं अगूहंतो ।  
मुत्तूण कूडचरियं, जई जयंतो अवरस जई ॥३८४॥ युग्मम् ॥  
अलसो सढोऽवलित्तो, आलंबणतप्परो अइपमाई ।  
एवंठिओऽवि मन्नई, अप्पाणं सुट्ठिओम्हि त्ति ॥३८५॥  
जोऽवि य पाडेऊणं, मायामोसेहिं खाइ मुद्धजणं ।  
तिग्गाममज्झवासी, सो सो सोअइ कवडखवंगु व्व ॥३८६॥  
एगागी पासत्थो, सच्छंदो ठाणवासि ओसन्नो ।  
दुग्गमाईसंजोगा, जह बहुआ तह गुरू हुंति ॥३८७॥  
गच्छन्नाओ अणुओगी, गुरूसेवी अनियओ गुणाउत्तो ।  
संजोएण पयाणं, संजमआराहगा भणिया ॥३८८॥  
निम्ममा निरहंकारा, उवउत्ता नाणदंसणचरित्ते ।  
एगखि त्तेऽवि ठिया, खवंति पोराणयं कम्मं ॥३८९॥  
जियकोहमाणमाया, जियलोहपरीसहा य जे धीरा ।  
वुड्ढावासेऽवि ठिया, खवंति चिरसंचियं कम्मं ॥३९०॥  
पंचसमिया तिगुत्ता, उज्जुत्ता संजमे तवे चरणे ।  
वाससयंपि वसंता, मुणिणो आराहगा भणिया ॥३९१॥  
तम्हा सव्वाणुत्ता, सव्वनिसेहो य पवयणे नत्थि ।  
आयं वयं तुलिज्जा, लाहाकंखि व्व वाणियओ ॥३९२॥  
धम्मम्मि नत्थि माया, न य कवडं आणुवत्तिभणियं वा ।  
फुडपागडमकुडिहं, धम्मवयणमुज्जुयं जाण ॥३९३॥

नवि धम्मस्स भडक्का, उक्कोढा वंचणा व कवडं वा ।  
 निच्छमो किर धम्मो सदेवमणुआसुरे लोए ॥३९४॥  
 भिक्खू गीयमगीए, अभिसए तहय चेव रायणिए ।  
 एवं तु पुरिसवत्थुं, दव्वाइ चउव्विहं सेसं ॥३९५॥  
 चरणाइयारो दुविहो, मूलगुणे चेव उत्तरगुणे य ।  
 मूलगुणे छट्ठाणा, पढमो पुण नवविहो तत्थ ॥३९६॥  
 ससुक्कोसो मज्झिम जहन्नओ वा भवे चउद्धा उ ।  
 उत्तरगुणऽणेगविहो, दंसणनाणेसु अट्टऽट्ट ॥३९७॥  
 जं जयइ अगीयत्थो, जं च अगीयत्थनिस्सिओ जयइ ।  
 वट्टावेइ य गच्छं, अणंतसंसारिओ होइ ॥३९८॥  
 कह उ ? जयंतो सांहु, वट्टावेई य जो उ गच्छं तु ।  
 संजमजुत्तो होउं, अणंतसंसारिओ होइ ? ॥३९९॥  
 दव्वं खित्तं कालं, भावं पुरिस पडिसेवणाओ य ।  
 नवि जाणइ अग्गीओ, उस्सग्गववाइयं चेव ॥४००॥  
 जह्ठियदव्व न याणइ, सच्चित्तचिन्तमीसियं चेव ।  
 कप्पाकप्पं च तथा, जुगं वा जस्स जं होई ॥४०१॥  
 जह्ठियखित्त न जाणइ, अद्धाणे जणवए अ जं भणियं ।  
 कालंपि अ नवि जाणइ, सुभिक्खदुभिक्ख जं कप्पं ॥४०२॥  
 भावं हट्टगिलाणं, नवि याणइ गाढऽगाढवप्पं च ।  
 सह्हुअसह्हुपुरिसरूवं, वत्थुमवत्थुं च नवि जाणे ॥४०३॥  
 पडिसेवणा चउद्धा, आउट्टिपमायदप्पकप्पेसु ।  
 नजाणइ अग्गीओ, पच्छित्तं चेव जं तत्थ ॥४०४॥

जह नाम कोइ पुरिसो, नयणविहूणो अदेसकुसलो य ।  
कंताराडविभीमे, मग्गपणट्टस्स सत्थस्य ॥४०५॥  
इच्छइ य देसियत्तं, किं सो उ समत्थ देसियत्तस्स ? ।  
दुग्गाइँ अयागंतो, नयणविहूणो कहं देसे ? ॥४०६॥ युग्मम् ॥  
एवमगीयत्थोऽविहु, जिणवयणपईवचक्खुपरिहीणो ।  
दब्बाइँ अयागंतो, उस्सग्गववाइयं चेव ॥४०७॥  
कह सो जयउ अगीओ ? कह वा कुणऊ अगीयनिस्साए ? ।  
कह वा करे उ गच्छं ? सबालवुद्धाउलं सो उ ॥४०८॥  
सुत्ते य इमं भणियं, अप्पच्छित्ते य देइ पच्छित्तं ।  
पच्छित्ते अइमत्तं, आसायण तस्स महई उ ॥४०९॥  
आसायण मिच्छत्तं, आसायणवज्जणा उ सम्मत्तं ।  
आसायणानिमित्तं, कुव्वइ दीहं च संसारं ॥४१०॥  
एए दोसा जम्हा, अगीय जयंतस्सऽगीयनिस्साए ।  
वट्ठावय गच्छस्स य, जो अ गणं देयगीयस्स ॥४११॥  
अबहुस्सुओ तवस्सी, विहरिउकामो अजाणिऊण पंहं ।  
अवराहपयसयाइं, काऊणवि जो न याणेइ ॥४१२॥  
देसियराइयसोहिय, वयाइयारे य जो न याणेइ ।  
अविसुद्धस्स न वड्ढइ, गुणसेढी तत्तिया ठाइ ॥४१३॥ युग्मम् ॥  
अप्पागमो किलिस्सइ, जइवि करेइ अइदुक्करं तु तवं ।  
सुंदरबुद्धीइ कयं, बहुयंपि न सुंदरं होई ॥४१४॥  
अपरिच्छिन्नसुयनिहसस्स केवल्लमभिन्नसुत्तचारिस्स ।  
सव्वुज्जमेणऽवि कयं, अन्नाणतवे बहुं पडई ॥४१५॥

जह दाइयम्मिऽवि पहे, तस्स विसेसे पहस्सऽयाणंतो ।  
 पहिओ किल्हिसइ च्चिय, तय लिंगायारसुअमित्तो ॥४१६॥  
 कप्पाकप्पं एसणमणेसणं चरणकरणसेहविहिं ।  
 पायच्छित्तविहिंऽपि य, दन्वाइगुणेषु अ समगं ॥४१७॥  
 पन्वावणविहिमुट्ठावणं च अज्जाविहिं निरवसेसं ।  
 उस्सगववायविहिं, अयाणमाणो कहं जयउ ? ॥४१८॥  
 सीसायरियकमेण य, जणेण गहियाइँ सिप्पसत्थाइं ।  
 नज्जंति बहुविहाइं न चक्खुमित्ताणुसरियाइं ॥४१९॥  
 जह उज्जमिउं जाणइ, नागी तव संजमे उवायविऊ ।  
 तह चक्खुमित्तदरिसणसामायारी न याणंति ॥४२०॥  
 सिप्पाणि य सत्थाणि य, जाणंतोऽवि नय जुंजइ जो ऊ ।  
 तेसिं फलं न भुंजइ, इअ अंजयंतो जई नाणी ॥४२१॥  
 गारवतियपडिबद्धा; संजमकरणुज्जमम्मि सीअंता ।  
 निगंतूण गणाओ ( घराओ ) हिंडंति पमायरणम्मि ॥४२२॥  
 नागाहिओ वरतरं, हीणोऽविहु पवयणं पभावंतो ।  
 नय दुकरं करंतो, सुट्ठुवि अप्पागमो पुरिसो ॥४२३॥  
 नाणाहियस्स नाणं, पुज्जइ नाणा पवत्तए चरणं ।  
 जस्स पुण दुण्ह इक्कंपि नत्थि तस पुज्जए काइं ॥४२४॥  
 नागं चरित्तहीणं लिंगगहणं च दंसणविहीणं ।  
 संजमहीणं च तवं, जो चरइ निरत्थयं तस्स ॥४२५॥  
 जहा खरो चंदणभारवाही, भारस्स भागी न हु चंदनस्स ।  
 एवं खु नाणी चरणेण हीणो, नाणस्स भागी न हु सुगगईए ॥४२६॥

संपागडपडिसेवी, काएसु वएसु जो न उज्जमई ।  
 पवयणपाडणपरमो, सम्मत्तं कोमलं तस्स ॥४२७॥  
 चरणकरणपरिहीणो, जइवि तवं चरइ सुट्ठु अइगुरुअं ।  
 सो तिहं व किणंतो कंसियबुद्धो मुणेयव्वो ॥४२८॥  
 छज्जीवनिकायमहव्वयाण परिपालणाइ जइधम्मो ।  
 जइ पुण ताई न रक्खइ, भणाहि को नाम सो धम्मो ? ॥४२९॥  
 छज्जीवनिकायदयाविवज्जिओ नेव दिक्खिओ न गिही ।  
 जइधम्माओ चुक्को, चुक्कइ गिहिदाणधम्माओ ॥४३०॥  
 सव्वाओगे जह कोइ, अमच्चो नरवइरस धित्तूणं ।  
 आणाहरणे पावइ, वहवंधण दव्वहरणं च ॥४३१॥  
 तह छक्कायमहव्वयसव्वनिधित्तीउ गिणिहंऊण जई ।  
 एगमवि विराहंतो, अमच्चरण्णो हणइ बोहि ॥४३२॥  
 तो हयबोही य पच्छा, कयावराहाणुसरिसमियममियं ।  
 पुणवि भवोअहिपडिओ, भमइ जरामरणदुग्गम्मि ॥४३३॥  
 जइयाऽजेणं चत्तं, अप्पणयं नाणदंसणचरित्तं ।  
 तइया तस्स परेसुं, अणुकंपा नत्थि जीविसु ॥४३४॥  
 छक्कायरिऊण अरसंजयाण लिगावसेसमित्ताणं ।  
 बहुअरसंजमपवहो, खारो मइलेइ सुट्ठुअरं ॥४३५॥  
 किं लिगामिड्ढुरीधारणेण कज्जम्मि अट्टिए ठाणे ।  
 राया न होइ सयमेव, धारयं चामराडोवे ॥४३६॥  
 जो सुत्तत्थविणिच्छियकयागमो मूलउत्तरगुणोहं ।  
 उव्वहइ सयाऽखलिओ सो लिक्खइ साहुलिक्खम्मि ॥४३७॥

बहुदोससंकलिट्टो, नवरं मइलेइ चंचलसहावो ।  
 सुट्टुवि वायामितो, कायं न करेइ किचि गुणं ॥४३८॥  
 केसिंचि वरं मरणं, जीवियमन्नेसिसुभयमन्नेसि ।  
 ददुदुरदेविच्छाए, अहियं केसिंचि उभयंपि ॥४३९॥  
 केसिंचि य परलोगो, अन्नेसि इत्थ होइ इहलोगो ।  
 करसवि दुष्णिवि लोगा, दोऽवि हया करसई लोगा ॥४४०॥  
 छज्जीवकायविरओ, कायकिलेसेहिं सुट्टु गुरुएहिं ।  
 नहु तस्स इमो लोगो, हवइऽस्सेगो परो लोगो ॥४४१॥  
 नरयनिरुद्धमईणं, दंडियमाईण जीवियं सेयं ।  
 बहुवायम्मिऽवि देहे, विसुज्जमाणस्स वर मरणं ॥४४२॥  
 तवनियमसुट्टियाणं, कल्लागं जीविअंपि मरणंपि ।  
 जीवंतऽऽज्जंति गुणा, मयाऽवि पुण सुग्गइं जंति ॥४४३॥  
 अहियं मरणं अहिअं च जीवियं पावकम्मकारीणं ।  
 तमसम्मि पडंति मया, वेरं वडुंति जीवंता ॥४४४॥  
 अवि इच्छंति अ मरणं, नय परपीडं करंति मणसाऽवि ।  
 जे सुविइयसुगइपहा, सोयरियसुओ जहा सुलसो ॥४४५॥  
 मूला कुदंडगा दामगाणि उच्छूलघंटिआओ य ।  
 पिडेइ अपरितंतो, चउप्पया नत्थि य पसूऽवि ॥४४६॥  
 तह वत्थपायदंडगउवगरणे जयणकज्जमुज्जुत्तो ।  
 जस्सऽट्ठाए किल्लिसई, तं चिय मूढो नऽवि करेइ ॥४४७॥  
 अरिहंता भगवंतो, अहियं व हियं व नवि इहं किंचि ।  
 वारंति कारवेति य, घित्तूण जणं बला हत्थे ॥४४८॥

उवएसं पुण तं दिति जेण चरिएण कित्तिनिलयाणं ।  
 देवाणऽवि हुंति पहू, किमंग पुण मणुअमित्ताणं ? ॥४४९॥  
 वरमउडकिरीडधरो, चिचइओ चवलकुंडलाहरणो ।  
 सक्को हिओवएसा, एरावणवाहणो जाओ ॥४५०॥  
 रयणुज्जलाइं जाइं, बत्तीसविमाणसयसहस्साइं ।  
 वज्जहरेण वराइं, हिओवएसेण लद्धाइं ॥४५१॥  
 सुरवइसमं विभूइं, जं पत्तो भरहचक्कवट्टीऽवि ।  
 माणुसलोगस्स पहू, तं जाण हिओवएसेण ॥४५२॥  
 लद्धुण तं सुइसुहं, जिणवयणुवएसममयविदुसमं ।  
 अप्पहियं कायव्वं, अहिएसु मणं न दायव्वं ॥४५३॥  
 हियमप्पणो करित्तो, कस्स न होइ गरूओ गुरू गण्णो ! ।  
 अहियं समायरंतो, कस्स न विप्पञ्चओ होइ ? ॥४५४॥  
 जो नियमसीलतवसंजमेहिं जुत्तो करेइ अप्पहियं ।  
 सो देवयं व पुज्जो, सीसे सिद्धत्थओ व्व जणे ॥४५५॥  
 सव्वो गुणेहिं गण्णो, गुणाहिअस्स जह लोववीरस्स ।  
 संभंतमउडविडवो, सहस्सनयणो सययमेइ ॥४५६॥  
 चोरिक्कवंचणाकूडकवडपरदारदारुणमइस्स ।  
 तस्स च्चिय तं अहियं, पुणोऽवि वेरं जणो वहइ ॥४५७॥  
 जइ ता तणकंचणलुट्ठ (लिट्ठु ?) रयणसरिसोवमी जणो जाओ ।  
 तइया नणु वुच्छिन्नो, अहिलासो दव्वहरणम्मि ॥४५८॥  
 आजीवगगणनेया, रज्जसिरिं पयहिऊण य जमाली ।  
 हियमप्पणो करित्तो, नय वयणिज्जे इह पढंतो ॥४५९॥

इंदियकसायगारवमएहिं सययं किल्लिट्टपरिणामो ।  
 कम्मघणमहाजालं, अणुसमयं वंधई जीवो ॥४६०॥  
 परपरिवायविसाला, अणेगकंदप्पविसयभेगेहिं ।  
 संसारत्था जीवा, अरइविणोअं करंतेवं ॥४६१॥  
 आरंभपायनिरया, लोइअरिसिणो तथा कुलिगी अ ।  
 दुहओ चुक्का नवरं, जीवंति दरिद्वजियलोए ॥४६२॥  
 सव्वो न हिंसियव्वो, जह महिपालो तथा उदयपालो ।  
 नय अभयदाणवइणा, जणोवमाणेण होयव्वं ॥४६३॥  
 पाविज्जइ इह वसणं, जणेण तं झगलओ असत्तुत्ति ।  
 न य कोइ सोणियव्वलिं, करेइ वग्घेण देवाणं ॥४६४॥  
 वच्चइ खगेण जीवो, पित्तानिलधाउसिंभखोभेहिं ।  
 उज्जमह मा विसीअह, तरतमजोगो इमो दुलहो ॥४६५॥  
 पंचिदियत्तणं माणुसत्तणं आरिए जगे सुकुलं ।  
 साहुसमागम सुणणा, सहहणाऽरोग पव्वज्जा ॥४६६॥  
 आउं संविहंतो, सिढिलंतो बंधणाइं म्मव्वाइं ।  
 देहंदिअं सुयंतो, ज्ञायइ कलुणं बहुं जीवो ॥४६७॥  
 इक्कंअपि नत्थि जं सुट्ठु सुचरियं जह इमं बलं मज्झ ।  
 को नाम दढक्कारो, मरणंते मंदपुण्णस्स ? ॥४६८॥ युग्मम् ॥  
 सूल-विस-अहि-विसूई-पागीसत्थग्गि-संभमेहिं च ।  
 देहंतरसंकमणं, करेई जीवो मुहुत्तेण ॥४६९॥  
 कत्तो चिता सुचरियत्तवस्स गुणसुट्ठियस्स साहुस्स ? ।  
 सोगइगमपडिहत्यो, जो अच्छइ नियमभरियभरो ॥४७०॥

साहंति अ फुडांविअडं, 'मासाहस'सउणसरिसया जीवा ।  
 न य कम्मभारगरुयत्तणेण तं आयरंति तथा ॥४७१॥

वग्घमुहम्मि अहिगओ, मंसं दंतंतराउ कट्ठेइ ।  
 मा साहसंति जंपइ, करेइ न य तं जहाभणियं ॥४७२॥

परिअट्टिऊण गंथत्थवित्थरं निहसिऊण परमत्थं ।  
 तं तह करेह जह तं, न होइ सव्वंपि नहपट्ठियं ॥४७३॥

पट्ठइ नडो वेरग्गं, निव्विज्जिज्जा य बहुजणो जेण ।  
 पट्ठिऊण तं तह सडो, जालेण जलं समोअरइ ॥४७४॥

कह कह करेमि कह मा करेमि कह कह कर्यं बहुकर्यं मे ।  
 जो हिययसंपसारं, करेइ सो अइकरेइ हियं ॥४७५॥

सिडिलो अणायरकओ, अवसवसकओ तथा कयावकओ ।  
 सययं पमत्तसीलस्स, संजमो केरिसो होज्जा ? ॥४७६॥

चंदुव्व कालपक्खे, परिहाइ पए पए पमायपरो ।  
 तह उग्घरविघरनिरंगणो य णय इच्छियं लहइ ॥४७७॥

भीओव्विग्ग निलुक्को, पागडपच्छन्नदोससयकारी ।  
 अप्पच्चयं जणंतो, जणस्स धी जीवियं जियइ ॥४७८॥

न तहिं दिवसा पक्खा, मासा वरिसावि संगणिज्जंति ।  
 जे मूलउत्तरगुणा, अवखलिया ते गणिज्जंति ॥४७९॥

जो नवि दिणे दिणे संकलेइ के अज्ज अज्जिया मि गुणा ? ।  
 अगुणेषु अ नहु खलियो, कह सो उ करिज्ज अप्पहिअं ? ॥४८०॥

इय गणियं इय तुलियं इय बहुआ दरिसियं नियमियं च ।  
 जइ तहवि न पडिबुज्जाइ, कि कीरइ ? नूग भवियंव्वं ॥४८१॥

किमगं तु पुणो जेणं, संजमसेढी सिढिलीकया होई ।  
 सो तं चिअ पडिवज्जइ, दुवखं पच्छ उ उज्जमई ॥४८२॥  
 जइ सव्वं उवलद्धं, जइ अप्पा भाविओ उवसमेणं ।  
 कायं वायं च मणं, उप्पहेणं जह न देई ॥४८३॥  
 हत्थे न पाए निखिवे, कायं चालिज्ज तंपि कजेणं ।  
 कुम्मो व्व सए अंगे, अंगोवंगाइं गोविज्जा ॥४८४॥  
 विकहं विणोयभासं अंतरभासं अवक्कभासं च ।  
 जं जरस अणिट्टिमपुच्छिओ य भासं न भासिज्जा ॥४८५॥  
 अणवट्टियं मणो जरस, झायइ बहुयाइं अट्टमट्टाइं ।  
 तं चित्तिअं च न लहइ, संचिणइ अ पावकम्माइं ॥४८६॥  
 जह जह सव्वुवलद्धं, जह जह सुचिरं तवो वणे वुच्छं ।  
 तह तह कम्मभरगुरू, संजमनिव्वाहिरो जाओ ॥४८७॥  
 विज्जप्पो जह जह ओसहाइं पिजेइ वायहरणाइं ।  
 तह तह से अहिययरं, वाण्णाऊरिअं पुट्टं ॥४८८॥  
 दड्ढजउमकज्जकरं, भिन्नं संखं न होई पुण करणं ।  
 लोहं च तंबविद्धं, न एइ परिकम्मणं किंचि ॥४८९॥  
 को दाही उवएसं, चरणालसयाण दुव्विअड्ढाणं ? ।  
 इंदस्स देवलोगो, न कहिज्जइ जाणमाणस्स ॥४९०॥  
 दो चेव जिणवरेहिं, जाइजरामरणविप्पमुक्केहिं ।  
 लोगम्मि पहा भणिया, सुस्समण सुसावगो वाऽवि ॥४९१॥  
 भावञ्चणमुग्गविहारया य दव्वच्चणं तु जिणपूआ ।  
 भावञ्चणाउ भट्टो, हविज्ज दव्वच्चणुजुत्तो ॥४९२॥

जो पुण निरञ्चणो च्चिअ, सरीरसुहकज्जमित्तल्लिच्छो ।  
तस्स नहि बोहिलाभो, न सुरगई नेय परलोगो ॥४९३॥  
कंचगमणिसोवाणं, थंभसहरसूसिअं सुवण्णतलं ।  
जो कारिज्ज जिणहरं, तओऽवि तवसंजमो अहिओ ॥४९४॥  
निब्बीए दुट्ठिभवखे, रण्णा दीवंतराओ अन्नाओ ।  
आणेऊगं बीअं, इह दिन्नं कासवज्जणस्स ॥४९५॥  
केहिवि सव्वं खइयं, पइन्नमन्नेहिं सव्वमद्धं च ।  
वुत्तं गयं च केई, खित्ते खुट्ठंति संतत्था ॥४९६॥  
राया जिणवरचंदो, निब्बीयं धम्मविरहिओ कालो ।  
खित्ताइं कम्मभूमी, कासववग्गो य चत्तारि ॥४९७॥  
असंजएहिं सव्वं, खइअं अद्धं च देसविरएहिं ।  
साहूहिं धम्मवीअं उत्तं नीअं च निप्फत्तिं ॥४९८॥  
जे ते सव्वं लहिउं, पच्छा खुट्ठंति दुब्बलधिईया ।  
तवसंजमपरितंता, इह ते ओहरिअसीलभरा ॥४९९॥  
आणं सव्वजिणाणं, भंजइ दुविहं प्हं अइक्कंतो,  
आणं च अइक्कंतो भमइ जरामरणदुग्गम्मि ॥५००॥  
जइ न तरसि धारेउं मूलगुणभरं सउत्तरगुणं च ।  
मुत्तूण तो तिभूमी, सुसावगत्तं वरतराणं ॥५०१॥  
अरिहंतचेइआणं, सुसाहुपूयारओ दढायारो ।  
सुरसावगो वरतरं, न साहुवेसेण चुअधम्मो ॥५०२॥  
सव्वंति भाणिऊणं, विरई खलु जस्स सव्विवया नत्थि ।  
सो सव्वविरइवाई, चुक्कइ देसं च सव्वं च ॥५०३॥

जो जहवायं न कुणइ, मिच्छहिट्ठी तओ हु को अन्नो ? ।  
बड्ढेइ अ मिच्छत्तं, परस्स संकं जणेमाणो ॥५०४॥  
आणाए च्चिय चरणं, तच्चभंगे जाण किं न भग्गंति ? ।  
आणं च अइकंतो, कासाएसा कुणइ सेसं ? ॥५०५॥  
संसारो अ अणंतो, भट्टचरित्तस्स लिङ्गजीविसस ।  
पंचमहव्वयतुंगो, पागारो भल्लिओ जेण ॥५०६॥  
न करेमिच्छि भणित्ता, तं चेव निसेवए पुणो पावं ।  
पञ्चक्खमुसावाई, मायानियडीपसंगो य ॥५०७॥  
लोएऽवि जो ससूगो, अलिअं सहसा न भासए किंचि ।  
अह दिक्खिओऽवि अलियं, भासइ तो किंच दिक्खाए ? ॥५०८॥  
महव्वयअणुव्वयाइं, छंडेउं जो तवं चरइ अन्नं ।  
सो अन्नाणी मूढो, नावाबुद्धो मुणेयव्वो ॥५०९॥  
सुबहुं पासत्थजणं, नाऊणं जो न होइ मज्झत्थो ।  
नय साहेइ सकज्जं, कागं च करेइ अप्पाणं ॥५१०॥  
परिचित्तिऊण निउणं, जइ नियमभरो न तीरण वोढुं ।  
परचित्तरंजणेणं, न वेसमित्तेण साहारो ॥५११॥  
निच्छयनयस्स चरणरसुवघाए नाणदंसणवहोऽवि ।  
ववहारस्स उ चरणे, हयम्मि भयणा उ सेसाणं ॥५१२॥  
सुज्झइ जई सुचरणो, सुज्झइ सुस्सावओऽवि गुणकलिओ ।  
ओसन्नचरणकरणो, सुज्झइ संविग्गपक्खरुई ॥५१३॥  
संविग्गपक्खियाणं, लक्खणमेयं, समासओ भणियं ।  
ओसन्नचरणकरणाऽवि जेण कम्मं विसोहंति ॥५१४॥

सुद्वं सुसाहुधम्मं, कहेइ निदइ य निययमायारं ।  
सुतवरिसयाण पुरओ, होइ य सव्वोमरायणीओ ॥५१५॥  
वंदइ नय वंदावइ, किइकम्मं कुणइ कारवे नेय ।  
अत्तट्ठा नवि दिक्खइ, देइ सुसाहूण बोहेउं ॥५१६॥  
ओसन्नो अत्तट्ठा, परमप्पाणं च हणइ दिक्खंतो ।  
तं छुहइ दुग्गईए, अहिययरं बुडुइ सयं च ॥५१७॥  
जह सरणमुवगयाणं, जीवाण निक्कितए सिरे जो उ ।  
एवं आयरिओऽविहु, उस्सुत्तं पन्नवंतो य ॥५१८॥  
सावज्जजोगपरिवज्जणा उ सव्वुत्तमो जईधम्मो ।  
बीओ सावगधम्मो, तइओ संविग्गपक्खपहो ॥५१९॥  
सेसा मिच्छदिट्ठी, गिहिलिङ्गकुलिङ्गदव्वलिङ्गेहिं ।  
जह तिण्णि य मुक्खपहा संसारपहा तथा तिण्णि ॥५२०॥  
संसारसागरमिणं, परिब्भमंतेहिं सव्वजीवेहिं ।  
गहियाणि य मुक्काणि य अणंतसो दव्वलिङ्गाइं ॥५२१॥  
अच्चणुरत्तो जो पुण, न मुयइ बहुसोऽवि पन्नविज्जंतो ।  
संविग्गपक्खयत्तं, करिज्ज लब्धिहिसि तेण पहं ॥५२२॥  
कंताररोहमद्वाणओमगेलन्नमाइकजेसु ।  
सव्वायरेण जयणाइ कुणइ जं साहुकरणजं ॥५२३॥  
आयतरसंमाणं, सुदुक्करं माणसंकडे लोए ।  
संविग्गपक्खयत्तं, ओसन्नेणं फुडं काउं ॥५२४॥  
सारणचइआ जे गच्छनिग्गया पविहरंति पासत्था ।  
जिणवयणवाहिराऽवि य, ते उ पमाणं न कायट्वा ॥५२५॥

हीणस्सऽवि सुद्धपरूवगरस्स संविग्गपक्खवायस्स ।  
 जा जा हविज्ज जयणा, सा सा से निज्जरा होइ ॥५२६॥  
 सुक्काइयपरिसुद्धे, सइ लोभे कुणइ वाणिओ चिट्ठं ।  
 एमेव य गीयत्थो, आयं दट्ठुं समायरइ ॥५२७॥  
 आमुक्कजोगिणो च्चिअ, हवइ थोवाऽवि तस्स जीवदया ।  
 संविग्गपक्खजयणा, तो दिट्ठा साहुवग्गरस्स ॥५२८॥  
 किं मूसगाणा अत्थेण ? किं वा कागाण कणगमालाए ? ।  
 मोहमल्लखविलिआणं, किं कज्जुवएसमालाए ? ॥५२९॥  
 चरणकरणालसाणं, अविणयबहुलाण सययऽजोगमिणं ।  
 न मणी सयसाहस्सो आबज्झइ कुच्छभासस्स ॥५३०॥  
 नाऊण करयल्लगायाऽऽमलं व सव्भावओ पहं सव्वं ।  
 धम्मम्मि नाम सीइज्जइत्ति कम्माइं गुरुआइं ॥५३१॥  
 धम्मत्थकाममुक्खेसु जस्स भावो जहिं जहिं रमइ ।  
 वेरग्गेगंतरसं न इमं सव्वं सुहावेइ ॥५३२॥  
 संजमतत्तलसाणं, वेरग्गकहा न होइ कण्णमुहा ।  
 संविग्गपक्खयाणं, हुज्ज व केँसिचि नाणीणं ॥५३३॥  
 सोऊण पगरणमिणं, धम्मे जाओ न उज्जमो जस्स ।  
 न य जणियं वेरग्गं, जाणिज्ज अणंतसंसारी ॥५३४॥  
 कम्माण सुवहुआणुवसमेण उवगच्छई इमं सव्वं ।  
 कम्ममलचिक्रणाणं वच्चइ मासेण भन्नंतं ॥५३५॥  
 उवएसमालमेयं जो पढइ सुणइ कुणइ वा हियए ।  
 सो जाणइ अप्पहियं नाऊण सुहं समायरई ॥५३६॥

धंतमणिदामससिगयणिहि पयपढमक्खराभिहाणेणं ।  
 उवएसमालपगरणमिणमो रइअं हिअट्टाए ॥५३७॥  
 जिणवयणकप्परुक्खो, अणेगसुत्तत्थसालविच्छिन्नो ।  
 तवनियमकुसुमगुच्छो, सुग्गइफलबंधणो जयइ ॥५३८॥  
 जुग्गा सुसाहुवेरग्गिआण परलोगपत्थिआणं च ।  
 संविग्गपक्खिआणं, दायव्वा बहुसुआणं च ॥५३९॥  
 इय धम्मदासगणिणा जिणवयणुवएसकज्जमालाए ।  
 मालव्व विविहकुसुमा, कहिआ य सुसीसवग्गस्स ॥५४०॥  
 संतिकरी वुट्ठिकरी, कल्लणकरी सुमंगलकरी य ।  
 होइ कहग्गस्स परिसाए, तह य निव्वाणफलदाई ॥५४१॥  
 इत्थ समप्पइ इणमो, मालाउवएसपंगरणं पगयं ।  
 गाहाणं सव्वाणं; पंचसया चेव चालीसा ॥५४२॥  
 जाव य लवणसमुहो, जाव य नक्खत्तमंडिओ मेरू ।  
 ताव य रइया माला, जयम्मि थिरथावरा होउ ॥५४३॥  
 अक्खरमत्ताहीणं, जं चिय पटियं अयाणमाणेणं ।  
 तं खमह मज्झ सव्वं, जिणवयणविणिग्गया वाणी ॥५४४॥

॥ इइ सिरिधम्मदासगणिविरइया उवएसमाला ॥



## ॥ सिरिसंतिसूरिविरइयं धम्मरयणपगरणं ॥



नमिऊण सयलगुणरयणकुलहरं विमलकेवलं वीरं ।  
धम्मरयणत्थिआणं जणाण वियरेमि उवएसं ॥१॥  
भवजलहिम्मि अपारे दुलहं मणुयत्तणंपि जंतूणं ।  
तत्थवि अणत्थहरणं दुलहं सद्धम्मवररयणं ॥२॥  
जह चिंतामणिरयणं सुलहं न हु होइ तुच्छविहवाणं ।  
गुणविभववज्जियाणं जिंयाण तह धम्मरयणंपि ॥३॥  
इगवीसगुणसमेओ जोग्गो एयस्स जिणमए भणिओ ।  
तदुवज्जणंमि पढमं ता जइयव्वं जओ भणियं ॥४॥  
धम्मरयणस्स जोग्गो अक्खुद्धो रूववं पयइसोमो ।  
लोगप्पिओ अकूरो भीरू असढो सुदक्खिन्नो ॥५॥  
लज्जालुओ दयालू मज्झत्थो सोमदिट्ठि गुणरागी ।  
सक्कह सुपक्खजुत्तो सुदीहदरिसी विसेसन्नू ॥६॥  
बुड्ढाणुगो विणीओ कयन्नुओ परहियत्थकारी य ।  
तह चेव लद्धलक्खो इगवीसगुणेहिं संपन्नो ॥७॥

खुद्दोति अगंभीरो उत्ताणमई न साहए धम्मं ।  
 सपरोवयारसत्तो अक्खुद्दो तेण इह जोगो ॥८॥  
 संपुन्नंगोवंगो पंचिदियसुंदरो सुसंघयणो ।  
 होइ पभावणहेऊ खमो य तह रूववं धम्मे ॥९॥  
 पयईसोमसहावो न पावकम्मे पवत्तई पायं ।  
 हवइ सुहसेवणिज्जो पसमनिमित्तं परेसिपि ॥१०॥  
 इहपरलोयविरुद्धं न सेवए दाणवियसीलड्ढो ।  
 लोअप्पिओ जणाणं जगेइ धम्मंमि बहुमाणं ॥११॥  
 कूरो किलिद्धभावो सम्मं धम्मं न साहिउ तरइ ।  
 इय सो न एत्थ जोगो जोगो पुण होइ अक्कूरो ॥१२॥  
 इहपरलोगावाए संभावेंतो न वट्टई पावे ।  
 बीहइ अयसकलंका तो खलु धम्मारिहो भीरू ॥१३॥  
 असदो परं न वंचइ वीससणिज्जो पसंसणिज्जो य ।  
 उज्जमइ भावसारं उचिओ धम्मस्स तेणेसो ॥१४॥  
 उवयरइ सुदक्खिन्नो परेसिमुज्झिय सकज्जवावारो ।  
 तो होइ गज्जवक्को णुवत्तणीओ य सव्वस्स ॥१५॥  
 लज्जालुओ अकज्जं वज्जइ दूरेण जेण तणुयंपि ।  
 आयरइ सयायारं न मुयइ अंगीकयं कहवि ॥१६॥  
 मूलं धम्मस्स दया तयणुगये सव्वमेवणुट्ठाणं ।  
 सिद्धं जिणिदसमए मग्गिज्जइ तेणिह दयालू ॥१७॥  
 मज्झत्थसोमदिट्ठी धम्मवियारं जहट्ठियं मुणइ ।  
 कुणइ गुणसंपओगं दोसे दूरं परिच्चयइ ॥१८॥

गुणरागी गुणवंते बहु मन्नइ निग्गुणे उबेहेइ ।  
 गुणसंगहे पवत्तइ संपत्तगुणं न मयलेइ ॥१९॥  
 नासइ विवेगरयणं असुहकहासंगकलुसियमणस्स ।  
 धम्मो विवेगसारोत्ति सक्कहो होज्ज धम्मत्थी ॥२०॥  
 अणुकूल धम्मसीलो सुसमायारो य परियणो जरस ।  
 एस सुपक्खो धम्मं निरंतरायं तरइ काउं ॥२१॥  
 आढवइ दीहदंसी सयलं परिणामसुंदरं कज्जं ।  
 बहुलाभमप्पकेसं सल्लहणिज्जं बहुजणाणं ॥२२॥  
 वत्थूणं गुणोसे लक्खेइ अपक्खवायभावेण ।  
 पाएण विसेसन्तू उत्तमधम्मारिहो तेण ॥२३॥  
 बुद्धो परिणयबुद्धी पावायारे पवत्तई नेय ।  
 बुद्धाणुगोवि एवं संसग्गिकया गुणा जेण ॥२४॥  
 विणओ सच्चवगुणाणं मूलं सन्नाणदंसणाईणं ।  
 मोक्खस्स य ते मूलं तेण विणीओ इह पसत्थो ॥२५॥  
 बहु मन्नइ धम्मगुरुं परमुवयारित्ति तत्तबुद्धीए ।  
 तत्तो गुणाण बुद्धी गुणपरिहो तेणिह कयन्तू ॥२६॥  
 परिहियनिरओ धन्नो सम्मं विन्नायधम्मसब्भभावो ।  
 अन्नेवि ठवइ मग्गे निरीहचित्तो महासत्तो ॥२७॥  
 लक्खेइ लद्धलक्खो सुहेण सयलंपि धम्मकरणिज्जं ।  
 दक्खो सुसासणिज्जो तुरियं च सुसिक्खिओ होइ ॥२८॥  
 एए इगवीसगुणा सुयाणुसारेण किंचि वक्खाया ।  
 अरिहंति धम्मरयणं घेत्तुं एएहि संपन्ना ॥२९॥

पायद्वगुणविहीणा एणसिं मञ्जिमा वरा नेया ।  
 एत्तो परेण हीणा दरिद्रपाया मुणेयव्वा ॥३०॥  
 धम्मरयणत्थिणा तो पढमं एयज्जणंमि जइयव्वं ।  
 जं सुद्धभूमिगाए रेहइ चित्तं पवित्तंपि ॥३१॥  
 सइ एयंमि गुणोहे संजायइ भावसावयत्तंपि ।  
 तस्स पुण लक्खणाइं एयाइं भणंति सुहगुरुणो ॥३२॥  
 कयवयकम्मो तह सीलवं च गुणवं च उज्जुववहारी ।  
 गुरुमुत्सूसो पवयणकुसलो खलु सावगो भावे ॥३३॥  
 तत्थायन्नण-जाणण-गिण्हण-पडिसेवणेसु उज्जुत्तौ ।  
 कयवयकज्जो चउहा भावत्थो तस्सिमो होइ ॥३४॥  
 विणयबहुमाणसारं गीयत्थाओ करेइ वयसवणं ।  
 भंगयभेयइयारे वयाण सम्मं वियाणाइ ॥३५॥  
 गिण्हइ गुरुण मूले इत्तरमियरं व काल्मह ताइं ।  
 आसेवइ थिरभावो आयंकुवसग्गसंगेवि ॥३६॥  
 आययणं खु निसेवइ वज्जइ परगेहपविसणमकज्जे ।  
 निच्चमणुव्भडवेसो न भणइ सवियारवयणाइं ॥३७॥  
 परिहरइ बालकीलं साहइ कज्जाइं महुरनीईए ।  
 इय छन्विहसीलजुओ विन्नेओ सीलवंतोत्थ ॥३८॥  
 आययणसेवणाओ दोसा झिज्जंति वड्ढइ गुणोहो ।  
 परगिहगमणंपि कलंकपंकमूलं सुसीलाणं ॥३९॥  
 सहइ पसंतो धम्मी उब्भडवेसो न सुंदरो तस्स ।  
 सवियारजंपियाइं नूणमुईरंति रागग्गि ॥४०॥

बालिसजणकीलावि हु लिंगं मोहस्सणत्थदंडाओ ।  
 फरुसं वयणाभिओगो न संगओ सुद्धधम्माणं ॥४१॥  
 जइवि गुणा बहुरुवारा तहवि हु पंचहि गुणेहि गुणवंतो ।  
 इह मुणिवरेहि भणिओ सरूवमेसिं निसामेहि ॥४२॥  
 सज्जाए करणंमि य विणयम्मि य निच्चमेव उज्जुत्तो ।  
 सब्वत्थणभिनिवेसो वहइ रुइं सुट्ठु जिणवयणे ॥४३॥  
 पढणाईसज्जायं वेरगनिबंधणं कुणइ विहिणा ।  
 तवनियमवंदणाईकरणंमि य निच्चमुज्जमइ ॥४४॥  
 अब्भुट्टाणाईयं विणयं नियमा पउंजइ गुणीणं ।  
 अणभिनिवेसो गीयत्थभासियं नन्नहा मुणइ ॥४५॥  
 सवणकरणेसु इच्छा होइ रुईं सहहाणसंजुत्ता ।  
 एईए विणा कत्तो सुद्धी सम्मत्तरयणस्स ॥४६॥  
 उजुववहारो चउहा जहत्थभणणं अवंचिगा किरिया ।  
 हुंतावायपगासण मेत्तीभावो य सब्भावा ॥४७॥  
 अन्नहभणणाईसुं अबोहिवीयं पररसं नियमेण ।  
 तत्तो भवपरिवुड्ढी ता होज्जा उज्जुववहारी ॥४८॥  
 सेवाए कारणेण य संपायणभावओ गुरुजणस्स ।  
 मुस्सूणं कुणंतो गुरुसुस्सूसो हवइ चउहा ॥४९॥  
 सेवति कालंमि गुरुं अकुणंतो ज्झाणजोगवाघायं ।  
 सय वन्नवायकरणा अन्नेवि पवत्तई तत्थ ॥५०॥  
 ओसहभेसज्जाई सओ य परओ य संपणामैइ ।  
 सइ बहुमन्नेइ गुरुं भावं चणुवत्तए तस्स ॥५१॥

सुत्ते अत्थे य तथा उस्सग्गववायभावववहारे ।  
 जो कुसलत्तं पत्तो पवयणकुसलो तओ छद्धा ॥५२॥  
 उच्चियमहिज्जइ सुत्तं सुणइ तयत्थं तथा सुत्तित्थंमि ।  
 उस्सग्गववायाणं विसयविभागं वियाणाइ ॥५३॥  
 वहइ सइ पक्खवायं विहिसारे सव्वधम्मणुट्ठाणे ।  
 देसद्धादणुरूवं जाणइ गीयत्थववहारं ॥५४॥  
 एसो पवयणकुसलो छब्भेओ मुणिवरेहि निद्धिट्ठो ।  
 किरियागयाइं छच्चिय लिंमाइं भावसड्ढस्स ॥५५॥  
 भावगयाइं सतरस मुणिणो एयरस वित्ति लिंमाइं ।  
 जणियज्जिणमयसारा पुव्वायरिया जओ आहु, ॥५६॥  
 इत्थिदियत्थ-संसार-विसयआरंभ-गेहदसणओ ।  
 गड्डुरिगाइपवाहे पुरस्सरं आगमपवित्ति ॥५७॥  
 दाणाइ जहासत्ती पवत्तणं विहिररत्तडुट्ठे य ।  
 मज्झत्थमसंबद्धे परत्थकामोवभोगी य ॥५८॥  
 वेसा इव गिहवासं पालइ सत्तरसपयनिबद्धं तु ।  
 भावगयभावसावगलक्खणमेयं समासेण ॥५९॥  
 इत्थीमणत्थभवणं चलचित्तं नरयवत्तिणीभूयं ।  
 जाणंतो हियकामी वसवत्ती होइ न हु तीसे ॥६०॥  
 इंदियच्चवलतुरंगे दोग्गइमग्गाणुधाविरे निच्चं ।  
 भावियभवस्सरूवो रुंभइ सन्नाणरस्सीहिं ॥६१॥  
 सयलात्णयनिमित्तं आयासकिलेसकारणमसारं ।  
 नाऊण धणं धीरो न हु लुब्भइ तंमि तणुयंपि ॥६२॥

दुहरूवं दुवखफलं दुहाणुवन्धि विडंबणारूवं ।  
 संसारमसारं जाणिऊण न रइं तर्हिं कुणइ ॥६३॥  
 खणभेत्तसुहे विसए विसोवमाणे सयावि मन्नंतो ।  
 ेपु न करेइ गिद्धिं भवभीरू मुणियतत्तथो ॥६४॥  
 वज्जइ तिंवारंभं कुणइ अकामो अनिच्चहंतो उ ।  
 थुणइ निरारंभजणं दयालुओ सव्वजीवेसु ॥६५॥  
 गिहवासं पासं पिव मन्नंतो बसइ दुक्खिओ तंमि ।  
 चारित्तमोहणिज्जं निज्जिणिउं उज्जमं कुणइ ॥६६॥  
 अत्थिक्कभावकलिओ पभावणा वन्नवायमाईर्हिं ।  
 गुरुभत्तिजुओ धीमं धरेइ सइ दंसणं विमलं ॥६७॥  
 गड्डुरिगपवाहेणं गयाणुगइयं जणं वियाणंतो ।  
 परिहरइ लोसन्नं सुसमिक्खियकारओ धीरो ॥६८॥  
 नत्थि परलोगमग्गे पमाणमन्नं जिणागमं मोत्तुं ।  
 आगमपुरस्सरं चिय करेइ तो सव्वकिच्चाइं ॥६९॥  
 अनिगूहितो सत्तिं आयात्राहाए जह वहुं कुणइ ।  
 आयरइ तथा सुमई दाणाइचणव्विहं धम्मं ॥७०॥  
 हियमणवज्जं किरियं चिंतामणिरयणदुल्लहं लहिउं ।  
 सम्मं समायरंतो न हु लज्जइ मुद्धहसिओवि ॥७१॥  
 देहट्ठिइ-निबंधण-धण-सयणाहार-गेहमाईसु ।  
 निवसइ अरत्तदुट्ठो संसारगएसु भावेसु ॥७२॥  
 उवसमसारवियारो वाहिज्जइ नेय रागदोसेर्हिं ।  
 मज्झत्थो हियकामी असग्गहं सव्वहा चयइ ॥७३॥

भावैतो अणवरयं खणभंगुरयं समत्थवत्थूणं ।  
 संबद्धोवि धणाइसु वज्जइ पडिबंधसंबंधं ॥७४॥  
 संसारविरत्तमणो भोगुवभोगा न तित्तिहेउत्ति ।  
 नाउं पराणुरोहा पवत्तई कामभोगेसु ॥७५॥  
 वेस व्व निरासंसो अज्जं कल्लं चयामि चिंततो ।  
 परकीयं पिव पालइ गेहावासं सिट्ठिलभावो ॥७६॥  
 इय सत्तरसगुणजुत्तो जिणागमे'भावसावगो भणिओ ।  
 एस उण कुसलजोगा लहइ लहु भावसाहुत्तं ॥७७॥  
 एयस्स उ लिंगाइं सयला मग्गाणुसारिणी किरिया ।  
 सद्धा पवरा धम्मं पन्नवणिज्जत्तमुजुभावा ॥७८॥  
 किरियासु अप्पमाओ आरंभो सक्कणिज्जणुट्ठाणे ।  
 गुरुओ गुणाणुराओ गुरुआणाराहणं परमं ॥७९॥  
 मग्गो आगमनीई अहवा संविग्गबहुजणाइन्नं ।  
 उभयाणुसारिणी जा सा मग्गणुसारिणी किरिया ॥८०॥  
 अन्नह भणियंपि सुए किंचि कालाइकारणावेक्खं ।  
 आइन्नमन्नह च्चिय दीसइ संविग्गगीएहिं ॥८१॥  
 कप्पाणं पाउरणं अग्गोयरचाय झोलियाभिवखा ।  
 ओवगहियकडाहयतुंबयमुहदाणदोराई ॥८२॥  
 सिक्किगनिक्खिवणाई पज्जोसवणाइतिहिपरावत्तो ।  
 भोयणविहिअन्नत्तं एमाई विविहमन्नंपि ॥८३॥  
 जं सव्वहा न सुत्ते पडिसिद्धं नेय जीववहहेऊ ।  
 तं सव्वंपि पमाणं चारित्तध्वणाण भणियं च ॥८४॥

अवलंबिऊण कज्जं जं किंपि समायरंति गीयत्था ।  
 थेवावराह बहुगुण सव्वेसिं तं पमाणं तु ॥८५॥  
 जं पुण पमायरूवं गुरुलाघवचित्तविरहियं सवहं ।  
 सुहसीलसढाइन्नं चरित्तिणो तं न सेवन्ति ॥८६॥  
 जह सड्ढेसु ममत्तं राढाए असुद्धउवहिभत्ताई ।  
 निहेज्जवसहितूली-मसूरिगाईण परिभोगो ॥८७॥  
 इच्चाई असमंजसमणेगहा खुद्वचिद्धियं लोए ।  
 बहुएहि वि आयरियं न पमाणं सुद्धचरणणं ॥८८॥  
 गीयत्थपारतंता इय दुविहं मग्गमणुस्सरंतस्स ।  
 भावजइत्तं जुत्तं दुप्पसहंतं जओ चरणं ॥८९॥  
 सद्धा तिक्खभिलासो धम्मे पवरत्तणं इमं तीसे ।  
 विहिसेव अतित्ती सुद्धदेसणा खलियपरिसुद्धी ॥९०॥  
 विहिसारं चिय सेवइ सद्धात्तु सत्तिमं अणुट्ठाणं ।  
 दव्वाइदोसनिहओ वि पक्खवायं वहइ तम्मि ॥९१॥  
 निरुओ भोज्जरसन्नू कंवि अवत्थं गओ असुहमन्नं ।  
 भुंजं न तंमि रज्जइ सुहभोयणलालसो धणियं ॥९२॥  
 इय सुद्धचरण रसिओ सेवन्तो दव्वओ विरुद्धंपि ।  
 सद्धागुणेण एसो न भावचरणं अइक्कमइ ॥९३॥  
 तित्तिं न चेव विंदइ सद्धाजोगेण नाणचरणेसु ।  
 वेयावच्चतवाईसु जहविरियं भावओ जयइ ॥९४॥  
 सुगुरुसमीवे सम्मं सिद्धंतपयाण मुणियत्तत्तथो ।  
 तयणुन्नाओ धन्नो मज्झत्थो देसणं कुणइ ॥९५॥

अवगयपत्तसरूवो तयणुग्गहहेउभाववुद्धिडकरं ।  
 सुत्तभणियं परूवइ वज्जंतो दूरमुम्मगं ॥९६॥  
 सव्वंपि जओ दाणं दिन्नं पत्तंमि दायगाण हियं ।  
 इहरा अणत्थजणं पहाणदाणं च सुयदाणं ॥९७॥  
 सुट्ठुयरं च न देयं एयमपत्तंमि नायतत्तेहिं ।  
 इय देसणाऽवि सुद्धा इहरा मिच्छत्तगमणाई ॥९८॥  
 जं च न सुत्ते विहियं न य पडिसिद्धं जणंमि चिररूढं ।  
 समइविगप्पियदोसा तंपि न दूंसंति गीयत्था ॥९९॥  
 संविग्गा गीयतमा विहिरसिया पुव्वसूरिणो आसि ।  
 तददूसियमायरियं अणइसई को निवारेइ ॥१००॥  
 अइसाहसमेयं जं उस्सुत्तपरूवणा कडुविवागा ।  
 जाणंतेहि वि दिज्जइ निहेसो सुत्तबज्जत्थे ॥१०१॥  
 दीसंति य ढड्ढसिणो णेगे नियमइ पउत्तजुत्तीहिं ।  
 विहिपडिसेहपवत्ता चेइयकिञ्चेषु रूढेसु ॥१०२॥  
 तं पुण विसुद्धसद्धा सुयसंवायं विणा न संसंति ।  
 अवहीरिऊण नवरं सुयाणुरूवं परूविति ॥१०३॥  
 अइयारमलकलंकं पमायमाईहिं कहवि चरणस्स ।  
 जणियंपि वियडणाए सोहिंति मुणी विमलसद्धा ॥१०४॥  
 एसा पवरा सद्धा अणुवद्धा होइ भावसाहुस्स ।  
 एईए सव्भावे पन्नवणिज्जो हवइ एसो ॥१०५॥  
 विहिउज्जमवन्नयभय-उस्सग्गववाय-तदुभयगयाइं ।  
 सुत्ताइं बहुविहाइं समए गंभीरभावाइं ॥१०६॥

तेसिं विसयविभागं अमुणंतो नाणवरणकम्मुदया ।  
 मुज्झइ जीवो तत्तो सपरोसिमसग्गहं जणइ ॥१०७॥  
 तं पुण संविग्गगुरू परहियकरणुज्जयाणुकंपाए ।  
 बोहिंति सुत्तविहिणा पन्नवणिज्जं वियाणंता ॥१०८॥  
 सोवि असग्गहचाया सुविसुद्धं दंसणं चरित्तं च ।  
 आराहिउं समत्थो होइ सुहं उज्जुभावाओ ॥१०९॥  
 सुगइनिमित्तं चरणं तं पुण छक्कायसंजमो चेव ।  
 सो पालिउं न तीरइ विग्गहाइ-पमायजुत्तेहिं ॥११०॥  
 पव्वज्जं विज्जंपिव साहितो होइ जो पमाइल्लो ।  
 तस्स न सिज्झइ एसा करेइ गरुयं च अवयारं ॥१११॥  
 पडिलेहणाइचेट्टा-रउक्कायविघाइणी पमत्तस्स ।  
 भणिया सुयंमि तम्हा अपमाई सुविहिओ होइ ॥११२॥  
 रक्खइ वएसु खलियं उवउतो होइ समिइगुत्तीसु ।  
 वज्जइ अवज्जहेउं पमार्यचरियं सुथिरचित्तो ॥११३॥  
 कालंमि अपूणहियं किरियंतरविरहिओ जहासुत्तं ।  
 आयरइ सव्वकिरियं अपमाई जो इह चरित्ती ॥११४॥  
 संघयणादणुरूवं आरंभइ सक्कमेवणुट्टाणं ।  
 बहुलाभमप्पच्छेयं सुयसारविसारओ सुजई ॥११५॥  
 जह तं बहुं पसाहइ निवडइ अस्संजमे दढं न जओ ।  
 जणिउज्जमं बहूणं विसेसकिरियं तहाढवइ ॥११६॥  
 गुरुगच्छुन्नइहेउं कयतित्थपभावणं निरासंसो ।  
 अज्जमहागिरिचरियं सुमरंतो कुणइ सक्किरियं ॥११७॥

सक्रमि नो पमायइ असक्कज्जे पवित्तिमकुणंतो ।  
 सक्कारंभो चरणं विसुद्धमणुपालए एवं ॥११८॥  
 जो गुरुमवमन्नंतो आरंभइ किर असक्कमवि किंचि ।  
 सिवभूइव्व न एसो सम्मारंभो महामोहा ॥११९॥  
 जायइ गुणेषु रागो सुद्धचरित्तस्स नियमओ पवरो ।  
 परिहरइ तओ दोसे गुणगणमालिन्नसंजणणे ॥१२०॥  
 गुणलेसंपि पसंसइ गुरुगुणबुद्धीए परगयं एसो ।  
 दोसल्लेणवि निययं गुणनिवहं निग्गुणं गणइ ॥१२१॥  
 पालइ संपत्तगुणं गुणड्ढसंगे पमोयमुव्वहइ ।  
 उज्जमइ भावसारं गुरुतरगुणरयणलाभत्थी ॥१२२॥  
 सयणोत्ति व सीसोत्ति व उव्वगारित्ति व गणिव्वओ वत्ति ।  
 पडिबंधस्स न हेऊ नियमा एयस्स गुणहीणो ॥१२३॥  
 करुणावसेण नवरं अणुसासइ तंपि सुद्धमग्गमि ।  
 अच्चंताजोगं पुण अरत्तदुट्ठो उवेहेइ ॥१२४॥  
 उत्तमगुणाणुराया कालाइदोसओ अपत्तावि ।  
 गुणसंपया परत्थवि न दुल्लहा होइ भव्वाणं ॥१२५॥  
 गुरुपयसेवानिरओ गुरुआणाराहणंमि तल्लिच्छे ।  
 चरणभरधरणसत्तो होइ जई नन्नहा नियमा ॥१२६॥  
 सव्वगुणमूलभूओ भणिओ आयारपढमसुत्ते जं ।  
 गुरुकुलवासोवस्सं वसेज्ज तो तत्थ चरणत्थी ॥१२७॥  
 एयस्स परिच्चाया सुद्धुंछाइवि न सुंदरं भणियं ।  
 कम्माइवि परिसुद्धं गुरुआणावत्तिणो विति ॥१२८॥

ता धन्नो गुरुआणं न मुयइ नाणाइगुणगणनियानं ।  
 सुपसन्नमणो सययं कयन्नुयं मणसि भावितो ॥१२९॥  
 गुणवं च इमो सुत्ते जहत्थगुरुसइभायणं इट्ठो ।  
 गुणसंपयादरिदो जहुत्तफलदायगो न मओ ॥१३०॥  
 मूलगुणसंपउत्तो न दोसलवजोगओ इमो हेओ ।  
 महुरोवक्कमओ पुण पवत्तियव्वो जहुत्तम्मि ॥१३१॥  
 पत्तो सुसीससदो एव कुणंतेण पंथगेणावि ।  
 गाढप्पमाइणोवि हुं सेल्लासूरिस्स सीसेणं ॥१३२॥  
 एवं गुरुबहुमाणो कयन्नुया सयल्लाच्छगुणवुड्ढी ।  
 अणवत्थापरिहारो हुंति गुणा एवमाईया ॥१३३॥  
 इहरा वुत्तगुणाणं-विवज्जओ तह य अत्तउक्करिसो ।  
 अप्पञ्चओ जणाणं बोहिविघायाइणो दोसा ॥१३४॥  
 बकुसकुसीला तित्थं दोसलवा तेसु नियमसंभविणो ।  
 जइ तेहिं वज्जणिज्जो अवज्जणिज्जो तओ नत्थि ॥१३५॥  
 इय भावियपरमत्था मज्झत्था नियगुरुं न मुंचंति ।  
 सव्वगुणसंपओगं अप्पाणंमि वि अपेच्छंता ॥१३६॥  
 एयं अवमन्नंतो वुत्तो सुत्तंमि पावसमणोत्ति ।  
 महमोहबंधगोवि य खिसंतो अपडितप्पंतो ॥१३७॥  
 सविसेसंपि जयंतो तेसिमवन्नं विवज्जए सम्मं ।  
 तो दंसणसोहीओ सुद्धं चरणं लहइ साहू ॥१३८॥  
 इय सत्तलक्खणधरो होइ चरित्ती तओ य नियमेण ।  
 कल्लाणपरंपरलाभ-जोगओ लहइ सिवसोवखं ॥१३९॥

दुविहंपि धम्मरयणं तरइ नरो धेत्तुमविगलं सो उ ।  
जस्सेगवीसगुणरयणर-संपया सुत्थिया अत्थि ॥१४०॥  
ता सुट्ठु इमं भणियं पुब्बायरिएहिं परहियरएहिं ।  
इगवीसगुणोवेओ जोग्गो सइ धम्मरयणस्स ॥१४१॥  
धम्मरयणोच्चियाणं देसचरित्तीण तह चरित्तीणं ।  
लिंगाइं जाइं समए भणियाइं मुणियतत्तेहिं ॥१४२॥  
तेसि इमो भावत्थो नियमइ विभवाणुसारओ भणियो ।  
सपराणुग्गहहेउं समासओ संतिसूरीहिं ॥१४३॥  
जो परिभावइ एयं सम्मं सिद्धंतगह्भजुत्तीहिं ।  
सो मुत्ति-रमग्गलग्गो कुग्गहगत्तेसु न हु पडइ ॥१४४॥  
इय धम्मरयणपगरणमणुदियहं जे मणंमि भावेंति ।  
ते गल्लियकलिल-पंका नेव्वाणसुहाइं पावेंति ॥१४५॥

॥ इइ धम्मरयणपगरणं ॥



# ॥ मलधारी सिरिहेमचन्दसूरि रइया भवभावना ॥



णमिऊण णमिर सुरवर मणी मउड फुरंत किरण कब्बुरिअं ।  
बहुपुअंकरनियरंकियं व सिरिवीर पय कमलं ॥१॥  
सिद्धंत सिंधुसंगयसुजुत्ति सुत्तीण संगहेऊणं ।  
मुत्ताहलमालंपिव रएमि भवभावाणं विमलं ॥२॥  
संवेअमुवगयाणं भावंतारुणं भवन्नवसरूवं ।  
कमपत्तकेवलाणं जायइ तं चेव पच्चक्खं ॥३॥  
संसारभावणा चालणीइ सोहिज्जमाण भवमग्गे ।  
पावति भव्वजीवा नट्टं वृ विवेयवररयणं ॥४॥  
संसारसरूवं चिय परिभावंतेहिं मुक्कसंगेहिं ।  
सिरिनेमिजिणाईहिवि तह विहिअं धीरपुरिसेहिं ॥५॥  
भवभावणानिस्सेणिं मोत्तुं च न सिद्धिमंदिरारुहणं ।  
भवदुह निव्विण्णाणंवि जायइ जंतूण कइयावि ॥६॥  
तम्हा घरपरियणसयणसंगयं सयल दुक्खसंजणयं ।  
मोत्तुं अट्टज्जाणं भावेज्ज सया भवसरूवं ॥७॥  
भवभावणा यं एसा पढिज्जए बारसण्ह मज्झम्मि ।  
ताओ य भावणाओ बारस एयाओ अणुकमसो ॥८॥

पढमं अणिच्चभावं (१) असंरणयं (२) एगयंच (३) अन्नत्तं  
 (४)संसार (५)मसुइं चिय (६)विविहं लोगस्सहावं च (७)॥९॥  
 कम्मस्स आसवं (८)संवरं च (९)निज्जरण (१०)सुत्तमे यं गुणे ।  
 जिणसासणम्मि (११) बोहिं च दुल्लहं चितए मइमं (१२)॥१०॥  
 सव्वप्पणा अणिच्चो नरलोओ ताव चिट्ठउ असारो ।  
 जीयं देहो लच्छी सुरलोयम्मी वि अणिच्चाइं ॥११॥  
 नइपुल्लिणवालुयाए जह विरइय अलिय करितुरंगेहिं ।  
 घररज्जकप्पणाहि य बाला कीलंति तुट्टमणा ॥१२॥  
 तो सयमवि अन्नेण व भग्गे एयम्मि अहव एमेव ।  
 अन्नऽन्नदिंसि सव्वे वयंती तह चेव संसारे ॥१३॥  
 घररज्ज विहव सयणाइएसु रमिऊण पंच दियहाइं ।  
 वचंति क्किहिपि वि नियय कम्म पलया निलुक्खित्ता ॥१४॥  
 अहवा जह सुमिणय पावियम्मि रज्जाई इट्ठवत्थुम्मि ।  
 खणमेगं हरिसिज्जंति पाणीणो पुण विसीयंती ॥१५॥  
 कइवयदिणलद्धेहिं तहेव रज्जाइएहिं सूसंती ।  
 विगएहिं तेहिं वि पुणो जीवा दीणत्तणमुवेंति ॥१६॥  
 रूपकणयाई वत्थुं जह दीसइ इंदयालविज्जाए ।  
 खणादिट्टनट्टरूवं तह जाणसु विहवमाईयं ॥१७॥  
 संझंभरायसुरचाव विन्ममे घडण विहडणसरूवे ।  
 विहवाइ वत्थुनिवहे किं मुज्झसि जीव ! जाणंतो ? ॥१८॥  
 पासायसालसमलंकियाइं जइ नियसि कत्थइ थिराइं ।  
 गंधव्वपुरवराइं तो तुह रिद्धीवि होज्ज थिरा ॥१९॥

धणसयणबलुम्मत्तो निरत्थयं अप्प ! गन्विओ भमसि ।  
 जं पंचदिणाणुवरिं न तुमं न धगं न ते सयणा ॥२०॥  
 कालेण अंग्तेणं अणंतबलचक्किवासुदेवावि ।  
 पुहईए अक्कंता कोऽसि तुमं ? को य तुह विहवो ? ॥२१॥  
 भवणाइं उववणाइं सयणासणजाणवाहणाईणि ।  
 निच्चाइं न कस्सइ न विय कोइ परिरिक्खिओ तेहिं ॥२२॥  
 मायापिईहिं सहवट्ठिएहिं मित्तेहिं पुत्तदारेहिं ।  
 एगयओ सहवासो पीई पणओ वि य अणिच्चो ॥२३॥  
 बल-रूव-रिद्धि-जोव्वण पडुत्तणं सुभगया अरोयत्तं ।  
 इडेहि य संजोगो असासयं जीवियव्वं च ॥ २४॥  
 इय जं जं संसारे रमणिज्जं जाणिऊण तमणिच्चं ।  
 निच्चम्मि उज्जमेसु धम्मो च्चिय बलिनरिंदो व्व ॥ २५॥  
 रोयजरामच्चु मुहागयाण-बलिचक्कि केसवाणं पि ।  
 भुवणेऽवि नत्थि सरणं एक्कं जिणसासणं भोत्तुं ॥२६॥  
 जरकाससाससोसाइ परिगयं पेच्छिऊण घरसामि ।  
 जाया जणणिप्पमुहं पासगयं झूरइ कुडुम्बं ॥२७॥  
 न विरिंचइ पुण दुक्खं सरणं ताणं च न हवइ खणंपि ।  
 वियणाओ तरस् देहे नवरं वड्ढंति अहियाओ ॥२८॥  
 बहुसयणाण अणाहाण चावि निरुवायवाहि विहुराणं ।  
 दुण्हंपि निव्विसेसा असरणया विलयमाणाणं ॥२९॥  
 विहवीण दरिहाण य सकम्मसंजणिय रोय तवियाणं ।  
 कंदंताण सदुक्खं को णु विसेसो असरणत्ते ? ॥३०॥

तह रज्जं तह विहवो तह चउरंगं बलं तहा सयणा ।  
 कोसंबिपुरीराया न रक्खिओ तहवि रोगाणं ॥ ३१ ॥  
 सविलासजोव्वणभरे वहंतो मुणइ तणसमं भुवणं ।  
 पेच्छइ न उच्छरंतं जराबलं जोव्वणदुमग्गि ॥ ३२ ॥  
 नवनव विलास संपत्तिसुत्थियं जोव्वणं वहंतस्स ।  
 चित्तेऽवि न वसइ इमं थेवंतरमेव जरसेन्नं ॥ ३३ ॥  
 अह अन्नदिणे पलियच्छलेण होऊण कण्णमूलग्गि ।  
 धम्मं कुणसुत्ति कहंति ह्वं निवडइ जराधाडी ॥ ३४ ॥  
 निवडंती य न एसा रक्खिज्जइ चक्किणोऽवि सेन्नेण ।  
 जं पुण न हुंति सरणं धणधन्नाईणि किं चोज्जं ? ॥ ३५ ॥  
 वलिपलियदुरवलोयं गलंतनयणं धुलंतमुहलालं ।  
 रमणीयणहसणिज्जं एइ असरणस्स बुड्ढत्ते ॥ ३६ ॥  
 जरइंदयालिणीए कावि हयासाए असरिसा सत्ती ।  
 कसिणावि कुणइ केसा मालइकुसुमेहिं अविसेसा ॥ ३७ ॥  
 दलइ बलं गलइ सुइं पाडइ दसणे निरुंभए दिट्ठिं ।  
 जररक्खसी बलिणवि भंजइ पिट्ठिंपि सुसिलिट्ठं ॥ ३८ ॥  
 सयणपराभवसेन्नत्तवाउसिंभाइयं जरासेन्नं ।  
 गुरुयाणंपि हु बलमाणखंडणं कुणइ बुड्ढत्ते ॥ ३९ ॥  
 जरभीया य वराया सेवंति रसायणाइ किरियाओ ।  
 गोवंति पलियवलिंण्डकूवे नियजम्ममाईणि ॥ ४० ॥  
 न मुणंति मूढहियया जिणवयणरसायणं च मोत्तूणं ।  
 सेतोवाएहिं निवारिया विहु दुक्कइ पुणोऽवि ॥ ४१ ॥

तो जइ अत्थि भयं ते इमाइ घोराइ जरपिसाईए ।  
 जियसत्तुव्व पवज्जसु सरणं जिणवीरपयकमलं ॥ ४२ ॥  
 समुवट्ठियम्मि मरणे ससंभमे परियणम्मि धावंते ।  
 को सरणं परिचितसु एकं मोत्तूण जिणधम्मं ? ॥ ४३ ॥  
 सयलतिलोयपहूणो उवायविहिजाणगा अणंतब्रला ।  
 तित्थयरावि हु कीरंति कित्तिसेसा कयंतेण ॥ ४४ ॥  
 बहुसत्तिजुओ सुरकोडिपरिवुडो पविपयंडभुयदंडो ।  
 हरिणोव्व हीरइ हरी कयंतहरिणाऽहरियसत्तो ॥ ४५ ॥  
 छक्खंडवसुहसामी नीसेसनरिदपणयपयकमलो ।  
 चक्कहरोऽवि गसिज्जइ सस्सिच्च जमराहुणा विवसो ॥ ४६ ॥  
 जे कोडिसिलं वामेक्ककरयलेणुक्खिवंति तूलं व ।  
 विज्झवइ जमसमीरो तेऽवि पईवव्वऽसुररिउणो ॥ ४७ ॥  
 जइ मच्चुमुहगयाणं एयाणवि होइ किं पी न हु सरणं ।  
 ता कीडयमेत्तेसुं का गणणा इयरलोएसु ? ॥ ४८ ॥  
 जइ पियसि ओसहाइं बंधसि बाहासु पंतथरसयाइं ।  
 कारोसि अगिगहोमं विज्जं मंतं च संतिं च ॥ ४९ ॥  
 अन्नाइंवि कुंटलविंटलाइं भूओवघायजणगाइं ।  
 कुणसि असरणो तहविहु डंकिज्जसि जमभुयंगेण ॥ ५० ॥  
 सिंचइ उरत्थलं तुह अंसुपवाहेण किंपि रुयमाणं ।  
 उवरिट्ठियं कुडुम्बं तंपि सकज्जेकतल्लिच्छं ॥ ५१ ॥  
 धणधन्नरयणसयणाइया य सरणं न मरणयालम्मि ।  
 जायंति जए कस्सवि अन्नत्थवि जेणिमं भणियं ॥ ५२ ॥

अत्थेण नंदराया न रत्खिवओ गोहणेण कुइअन्नो ।  
 धन्नेण तिलयसेट्ठी पुत्तेहिं न ताइओ सगरो ॥ ५३ ॥  
 इय नाऊण असरणं अप्पाणं गयउराहिवसुओव्व ।  
 जर मरण वल्लिविच्छित्तिकारए जयसु जिणधम्मे ॥ ५४ ॥  
 एक्को कम्माइं समज्जिणेइ मुंजइ फलंपि तस्सेक्को ।  
 एक्कस्स जम्ममरणे परभवगमणं च एक्कस्स ॥ ५५ ॥  
 सयणाणं मज्झगओ रोगाभिहओ किलिस्सइ अहेगो ।  
 सयणोऽविय से रोगं न विरिंचइ ने य अवणेइ ॥ ५६ ॥  
 मज्झम्मि बंधवाणं सकरुणसद्देण पलवमाणानं ।  
 मोत्तुं विहवं सयणं च मच्चुणा हीरण एक्को ॥ ५७ ॥  
 पत्तेयं पत्तेयं कम्मफलं निययमणुहवंताणं ।  
 को कस्स जए सयणो ? को कस्स परजणो एत्थ ? ॥ ५८ ॥  
 को केण समं जायइ ? को केण समं परं भवं वयइ ।  
 को कस्स दुहं गिण्हइ ? मयं च को कं नियत्तेइ ? ॥ ५९ ॥  
 अणुसोयइ अन्नजणं अन्नभवंतरगयं च बालजणो ।  
 न य सोयइ अप्पाणं किलिस्समाणं भवे एकं ॥ ६० ॥  
 पायाइं बहुविहाइं करेइ सुयसयणपरियणणमित्तं ।  
 निरयम्मि दारुणाओ एक्कोच्चिय सहइ वियणाओ ॥ ६१ ॥  
 कूडक्कय परवंचणवीससियवहा य जाण कज्जम्मि ।  
 पावं कयमिण्ह ते ण्हाया धोया तडम्मि ठिया ॥ ६२ ॥  
 एक्कोच्चिय पुण भारं वहेइ ताडिज्जए कसाईहिं ।  
 उप्पण्णो तिरिएसुं महिसतुरंगाइजाईसु ॥ ६३ ॥

दुदुकुडुम्बरस कए करेइ नाणाविहाइं पावाइं ।  
 भवचक्कम्मि भमंतो एक्कोच्चिय सहइ दुक्खाइं ॥ ६४ ॥  
 सयणाइवित्थरो मह एत्तियमेत्तोत्ति हरिसियमणेण ।  
 ताण निमित्तं पावाइं जेण विहियाइं विविहाइं ॥ ६५ ॥  
 नरय तिरियाइएसुं तस्सवि दुक्खाइं अणुहवंतस्स ।  
 दीसइ न कोऽवि वीओ जो अंसं गिण्हइ दुहस्स ॥ ६६ ॥  
 भोत्तूण चक्किरिद्धि वसिउं उक्खंडवसुहमज्झम्मि ।  
 एक्को वच्चइ जीवो मोत्तूं विहवं च देहं च ॥ ६७ ॥  
 एक्को पावइ जम्मं वाहिं वुट्टत्तणं च मरणं च ।  
 एक्को भवंतरेसुं वच्चई को कस्स किर वीओ ? ॥ ६८ ॥  
 इय एक्कोच्चिय अप्पा जाणिज्जसु सासओ तिहुयणेऽवि ।  
 थक्कंति महुनिवस्स व जणकोडीओ विसेसाओ ॥ ६९ ॥  
 अन्नं इमं कुडुम्बं अन्ना लच्छी सरीरमवि अन्नं ।  
 मोत्तुं जिणिं दधम्मं न भवंतरगामिओ अन्नो ॥ ७० ॥  
 विन्नाया भावाणं जीवो देहाइयं जडं वत्थुं ।  
 जीवो भवंतरगई थक्कंति इहेव सेसाइं ॥ ७१ ॥  
 जीवो निच्चसहावो सेसाणि उ भंगुराणि वत्थूणि ।  
 विहवाइ बज्झहेउव्वभवं च निरहेउओ जीवो ॥ ७२ ॥  
 बंधइ कम्मं जीवो भुंजेइ फलं तु सेसयं तु पुणो ।  
 धणसयणपरियणाइं कम्मस्स फलं च हेउं च ॥ ७३ ॥  
 इय भिन्नसहावत्ते का मुच्छा तुज्झ विहवसयणेसु ? ।  
 किं वावि होज्जिमेहिं भवंतरे तुह परित्ताणं ? ॥ ७४ ॥

भिन्नंते भावाणं उवयारऽवयारभावसंदेहे ।  
 किं सयणेसु ममत्तं ? को य पओसो परजणम्मि ? ॥ ७५ ॥  
 पवणोव्व गयणमग्गे अलक्खिओ भमइ भववणे जीवो ।  
 ठाणे ठाणम्मि समज्जिऊण धणसयणसंघाए ॥ ७६ ॥  
 जह वसिऊणं देसियकुडीइ एक्काइ विविहपंथियणो ।  
 वच्चइ पभायसमए अन्नअन्नदिसासु सव्वोऽवि ॥ ७७ ॥  
 जहवा महल्लरुक्खे पओससमए विहंगमकुलाइं ।  
 वसिऊण जंति सूरोदयम्मि ससमीहियदिसासु ॥ ७८ ॥  
 अहवा गावीओ वणम्मि एगओ गोवसन्निहाणम्मि ।  
 चरिउं जह संझाए अन्नन्नघरेसु वच्चंति ॥ ७९ ॥  
 इयकम्मपासबद्धा विविहट्ठाणेहिं आगया जीवा ।  
 वसिउं एगकुडुम्बे अन्नन्नगईसु वच्चंति ॥ ८० ॥  
 इय अन्नत्तं परिचिंतिऊण घरघरणिसयण पडिबंधं ।  
 मोत्तूण नियसहाए धणोव्व धम्मम्मि उज्जमसु ॥ ८१ ॥  
 नारयतिरियनरामरगईहिं चउहा भवो विणिदिट्ठो ।  
 तत्थ य निरयगईए सरूवमेवं विभावेज्जा ॥ ८२ ॥  
 रयणप्पभाइयाओ एयाओ तीइ सत्त पुढविओ ।  
 सव्वाओ समंतेणं अहो अहो वित्थरंतीओ ॥ ८३ ॥  
 तीस पणवीस पनरस दसलक्खा तिन्नि एग पंचूणं ।  
 पंच य नरगावासा चुलसीइलक्खाइं सव्वासु ॥ ८४ ॥  
 तेणं नरयावासा अंतो वट्टा बहिं तु चउरंसा ।  
 हेट्ठा खुरूप्प संठाणसंठिया परमदुग्गंधा ॥ ८५ ॥

असुई निच्चपइट्टियपूयवसा मंसरुहिरचिक्खिह्ला ।  
 धूमप्पभाइ किंचिवि जाव निसग्गेण अह उस्सिणी ॥ ८६ ॥  
 परओ निसग्गओ च्चिय दुसहमहासीयवेयणाकलिया ।  
 निच्चंधयारतमसा नीसेसदुहायरा सव्वे ॥ ८७ ॥  
 जइ अमरगिरिसमाणं हिमपिंडं कोऽवि उस्सिणनरएसु ।  
 खिवइ सुरो तो खिप्पं वच्चइ विलयं अपत्तोऽवि ॥ ८८ ॥  
 धमिय कयअग्गिवन्नो मेरुसमो जइ पडेज्ज अयगोलो ।  
 परिणामिज्जइ सीएसु सोऽवि हिमपिंडरूवेण ॥ ८९ ॥  
 अइकट्ठिणवज्जकुड्डा होंति समंतेण तेसु नरएसु ।  
 संकडमुहाइं घडियालयाइं किर तेसु भणियाइं ॥ ९० ॥  
 मूढा य महारंभं अइघोरपरिग्गहं पणिंदिवहं ।  
 काऊण इहऽन्नाणिवि कुणिमाहाराइं पावाइं ॥ ९१ ॥  
 पावभरेणोक्कंता नीरे अयगोलउव्व गयसरणा ।  
 वच्चंति अहो जीवा निरए घडियालयाणंतो ॥ ९२ ॥  
 अंगुलअसंखभागो तेसि सरीरं तहिं हवइ पढमं ।  
 अंतोमुहुत्तमेत्तेण जायए तंपि हु महल्लं ॥ ९३ ॥  
 णिडिज्जइ सो तत्तो घडियालयसंकडे अमायंतो ।  
 पीलिज्जंतो हत्थिव्व घाणए विरसमारसइ ॥ ९४ ॥  
 तं तह उप्पण्णं पासिरूण धावंति हट्टतुट्टमणा ।  
 रे रे गिण्हह गिण्हह एयं दुट्ठंति जंपंता ॥ ९५ ॥  
 छोल्लिज्जंतं तह संकडाउ जंताओ वंससलियं व ।  
 धरिऊण खुरे कड्ढंति पलवमाणं इमे देवा ॥ ९६ ॥

अंबे अंबरिसी चेव, सामे य सबलेत्तिय ।  
 रूद्दोवरुद्द काले य, महाकालेत्ति आवरे ॥ ९७ ॥  
 असि पत्तेधणू कुंभे, वालू वेयरणित्ति य ।  
 खरस्सरे महाघोसे, पनरस परमाहम्मिया ॥ ९८ ॥  
 एए य निरयपाला धावंति समंतओ य कलयलंता ।  
 रे रे तुरियं मारह छिंदह भिदह इमं पावं ॥ ९९ ॥  
 इय जंपंता बावल्लभल्लिसेल्लेहिं खग्गकुंतेहिं ।  
 नीहरमाणं विंधंति तह य छिंदंति निक्करुणा ॥ १०० ॥  
 निवडंतोऽवि हु कोइवि पढमं खिप्पइ महंतसूलाए ।  
 अप्फालिज्जइ अन्नो वज्जसिला कंटयसमूहे ॥ १०१ ॥  
 अन्नो वज्जग्गिचियासु खिप्पए विरस मारसंतोऽवि ।  
 अंबाईणऽसुराणं एत्तो साहेमि वावारं ॥ १०२ ॥  
 आराइएहिं विंधंति मोग्गराईहिं तह निसुंभंति ।  
 धाडंति अंबरयले मुंचंति य नारए अंबा ॥ १०३ ॥  
 निहए य तह निसन्ने ओहयचित्ते विचित्तखंडेहिं ।  
 कप्पंति कप्पणीहिं अंबरिसी तत्थ नेरतिए ॥ १०४ ॥  
 साडण पाडण तोत्तयविंधण तह रज्जतलपहारेहिं ।  
 सामा नेरतित्ताणं कुणंति तिन्वाओ वियणाओ ॥ १०५ ॥  
 सबला नेरयियाणं उयराओ तह य हिययमज्जाओ ।  
 कड्ढंति अंतवसमंसफिप्फिए छेदिउं बहुसो ॥ १०६ ॥  
 छिंदंति असीहिं तिसूलसूलसुइसत्तिकुंततुमरेसु ।  
 पोयंति चियासु दहंति निदयं नारए रुद्धा ॥ १०७ ॥

भंजंति अंगुवंगाणि ऊरू बाहू सिराणि करचरणे ।  
 कप्पंति खंडखंडं उवरुद्वा निरयवासीणं ॥ १०८ ॥  
 मीरासु सुंठिएसुं कंडूसु य पयणगेसु कुम्मीसु ।  
 लोहिसु य पलवंते पयंति काळा उ नेरइए ॥ १०९ ॥  
 छेत्तूण सीहपुच्छगिईणि तह कागिणिप्पमाणाणि ।  
 खावंति मंसखंडाणि नारए तत्थ महकाला ॥ ११० ॥  
 हत्थे पाए ऊरू बाहु सिरा तह य अंगुवंगाणि ।  
 छिंदंति असी असिमाइएहिं निच्चंपि निरयाणं ॥ १११ ॥  
 पत्तधणुनिरयपाला असिपत्तवणं विउव्वियं काउं ।  
 दंसंति तत्थ छायाहिलासिणो जंति नेरतिया ॥ ११२ ॥  
 तो पवणचलित-तरुनिवडिएहिं असिमाइएहिं किर तेसिं ।  
 कण्णोट्टनासकर-चरणऊरूमाइणि छिंदंति ॥ ११३ ॥  
 कुंभेसु पयणगेसु य सुंठेसु य कंदुलोहिकुम्भीसु ।  
 कुम्मीओ नारए उक्कलंततेल्लाइसु तलंति ॥ ११४ ॥  
 तडयडरवफुट्टंते चणयव्व कयंबवालुया नियरे ।  
 भुंजंति नारए तह वालुयनामा निरयपाला ॥ ११५ ॥  
 वसुपूयरुहिरकेसट्टिवाहिणि कलयलंतजउसोत्तं ।  
 वेयरणि नाम नइं अइखारुसिणं विउव्वेउं ॥ ११६ ॥  
 वेयरणि नरयपाला तत्थ पवाहंति नारए दुहिए ।  
 आरोवंति तहिं पिट्टु तत्ताए लोहनावाए ॥ ११७ ॥  
 नेरइए चेव परोत्परंपि परसूहिं तच्छयंति दढं ।  
 करवत्तेहि य फाडंति निदयं मज्झमज्जेण ॥ ११८ ॥

वियराल वज्जकंटयभीममहासिबलीसु य खिवंति ।  
 पलवते खरसहं खरस्सरा निरयपालत्ति ॥ ११९ ॥  
 पसुणो व्व नारए वहभएण भीए पलायमाणे य ।  
 महघोसं कुणमाणा रंमंति तहिं महाघोसा ॥ १२० ॥  
 तह फालियावि उक्कत्तियावि तलियावि छिन्नभिन्नावि ।  
 दड्ढा भुग्गा मुडिया य तोडिया तह विलीणा य ॥ १२१ ॥  
 पावोदएण पुणरवि मिलंति तह चेंव पारयरसोव्व ।  
 इच्छंतावि हु न मरंति कहवि हु ते नारयवराया ॥ १२२ ॥  
 पभणंति तओ दीणा मा मा मारेह सामि! पहु! नाह! ।  
 अइदुसहं दुक्खमिणं पसियह मा कुणह एत्ताहे ॥ १२३ ॥  
 एवं परमाहम्मियपाएसु पुणो पुणोऽवि लग्गंति ।  
 दंतेहिं अंगुलीओ गिण्हंति भणंति दीणाइं ॥ १२४ ॥  
 तत्तो य निरयपाला भणंति रे अज्ज दूसहं दुक्खं ।  
 जइया पुण पावाइं करेसि तुट्ठो तथा भणसि ॥ १२५ ॥  
 णत्थि जए सव्वन्नू अहवा अहमेव एत्थ सव्वविऊ ।  
 अहवावि खाह पियह य दिट्ठो सो केण परलोओ ? ॥ १२६ ॥  
 नत्थि व पुण्णं पावं भूयऽब्भहिओ य दीसइ न जीवो ।  
 इच्चाइ भणसि तइया वायालत्तेण परितुट्ठो ॥ १२७ ॥  
 मंसरसम्मि य गिट्ठो जइया मारेसि निग्घिणो जीवो ।  
 भणसि तथा अम्हाणं भक्खमियं निम्मियं विहिणा ॥ १२८ ॥  
 वेयविहिया न दोसं जणेइ हिंसत्ति अहव जंपेसि ।  
 चरचरचरस्स तो फालिऊण खाएसि परमंसं ॥ १२९ ॥

लावयतित्तिरअंडथरसवसमाईणि पियसि अइगिद्धो ।  
 इण्हि पुण पोक्कारसि अइदुसहं दुक्खमेयंति ॥ १३० ॥  
 अलिण्हिं वंचसि तथा कूडक्कयमाइएहि मुद्धजणं ।  
 पेसुन्नाईणि करेसि हरिसिओ पलवसि इयाणिं ॥ १३१ ॥  
 तइया खणेसि खत्तं घायसि वीसंभियं मुससि लोयं ।  
 परधणलुद्धो बहुदेसगामनगराइं भंजेसि ॥ १३२ ॥  
 तणावि पुरिसयारेण विणडिओ मुणसि तणसमं भुवणं ।  
 परदव्वाण विणासे य कुणसि पोक्करसि पुण इण्हिं ॥ १३३ ॥  
 मा हरसु परधणाइंति चोइओ भणसि धिट्ठयाए य ।  
 सव्वस्स वि परकीयं सहोयरं कस्सइ न दव्वं ॥ १३४ ॥  
 तइया परजुवईणं चोरियरमियाइं मुणसि सुहियाइं ।  
 अइत्तोऽवि य तासिं मारसि भत्तारपमुहे य ॥ १३५ ॥  
 सोहग्गेण य नडिओ कूडविलासे य कुणसि ताहिं समं ।  
 इण्हिं तु तत्तंतवयधिउल्लियाणं पलाएसि ॥ १३६ ॥  
 परकीयच्चिय भज्जा जुज्जइ निययाइ माइ-भगिणीओ ।  
 एवं च दुव्वियड्ढत्तगव्विओ वयसि सिक्खविओ ॥ १३७ ॥  
 पिंडेसि असंतुट्ठो बहुपावपरिग्गहं तथा मूढो ।  
 आरंभेहि य तूससि रूससि किं एत्थ दुक्खेहिं ? ॥ १३८ ॥  
 आरंभपरिग्गहवज्जियाण निव्वहइ अम्ह न कुडुम्भं ।  
 इय भणियं जस्स कए आणसु तं दुहविभागत्थं ॥ १३९ ॥  
 भरिउं पिपीलियाईण सीवियं जइ मुहं तुहऽम्हेहिं ।  
 तो होसि पराहुत्तो भुंजसि रयणीई पुणमिट्ठं ॥ १४० ॥

पियसि सुरं गायंतो वक्खाणंतो भुयार्हि नच्चंतो ।  
 इह तत्तेलतंबयतऊणि किं पियसि न ? हयास ! ॥ १४१ ॥  
 सूलारोवण-नेत्तावहाइकरचरणछेयमाईणि ।  
 रायनिओए कुंठत्तेणेण लंचाइगहणाइं ॥ १४२ ॥  
 नयरारक्खिय भावे य बंधवहाहणणजायणाईहिं ।  
 नाणाविहपावाइं काउं किं कंदसि इयाणि ? ॥ १४३ ॥  
 गुरुदेवाणुवहासो विहिया आसायणा वयं भग्गं ।  
 लोओ य गामकूडत्तणाइभावेसु संतविओ ॥ १४४ ॥  
 इय जइ नियहत्थारोवियस्स तरसेव पावविडविस्स ।  
 भुंजसि फलाइं रे दुट्ठ ! अम्ह ता एत्थ को दोसो ? ॥ १४५ ॥  
 इच्चाइ पुव्वभवदुक्कयाइं सुमराविउं निरयपाला ।  
 पुणरवि वियणाउ उईरयंति विविहप्पयारेहिं ॥ १४६ ॥  
 उक्कत्तिऊण देहाउ ताण मंसाइं चडफडंताणं ।  
 ताणं चिय वयणे पक्खिवंति जलणम्मि भुंजेउं ॥ १४७ ॥  
 रे रे तुह पुव्वभवे संतुट्ठी आसि मंसरसएहिं ।  
 इय भणिउं तरसेव य मंसरसं गिण्हिउं देंति ॥ १४८ ॥  
 चउपासम्हिलिअ वणदव महंत जालावलीहिं डज्जंता ।  
 सुमराविज्जंति सुरेहिं नारया पुव्वदवदाणं ॥ १४९ ॥  
 आहेडयचेट्ठाओ संभारेउं बहुप्पयाराओ ।  
 बंधंति पासएहिं खिवंति तह वज्जकूडेसु ॥ १५० ॥  
 पाडंति वज्जमयवागुरासु पिट्ठंति लोहलउडेहिं ।  
 सूलग्गे दाऊणं भुंजंति जलंतजलणम्मि ॥ १५१ ॥

उल्लंबिऊण उप्पि अहोमुहे हेट्ट जलियजलणम्मि ।  
 काऊण भडित्तखंडं सोऽवि विकत्तंति सत्थेहिं ॥ १५२ ॥  
 पहरंति चवेडाहिं चित्तयवयवग्घसीह रूवेहिं ।  
 कुट्टंति कुहाडेहिं ताण तणुं खयरकट्टं व ॥ १५३ ॥  
 कयवज्जतुंड बहुविह विहंगरूवेहिं तिक्खचंचूर्हिं ।  
 अच्छे खुड्ढंति सिरं हणंति चुंटंति मंसाइं ॥ १५४ ॥  
 अगणिवरिसं कुणंते मेहे वेउव्वियम्मि नेरइया ।  
 सुरकय पव्वयगुहमणुसरंति निज्जलिय सव्वंगा ॥ १५५ ॥  
 तत्थवि पडंति पव्वयसिल्लासमूहेण दलियसव्वंगा ।  
 अइकरुणं कंदंता पप्पडपिट्ठ व कीरंति ॥ १५६ ॥  
 तिरियाणऽइमारारोवणाइं सुमराविऊण खंधेसुं ।  
 चडिऊण सुरा तेसिं भरेण भंजंति अंगाइं ॥ १५७ ॥  
 जेसिं च अइसएणं गिद्धी सहाइएसु विसएसु ।  
 आसि इहं ताणंपि हु विवागमेयं पयासंति ॥ १५८ ॥  
 तत्ततउमाइयाइं खिवंति सवणेसु तह य दिट्ठीए ।  
 संतावुव्वेयविघायहेउरूवाणि दंसंति ॥ १५९ ॥  
 वसमंसजलणमुम्मुरपमुहाणि विलेवणाणि उवणेंति ।  
 उप्पाडिऊण संदंसएण दसणे य जीहं च ॥ १६० ॥  
 तत्तो भीमभुयंगम पिवील्लियाईणि तह य दन्वाणि ।  
 असुईउ अणंतगुणे असुहाइं खिवंति वयणम्मि ॥ १६१ ॥  
 सोवंति वज्जकंटयसेज्जाए अगणिपुत्तियाहिं समं ।  
 परमाहम्मिय जणियाउ एवमाई य वियणाओ ॥ १६२ ॥

एसो मह पुव्ववेरित्ति नियमणे अलियमवि विगप्पेउं ।  
 अवरोप्परंपि घायंति नारया पहरणाईहिं ॥ १६३ ॥  
 सीउसिणाई वियणा भणिया अन्नावि दसविहा समए ।  
 खेत्ताणुभावजणिया इय तिविहा वेयणा नरए ॥ १६४ ॥  
 तत्तो कसिणसरीरा वीभच्छ असुइणो सडियदेहा ।  
 नीहरिय अन्तमाला भिन्नकवाला लुलंगा य ॥ १६५ ॥  
 दीणा सव्वनिहीणा नपुंसगा सरणवज्जिया खीणा ।  
 चिट्ठंति निरयवासे नेरइया अहव किं बहुणा ? ॥ १६६ ॥  
 अच्छिनिमीलनमेत्तं नत्थि सुहं दुक्खमेव अणुबद्धं ।  
 नरए नेरइयाणं अहोनिंसिं पच्चमाणाणं ॥ १६७ ॥  
 तत्थ य सम्मदिट्ठी पायं चिंतंति वेयणाऽभिहया ।  
 मोत्तु कम्माइं तुमं मा रूससु जीव ! जं भणियं ॥ १६८ ॥  
 सव्वो पुव्वकयाणं कम्माणं पावए फलविवागं ।  
 अवराहेसु गुणेषु य निमित्तमेत्तं परो होइ ॥ १६९ ॥  
 धारिज्जइ एंतो जलनिहीवि कल्लोलभिन्नकुलसेलो ।  
 न हु अन्नजम्मनिम्मिय सुहासुहो देव्वपरिणामो ॥ १७० ॥  
 अकयं को परिभुंजइ ? सकयं नासेज्ज करस किर कम्मं ? ।  
 सकयमणुभुंजमाणे कीस जणो दुम्मणो होइ ? ॥ १७१ ॥  
 दुप्पत्थिओ अमित्तं अप्पा सुप्पत्थिओ हवई मित्तं ।  
 सुहुदुक्खकारणाओ अप्पा मित्तं अमित्तं वा ॥ १७२ ॥  
 वारिज्जंतो वि हु गुरुयणेण तइया करेसि पावाइं ।  
 सयमव किणियदुक्खो रूससि रे जीव ! कस्सिण्ह ? ॥ १७३ ॥

सत्तमियाउ अन्ना अट्टमिया नत्थि निरय पुढ वित्ति ।  
 एमाइ कुणसि कूडुत्तराइं इण्हि किमुब्बयसि ? ॥ १७४ ॥  
 इय चिंताए बहुवेयणाहिं खविऊण असुहकम्माइं ।  
 जायंयंति रायभुवणाइ एसु कमसो य सिज्झंति ॥ १७५ ॥  
 अन्ने अवरोप्पर कलह भावओ तहय कोवकरणेणं ।  
 पावंति तिरियभावं भमंति तत्तो भवमणंतं ॥ १७६ ॥  
 पाणिवहेणं भीमो कुणिमाहारेण कुंजरनरिंदो ।  
 आरंभेहि य अयलो नरयगईए उदाहरणा ॥ १७७ ॥  
 एवं संखेवेणं निरयगई वन्निया तओ जीवा ।  
 पाएण होंति तिरिया तिस्सियगई तेणऽओ वोच्छं ॥ १७८ ॥  
 एगिंदिय विगल्लिंदिय पंचिंदिय भेयओ तहिं जीवा ।  
 परमत्थओ य तेसिं सरूवमेवं विभावेज्जा ॥ १७९ ॥  
 पुढवीफोडण संचिणणहल्लमलखणणाइदुत्थिया निच्चं ।  
 नीरंपि पियण तावण घोलण सोसाइ कय दुक्खं ॥ १८० ॥  
 अगणी खोट्टण चूरण जलाइ सत्थेहिं उट्थियसरीरा ।  
 वाऊ वीयण पिट्टण उसिणाणिल सत्थकयदुत्थो ॥ १८१ ॥  
 छेयण सोसण भंजण कंदणदढ दल्लण चलण मल्लणेहिं ।  
 उल्लूरणउम्भूल्लण दहणेहि य दुविस्वया तरुणो ॥ १८२ ॥  
 गोला होंति असंखा होंति निगोया असंखया गोले ।  
 एक्कवा य निगोदो अणतजीवो मुणेयन्वो ॥ १८३ ॥  
 एगूसासम्मि मओ सतरस वाराउऽणंतखुत्तोऽवि ।  
 खोल्लग भवगहणाऊ एएसु निगोयजीवसु ॥ १८४ ॥

पुत्ताइसु पडिबद्धा अन्नाणपमाय संगया जीवा ।  
 उत्पज्जति धणप्पियवणि उव्वेगिदिएसु बहं ॥ १८५ ॥  
 विगल्लिंदिया अवत्तं रसंति सुन्नं भमंति चिट्ठंतं ।  
 लोलंति घुलंति खलंति जंति निहणंपि छुहवसगा ॥ १८६ ॥  
 जिणधम्मवहासेणं कामासत्तीइ हिययसढयाए ।  
 उम्मग्ग देसणाए सयावि केलीकिलत्तेण ॥ १८७ ॥  
 कूडक्कय अलिणं परपरिवाएणं पिसुणयाए य ।  
 विगल्लिंदिएसु जीवा वच्चंति पियंगुवणिओव्वं ॥ १८८ ॥  
 पंचिदियतिरियावि हु सीयायवतिव्व छहपिवासाहिं ।  
 अन्नोऽन्नगसणताडण भारुव्वहणाइसंतविया ॥ १८९ ॥  
 पिट्ठं घट्ठं किमिजाल संगयं परिगयं च मच्छीहि ।  
 वाहिज्जंति तहावि हु रासहवसहाइणो अवसा ॥ १९० ॥  
 बाहेऊण सुबहुयं बद्धा कीलेसु छुह पिवासेहिं ।  
 वसहतुरगाइणो खिज्जऊण सुइरं विवज्जंति ॥ १९१ ॥  
 आराकसाइघाएहिं ताडिया तडतडत्ति फुट्ठंति ।  
 अणवेक्खिय सामत्था भरम्मि वसहाइणो जुत्ता ॥ १९२ ॥  
 धणदेवसेट्ठिवसहो कंबलसबला य एत्थुदाहरणं ।  
 भरवहण सुहपिवासाहिं दुक्खिया मुक्कनियजीवा ॥ १९३ ॥  
 निदयकसपहर फुडंतजंघवसगाहिं गलियरुहिरोहा ।  
 जलभर संपूरिय गुरु तडंग भज्जंत पिट्ठंगा ॥ १९४ ॥  
 निग्गयजीहा पगलंतलोयणा दीहरच्छियग्गीवा ।  
 वाहिज्जंता महिसा पेच्छसु दीणं पलोयंति ॥ १९५ ॥

विहियपमाया केवलसुहेसिणो लुत्तपरधणा विगुणा ।  
 वाहिज्जंते महिसत्तणम्मि जह खुड्डुओ विवसो ॥ १९६ ॥  
 काउं कुडुंबकज्जे समुद्वणिओव्व विविहपावाइं ।  
 मारेउं महिसत्ते मुंजइ तेणवि कुडुंवेण ॥ ११७ ॥  
 उयरे उंटकरं कं पट्टीएँ भरो गलम्मि कूवो य ।  
 उड्डं मुंचइ पोक्करइ तहावि वाहिज्जए करहो ॥ ११८ ॥  
 नासाएँ समं उट्टं बंधेउं सेल्लियं च खिविऊण ।  
 लज्जूए अ खिविज्जइ करहो विरसं रसंतोऽवि ॥ ११९ ॥  
 गिम्हम्मि मरुत्थलवालयासु जलगो सिणासु खिज्जंतो ।  
 गरुयंपि हु वहइ भरं करहो नियकम्मदोसेण ॥ २०० ॥  
 जिणमयमसदहंता दंभपरा परधणेक्कलुद्धमणा ।  
 अंगारसूरिपमुहा लहंति करहत्तणं बहुसो ॥ २०१ ॥  
 जीवंतस्सवि उक्कित्तुं ह्वि उंदिऊण मंसाइं ।  
 खद्धाइं जं अणज्जेहिं पसुभवे किं न तं सरसि ? ॥ २०२ ॥  
 गलयं छेत्तूण कत्तियाइ उल्लंबिऊण पाणेहिं ।  
 धेत्तुं तुह चम्ममंसं अणंतसो विक्कियं तत्थ ॥ २०३ ॥  
 दिन्नो बलीएँ तह देवयाण विरसाइं बुब्बुयंतोऽवि ।  
 पाहुणणिसिभोयणेसु य कओ सि तो पोसिउं बहुसो ॥ २०४ ॥  
 धम्मच्छलेण केहिंवि अन्नाणंधेहिं मंसगिद्धेहिं ।  
 निहओ निरुद्धसत्तो गलयं बलिऊण जन्नेसु ॥ २०५ ॥  
 ऊरणयङ्गालगामाईं निराउहा नाहवज्जिया दीणा ।  
 मुंजति निग्घणेहिं दिज्जति बलीसु य न वग्घा ॥ २०६ ॥

पसुघाएणं नरगाइएसु आहिंडिऊण पसुजम्मे ।  
 महुविप्पोव्व हणिज्जइ अणंतसो जाल्माईसु ॥ २०७ ॥  
 रत्ने दवग्गिजालावलीहिं सव्वंगसंपलित्ताणं ।  
 हरिणाण ताण सह दुक्खियाण को होइ किर सरणं ? ॥ २०८ ॥  
 निहयपारिद्धियनिसियसेल्लनिब्भिन्नखिन्न देहेण ।  
 हरिणत्तणंमिर सरसु जीव ! जं विसहियं दुक्खं ॥ २०९ ॥  
 ब्रद्धो पासे कूडेसु निवडिओ वागुरासु संमूढो ।  
 पच्छ अवसो उक्कत्तिऊण कह कह न खद्धोसि ? ॥ २१० ॥  
 सरपहरवियारियउयरगलियगुज्झं पलोइउं हरिणिं ।  
 सयमवि य पहरविहुरेण सरसु न हु जूरियं हियए ॥ २११ ॥  
 मायावाहसमारद्ध-नोरिगेयज्जुणीसु मुज्झंतो ।  
 सवणावहिओ अन्नाणमोहिओ पाविओ निहणं ॥ २१२ ॥  
 दट्ठूण कूडहरिणिं फासिंदिय भोलिओ तहिं गिद्धो ।  
 विद्धो बाणेण उरम्मि घुम्मिउं निहणमणुपत्तो ॥ २१३ ॥  
 चित्तयमइंदकमनिसियनहरखरपहरविहुरियंगरस ।  
 जह तुह दुहं कुरंगत्तणंमि तं जीव ! किं भणिमो ? ॥ २१४ ॥  
 वइविवरविहियंणपो गत्तासूलाइ निवडिओ संतो ।  
 जवचणयचरणगिद्धो विद्धो हिययम्मि सूलाहिं ॥ २१५ ॥  
 मत्तो तत्थेव य नियपमायओ निहयरुक्खगयासिंगो ।  
 सुबहुं वेल्लंतो जं मओऽसि तं किं न संभरसि ? ॥ २१६ ॥  
 गिम्हे कंताराइसु तिसिओ माइण्हयाइ हीरंतो ।  
 मरइ कुरंगो फुट्टंतलयणो अहव थेवजले ॥ २१७ ॥

हरिणो हरिणीमै कए न पियइ हरिणीवि हरिणकज्जेण ।  
 तुच्छजले बुडुमुहाइं दोवि समयं विवन्नाइं ॥ २१८ ॥  
 एथ य हरिणत्ते पुप्फचूलकुमरेण जह सभज्जेण ।  
 दुहमणुभूयं तह सुणसु जीव ! कहियं महरिसीहिं ॥ २१९ ॥  
 पज्जलियजलगजालासु उवरि उलंबिऊण जीवंतो ।  
 भुत्तोऽसि भुंजिउं सूयरत्तेणे किह न तं सरसि ? ॥ २२० ॥  
 गहिऊण सवणमुच्छल्लिऊण वामाओ दाहिणगमम्मि ।  
 सुणयम्मि तओ तत्थवि विद्धो सेल्लेण निहणगओ ॥ २२१ ॥  
 उप्पन्नरस पिउस्सवि भवपरियत्तीइ सूयरत्तेण ।  
 पिट्ठिमंसक्खाईं रायसुओ बोहिओ मुणिणा ॥ २२२ ॥  
 लुद्धो फासंमि करेणुयाए वारीएँ निवडिओ दीणो ।  
 झिज्जइ दंती नाडयनियंतिओ सुक्खरुक्खम्मि ॥ २२३ ॥  
 विंझरमियाइं सरिउं झिज्जंतो निविडसंकलाबद्धो ।  
 विद्धो सिरम्मि सियअंकुसेण वसिओ सि गयजम्मे ॥ २२४ ॥  
 सोऊण सीहनायं पुट्ठिविपि विमुक्क जीवियासस्स ।  
 निवडंतसीहनहस्स तत्थ किं तुह दुइं कहिमो ? ॥ २२५ ॥  
 भिसिणाविसाइं सल्लइ-दलाइं सरिऊण जुन्नघासरस ।  
 कवले गिण्हंतो आरियाइहिं कहकह न विद्धोसि ? ॥ २२६ ॥  
 पडिक्कुंजरकटिणचिहुट्ट दसणक्खयगलियपूयरुहिरोहो ।  
 परिसक्किरकिमिजालो गओसि तत्थेव पंचत्तं ॥ २२७ ॥  
 जूहवइत्ते पज्जलियवणदावे निरवलंबचरणस्स ।  
 मेहकुमारस्स व दुहमणंतसो तुह समुप्पन्नं ॥ २२८ ॥

जाले बद्धो सत्येण छिदिउं हुयवहम्मि परिमुक्को ।  
 भुत्तो य अगजेहि जं मच्छभवे तयं सरसु ॥ २२९ ॥  
 छेत्तूण निसियसत्येण खंडसो उक्कलंततेल्लम्मि ।  
 तल्लिऊण तुद्धहियएहि हंत भुत्तो तहिं चेव ॥ २३० ॥  
 जीवं णोऽवि हु उवरिं दाउं दहणस्स दीणहियओ य ।  
 काऊण भडित्तं भुंजिओऽसि तेहिं चिय तहिंपि ॥ २३१ ॥  
 अन्नोऽन्नगसणवावार निरय अइकूरं जलयरारद्धो ।  
 तसिओ गसिओ मुक्को लुक्को दुक्को य गिलिओ य ॥ २३२ ॥  
 विडिसग्गनिसिय आमिसलवल्लुद्धो रसणपरवसो मच्छो ।  
 गलए विद्धो सत्येण छिदिउं भुंजिउं भुत्तो ॥ २३३ ॥  
 पियपुत्तोऽवि हु मच्छत्तंगंपि जावो खुसित्तगहवइणा ।  
 विडिसेण गले गहिओ मुणिणा मोयाविओ कहवि ॥ २३४ ॥  
 पक्खिभवेसु गसंतो गसिज्जमाणो य सेसपक्खीहिं ।  
 दुक्खं उप्पायंतो उप्पन्नदुहो य भमिओसि ॥ २३५ ॥  
 खरचरणचवेडाहि य चंचुंपहारेहिं निहणमुवणंतो ।  
 निहणिज्जंतो य चिरं ठिओ सि ओलावयाईसु ॥ २३६ ॥  
 पासेसु जलियजलणेसु कूजं (कड्ढं) तेसु य आमिसलवेसु ।  
 पडओ अन्नागंधो बद्धो खद्धो निरुद्धो य ॥ २३७ ॥  
 पडिक्कुक्कुडनहरपहारफुट्टनयणो विभिन्नसव्वंगो ।  
 निहगं गओसि बहुसोवि जीव ! परकोउयकएण ॥ २३८ ॥  
 झीणो सरिउं सपिययमाए रमियाइं साल्लिच्छेत्तेसु ।  
 खित्तो गोत्तीइ व पंजरट्ठिओ हंत कीरत्ते ॥ २३९ ॥

भमिओ सहयारवणेसु पिययमापरिगएण सच्छंदं ।  
 सरिऊण पंचरगओ बहुं विसन्नो विवन्नो य ॥ २४० ॥  
 गहिओ खरनहरत्रिडालियाए आयद्धिऊण कंठमि ।  
 चिल्लंतो विलयंतो खद्धो सि तर्हि तयं सरसु ॥ २४१ ॥  
 तत्थेव य सच्छंदं मुद्दियलयमंडवे पु हिंडंतो ।  
 जणएण पासएहिं बद्धो खद्धो य जगणीए ॥ २४२ ॥  
 इयतिरियमसंखेसुं दीवसमुद्देसुं उद्धमहलोए ।  
 विविहा तिरिया दुक्खं च बहुविहं केत्तियं भणिसो ? ॥ २४३ ॥  
 हिमपरिणयसरिसरोवरेसु सीयतुसारमुद्दियंमा ।  
 हियय फुडिऊण मया बहवे दीसंति जं तिरिया ॥ २४४ ॥  
 वासारत्ते तरुभूमिनिरिसया रन्नजलपवाहेहिं ।  
 वुञ्जंति असंखा तह मरंति सीएण विञ्जडिया ॥ २४५ ॥  
 को ताण अणाहाणं रन्ने तिरियाण वाहिविहुराणं ।  
 भुयगाइडंक्रियाण य कुणइ तिगिच्छं व मंतं वा ? ॥ २४६ ॥  
 वसणच्छेयं नासाइविधणं पुच्छकन्नकप्परणं ।  
 बंधणताडणडंभणदुहाइं तिरिएसुऽणंताइं ॥ २४७ ॥  
 मुद्धजणवंचगेणं कूडतुलकूडमाणकरणेण ।  
 अट्टवसट्टोवगमण देहघरसरणचित्ताहिं ॥ २४८ ॥  
 कूडकयकहणेणं अणंतसो नियडिनडियचित्तेहिं ।  
 सात्तथीवणिएहिं व तिरियाउं बज्जए एयं ॥ २४९ ॥  
 कालमणंतं एगिदिएसु संखेज्जयं घंतुणिएसु ।  
 काऊण केइ मगुया होंति अतो तेण ते भणिसो ॥ २५० ॥

कम्मेयरभूमिसमुब्भवाइभेएणऽणेगहा मणुया ।  
 ताणवि चित्तसु जइ अत्थि किंपि परमत्थओ सोवखं ॥ २५१ ॥  
 गब्भे बालत्तणयंमि जोव्वणे तह य वुद्धभावमि ।  
 चित्तसु ताण सरूवं निउणं चउसुवि अवत्थासु ॥ २५२ ॥  
 मोहनविनिविडवद्धो कत्तोऽविहु कड्ढिओ असुइगब्भे ।  
 चोरोव्व चारयगिहे खिप्पइ जीवो अणप्पवसो ॥ २५३ ॥  
 सुक्कं पिउणो माऊएँ सोणियं तदुभयंमि संसट्टं ।  
 तप्पढमयाएँ जीवो आहारइ तत्थ उप्पन्नो ॥ २५४ ॥  
 सत्ताहं कललं होइ, सत्ताहं होइ अब्बुयं ।  
 अब्बुया जायए पेसी, पेसीओ य घणं भवे ॥ २५५ ॥  
 होइ पलं करिसूणं पढमे मासम्मि बीयए पेसी ।  
 होइ घणा तइए उण माऊए दोहलं जणइ ॥ २५६ ॥  
 जणणीए अंगाइं पीडेइ चउत्थयम्मि मासम्मि ।  
 करचरणसिरंक्कूरा पंचमए पंच जायंति ॥ २५७ ॥  
 छट्ठंमि पित्तसोणिय सुबद्धठिइ सत्तमंमि मासम्मि ।  
 पेसिं पंचसयगुणं कुणइ सिराणं च सत्तसए ॥ २५८ ॥  
 नव चेव य धमणीओ नवनउइं लवख रोमकूवाणं ।  
 अद्धुट्ठा कोडीओ सम पुणो केसमंसूहिं ॥ २५९ ॥  
 निप्फन्नप्पाओ पुण जायइ सो अट्टमम्मि मासम्मि ।  
 ओयाहाराईहि य कुणइ सरीरं समग्गंमि ॥ २६० ॥  
 दुन्नि अहोरत्तसए संवुन्ने सत्तसत्तरी चेव ।  
 गब्भगओ वसइ जिओ अट्टमहोरत्तमन्नं च ॥ २६१ ॥

उक्कोसं नवलक्खा जीवा जायंति एगगढम्मि ।  
 उक्कोसेण नवण्हं सयाण जायइ सुओ एक्को ॥ २६२ ॥  
 गढ्भट्ठिआऽवि काऊण संगामाईणि गरुवपावाइं ।  
 वच्चंति केऽवि नरयं अन्ने उण जंति सुरलोयं ॥ २६३ ॥  
 नवलक्खाणवि मज्झे जायइ एगरस दुण्ह व समत्ती ।  
 सेसा पुण एमेय य विलयं वच्चंति तत्थेव ॥ २६४ ॥  
 सुयमाणीए माऊइ सुयइ जागरइ जायरंतीए ।  
 सुहियाइ हवइ सुहिओ दुहियाए दुक्खिओ गढ्भो ॥ २६५ ॥  
 कइयावि हु उत्ताणो कइयावि हु होइ एगपासेण ।  
 कइयावि अंबखुज्जो जणणीचेट्ठाणुसारेण ॥ २६६ ॥  
 इय चउपासोबद्धो गढ्भे संबसइ दुक्खिओ जीवो ।  
 परमतिमिसंधयारे अमेज्झकोत्थलयमज्झे व ॥ २६७ ॥  
 सूईहिं अगिगवन्नाहिं, भिज्जमाणरस जंतूणो ।  
 जारिसं जायए दुक्खं, गढ्भे अट्टगुणं तओ ॥ २६८ ॥  
 पित्तवसमंससोणियसुक्कट्ठिपुरीसमुत्तमज्झम्मि ।  
 असुइम्मि किमिन्व ठिओ सि जीव ! गढ्भम्मि निरयसमे ॥ २६९ ॥  
 इय कोइ पावकारी बारस संवच्छराइं गढ्भंमि ।  
 उक्कोसेणं चिट्ठइ असुइप्पभवे असुइम्मि ॥ २७० ॥  
 तत्तो पाएहिं सिरेण वावि सम्मं विणिग्गमो तस्स ।  
 त्तिरियं णिग्गच्छंतो विणिघायं पावए जीवो ॥ २७१ ॥  
 गढ्भदुहाइं दट्ठं जाईसरणेण नायसुरजम्भो ।  
 सिरितिलयइढ्भतणओ अभिग्गहं कुणइ गीयत्थो ॥ २७२ ॥

अहिवरसरं रसंतो जोणीजंताओ कहवि णिप्फिडइ ।  
 माऊएँ अप्पणोऽवि य वेयणमउलं जणेमाणो ॥ २७३ ॥  
 जायमाणस्स जं दुक्खं, मरमाणस्स जंतुणो ।  
 तेण दुक्खेण संतत्तो, न सरई जाइमप्पणो ॥ २७४ ॥  
 दाहिणकुच्छीबसिओ पुत्तो वामाएँ पुण ह्यइ धूया ।  
 उभयंतरम्मि बसिओ जायेइ नपुंसओ जीवो ॥ २७५ ॥  
 छुहियं पिवासियं वा वाहिग्घत्थं च अत्तयं कहिउं ।  
 बालत्तणम्मि न तरइ गमइ रूयंतोच्चिय वराओ ॥ २७६ ॥  
 खेल्खरंटियवयणो मुत्तपुरिसाणुलित्त सव्वंगो ।  
 धूलिभुरंडिय देहे कि सुहमणुह्वइ किर बालो ? ॥ २७७ ॥  
 खिवइ करं जलणम्मिवि पविखवइ मुहंमि कसिणभुयंगंपि ।  
 भुंजइ अभोज्जपेज्जं बालो अन्नाणदोसेण ॥ २७८ ॥  
 उल्लइ भमइ कुक्कुयइ कीलइ जंपइ बहुं असंबद्धं ।  
 धावइ निरत्थयंपि हु निहणंतो भूयसंघायं ॥ २७९ ॥  
 इय असमंजसचेट्टिय अन्नाणऽविवेय कुलहरं गमियं ।  
 जीवेणं बालत्तं पावसयाइं कुणतेण ॥ २८० ॥  
 बालस्सवि तिन्वाइं दुहाइँ दट्ठूण निययतणयरस ।  
 बलसार पुहइबालो निव्विन्नो भवनिवासरस ॥ २५१ ॥  
 तरुणत्तणम्मि पत्तरस धावए दविणमेलणपिवासा ।  
 सा कावि जीई न गणइ देवं धम्मं गुरुं तत्तं ॥ २५२ ॥  
 तो मेलइ कहवि अत्थे जइ तो मुज्झइ तयंपि पालंतो ।  
 बीहेइ राइत्तकर अंसहराईण निच्चंपि ॥ २५३ ॥

वड्ढंते उण अत्थे वड्ढइ इच्छावि तहवि कह दूरं ।  
 जह मम्मणवणिओ इव संतेऽवि धणे दुही होइ ॥ २८४ ॥  
 लद्धंपि धणं भोत्तुं न पावए वाहिविहुरिओ अन्नो ।  
 पत्थोसहाइनिरओत्ति केवलं नियइ नयणेहिं ॥ २८५ ॥  
 जइ पुण होइ न पुत्तो अहवा जाओऽवि होइ दुस्सीलो ।  
 तो तह झिञ्झइ अंगे जह कहिउं केवली तरइ ॥ २८६ ॥  
 अन्ने उ जुवाणा संजुत्ता रजप्पलकोमलत्तलेहिं ।  
 सोणनहसयल लक्खणल-विखयक्कुम्भुन्नय पएहिं ॥ २८७ ॥  
 सुसिलिह्ठगूढगुप्फा एणीजंघा गइंदहत्थोरू ।  
 हरिकडियला पयाह्णिणसुरसलिलावत्त नंभीया ॥ २८८ ॥  
 धरवइरवलियमज्झा उन्नयकुच्छी सिलिह्ठमीणुयरा ।  
 कणयसिलायलवच्छा पुरगोउर परिहभुयदंडा ॥ २८९ ॥  
 धरवसहुन्नयखंधा चउरंगुलकंबुगीव कलिया य ।  
 सद्दूलहणू विवीफलाहरा ससिसमकवोला ॥ २९० ॥  
 कुंददलधवलदसणा विहगाहिवचंचुसरलसमनासा ।  
 पउमदलदीहनयणा अणंगधणुकुडिल भूलेहा ॥ २९१ ॥  
 रइरमणदोलयसरिससवण अद्धिदुपडिमभालयला ।  
 भरहाहिवत्तसिरा कज्जलघणकसिणमिउकेसा ॥ २९२ ॥  
 संपुन्नससहरमुहा पाउसगेज्जंत मेहसमघोसा ।  
 सोमा ससिंव्व सूरा व सप्पहा कणयमयरुइरा ॥ २९३ ॥  
 पाणितलाइसु ससिसूरचक्रसंखाइ लक्खणोवेया ।  
 वज्जरिसह संघयणा समचउरंसा य संठाणा ॥ २९४ ॥

लायन्नरूवनिहिणो दंसण संजणियजणमणाणंदा ।  
 इय गुणनिहिणो होउं पढमेच्चिय जोव्वणारंभे ॥ २९५ ॥  
 तह विट्टुरिज्जंति खणेण कुट्टकखयपमुहभीमरोगेहिं ।  
 जह हौंति सोयणिज्जा निवविक्रमरायतणुओव्व ॥ २९६ ॥  
 अन्ने उण सव्वंगं गसिया जररक्खसीइ जायंति ।  
 रमणीण सज्जणाण य हसणिज्जा सोअणिज्जा य ॥ २९७ ॥  
 इय विहवणयपराणवि तारुणंपि हु विडंबणट्टाणं ।  
 जे उण दारिदहया अनीइमंताण ताणं तु ॥ २९८ ॥  
 परजुवइरमणपरदव्वहरणवह्वेर कलहनिरयाणं ।  
 दुअयजणाण निच्चं दुहाइं को वन्निउं तरइ ? ॥ २९९ ॥  
 नत्थि घरे मह दव्वं विलसइ लोओ पयट्टुच्छणओत्ति ।  
 डिंभाइं रुयंति तहा हद्धी किं देमि घरिणीए ? ॥ ३०० ॥  
 ढंति न मह ढोयंपि हु अत्तसमिद्धीइ गठ्विया सयणा ।  
 सेसा विट्टु धणिणो परिहवंति न हु देंति अवयासं ॥ ३०१ ॥  
 अज्ज घरे नत्थि घयं तेल्लं लोणं च इंधणं वत्थं ।  
 जाया व अज्ज तउणी कल्ले किह होहिइ कुडुम्बं ? ॥ ३०२ ॥  
 वड्ढइ घरे कुमारी बालो तणओ न विट्ठप्पइ अत्थे ।  
 रोगबहुलं कुडुम्बं ओसहमोल्लाइयं नत्थि ॥ ३०३ ॥  
 उक्कोया मह घरिणी समागया पाट्टुणा बहू अज्ज ।  
 जिन्नं घरं च हट्टं झरइ जलं गलइ सव्वंपि ॥ ३०४ ॥  
 कलहकरी मह भज्जा असंवुडो परियणो पहू विरुवो ।  
 देसो अधारणिज्जो एसो वच्चामि अन्नत्थ ॥ ३०५ ॥

जलर्हि पविसेमि महिं तरेमि धाउं धमेमि अहवावि ।  
विज्जं मंतं साहमि देवयं वावि अच्चेमि ॥ ३०६ ॥  
जीवइ अज्जवि सत्तू मओ य इट्ठो पहू य महरूट्ठो ।  
दाणिग्गहणं मग्गंति विहविणो कत्थ वच्चामि ? ॥ ३०७ ॥  
इच्चाइमहाचिंताजरगहिया निच्चमेव य दरिदा ।  
किं अणुहवंति सोक्खं ? कोसंबीनयरिविप्पोच्च ॥ ३०८ ॥  
इय विहवीण दरिदाण वावि तरूणत्तणेवि किं सोक्खं ? ।  
दुहकोडिकुलहरं चिय बुद्धत्तं नूण सव्वेसिं ॥ ३०९ ॥  
एयस्स पुण सरूवं पुंविपि हु वन्नियं समासेणं ।  
वोच्छामि पुणो किंचिवि ठाणस्स असुन्नयाहेउं ॥ ३१० ॥  
थरहरइ जंघजुयलं जिज्झइ दिट्ठी पणस्सइ सुईवि ।  
भज्जइ अंगं वाएण होइ सिंभोऽवि अइपउरो ॥ ३११ ॥  
लोकम्मि अणाएज्जो हसणिज्जो होइ सोयणिज्जो य ।  
चिट्ठइ घरम्मि कोणे पडिउं मंचंमि कासंतो ॥ ३१२ ॥  
बुद्धत्तंमि य पुत्ता भज्जा धूया वधूयणो वावि ।  
जिणदत्तसावगस्स व पराभवं कुणइ अइदुसहं ॥ ३१३ ॥  
चउसुंमि अवत्थासुं इय मणुएसुं विचिंतयंताणं ।  
नत्थि सुहं मोत्तूणं केवलमभिमाण संजणियं ॥ ३१४ ॥  
मणुयाण दस दसाओ जाओ समयम्मि पुण पसिद्धाओ ।  
अंतब्भवन्ति ताओ एयासुवि ताण पुण एवं ॥ ३१५ ॥  
बाला किड्ढा मंदा बला य पन्ना य हाइणि पवंचा ।  
पब्भारमुम्महा सायणी य दसमी य कालदसा ॥ ३१६ ॥

दसवरिस पमाणाओ पत्तेयमिमाओ तत्थ बालस्स ।  
 पढमदसा बीया उ जाणेज्जसु कीलमाणस्स ॥ ३१७ ॥  
 तइया भोगसमत्था होइ चउत्थी उ पुण बलं देहे ।  
 पंचमियाए पन्ना इंदियहाणी उ छट्ठीए ॥ ३१८ ॥  
 सत्तमियाइ दसाए कासइ निठ्ठुहइ चिक्कणं खेलं ।  
 संकुइयवलीचम्मो पुण अट्ठमीए जुओऽण्हो ॥ ३१९ ॥  
 नवमी नमइ सरीरं वसइ य देहे अक्कामओ जीवो ।  
 दसमीए सुइवियलो दीणो भिन्नस्सरो खीणो ॥ ३२० ॥  
 पणपन्नाइ परेणं महिला गब्भं न धारए उयरे ।  
 पणसत्तरीइ परओ पाएण पुमं भवेऽवीओ ॥ ३२१ ॥  
 वाससयाउयमेवं परेण जा होइ पुब्बकोडीओ ।  
 तस्सद्धे अमिलाणा सव्वाउयवीसभागो उ ॥ ३२२ ॥  
 तम्हा मणुयगईए वि सारं पेच्छामि एत्तियं चेव ।  
 जिणसासणं जिणिंदा महरिस्सिणो नाणचरणधणा ॥ ३२३ ॥  
 पडिवज्जिरुण चरणं जं च इहं केइ पाणीणो धन्ना ।  
 साहंति सिद्धिसोक्खं देवगईए व वच्चंति ॥ ३२४ ॥  
 तेगेव पगइभदो विणयपरो विगयमच्छरो सदओ ।  
 मगुयाउयं निबंधइ जह धरणीधरो सुनंदो य ॥ ३२५ ॥  
 देवगईवि य वोच्छं एत्तो भवणवइवंतरसुरेहिं ।  
 जोइसिएहिं वेमाणिएहिं जुत्तं समासेण ॥ ३२६ ॥  
 दसविहभवणवईणं भवणाणं होंति सव्वसंखाए ।  
 कोडीओ सत्तवाक्त्तरीए लक्खेहिं अहियाओ ॥ ३२७ ॥

ताइं पुण भवणाइं बाहिं वट्टांइं होति सयलाइं ।  
 अंतो चडरंसाइं उप्पलकन्नियनिभा हेट्ठा ॥ ३२८ ॥  
 सव्वरयणामयाइं अट्टालयभूसिएहिं तुंगेहिं ।  
 जंतसयसोहिएहिं पायारेहिं व गूढांइं ॥ ३२९ ॥  
 गंभीरखाइया परिगयाइं किंकरगणेहिं गुत्ताइं ।  
 दिप्पंतरयणभासुर निविट्ट गोउरकवाडाइं ॥ ३३० ॥  
 दारपडिदारतोरणचंदणकलसेहिं भूसियाइं च ।  
 रयणविणिम्मियपुत्तलियखंभसयणासणेहिं च ॥ ३३१ ॥  
 फलिहाइ रयणरासीहिं दिप्पमाणाहिं सोमकंताहिं ।  
 सव्वत्थ विइन्नदसद्वन्नवन्न कुसुमोवयाराइं ॥ ३३२ ॥  
 बहुसुरहिदव्वमीसियसुयंध गोसीसरसनिसित्ताइं ।  
 हरियंदणवहलथक्कदिन्नपंचंगुलितलाइं ॥ ३३३ ॥  
 डज्जंतदिव्वकुंदुरुक्ककिणहागरुमघमघंतगंधांइं ।  
 वरगंधवट्टिभूयाइं सयलकामत्थ कलियाइं ॥ ३३४ ॥  
 पुक्खरिणीसयसोहिय उववणउज्जाणरम्मंदेसेसु ।  
 सकलत्तागरनच्चिवरविहियकीलासहस्साइं ॥ ३३५ ॥  
 ठाणाठाणारंभियगेयञ्जुणिदिन्नसवणसोक्खाइं ।  
 वज्जंतवेणुवीणामुइंगखजणियहरिसांइं ॥ ३३६ ॥  
 हरिमुत्तालपणच्चिवरबलयविहूसियवरच्छरसयाइं ।  
 निच्चं पमुइयसुरगणसंताडियदुंदुहिखाइं ॥ ३३७ ॥  
 दसदिसिविणिग्गयामलसमहिय एरण दुरवलोयाइं ।  
 बहुपुन्नपावणिज्जाइं पुन्नजणसेवियाइं च ॥ ३३८ ॥

पत्तेयं चिय मणिरयणघडियअट्टसयपडिमकलिएणं ।  
 जिणभवणेण पवित्तीकयाइं मणनयणसुहयाइं ॥ ३३९ ॥  
 तह चेव संठियाइं संखाईयाइं रयणमइयाइं ।  
 नयराइं वंतराणं हवंति पुव्वुत्तरूवाइं ॥ ३४० ॥  
 फलिहरयणामयाइं होंति कविट्ठद्धसंठियाइं च ।  
 तिरियमसंखेज्जाइं जोइसियाणं विमाणाइं ॥ ३४१ ॥  
 तेवीसाहिय सगनउइसहरसचुलसीइसयंसहरसाइं ।  
 वेमाणियदेवाणं होंति विमाणाइं सयलाइं ॥ ३४२ ॥  
 संखेज्जवित्थराइं होंति असंखेज्जवित्थराइ च ।  
 कलियाइ रयणनिम्मिय पासायमहंतपंतीहिं ॥ ३४३ ॥  
 धयचिंधवेजयंती पडायमालालयाइ रम्माइ ।  
 पउमवरवेइयाइं नाणासंठाणकलियाइं ॥ ३४४ ॥  
 बन्नियभवणसमिद्धीओऽणंतगुणरिद्धिसमुदयजुयाहिं ।  
 सुणमाणाणवि सुहयाइं सेवमाणाण किं भणिमो ? ॥ ३४५ ॥  
 छउमत्थसंजमेणं देसचरित्तेणऽकामनिज्जरया ।  
 बालतवोकम्मेण य जीवा वच्चंति दियलोयं ॥ ३४६ ॥  
 सेयंबियानरनाहो सट्ठी य धणंजओ विसालाए ।  
 जंबूतामलिपमुहा कमेण एत्थं उदाहरणा ॥ ३४७ ॥  
 अन्नेऽवि हु खंतिपरा सीलरया दाणविणयदयकलिया ।  
 पयणुकसाया भुवणोव्व भइया जंति परलोयं ॥ ३४८ ॥  
 उप्पण्णाण य देवेषु ताण आरूभ जम्मकालाओ ।  
 उप्पत्तिकमो भन्नइ जह भणिओ जिणवरिदेहिं ॥ ३४९ ॥

उववायसभा वररयणरूइलयं जम्मठाणममराणं ।  
 तीसें मज्जे मणिपेट्टियाएँ रयणमयसयणिज्जं ॥ ३५० ॥  
 तत्थुववज्जइ देवो कोमलवरदेवदूसआरिए ।  
 अंतोमुहुत्तमज्जे संपुत्रो जायए एसो ॥ ३५१ ॥  
 अह सो उज्जोयंतो तेएण दिसाओ पवररूवधरो ।  
 सुत्तविउद्धव्व खणेण उट्ठिओ नियइ पासाइं ॥ ३५२ ॥  
 सामाणियसुरपमुहो तत्तो सव्वोऽवि परियणो तस्स ।  
 आगंतुं अभिणंदइ जयविजएण कयंजलिओ ॥ ३५३ ॥  
 इंदसमा देविड्ढी देवाणुपिएहिं पाविया एसा ।  
 अणुभुजंतु जहिच्छं समुवणयं निययपुत्तेहिं ॥ ३५४ ॥  
 अह सो विम्हियहियओ चित्तइ दाणं तवं च सीलं वा ।  
 किं पुव्वभवे विहियं मए इमा जेण सुररिद्धी ? ॥ ३५५ ॥  
 इय उवउत्तो पेच्छइ पुव्वभवं तो इमं विचित्तेइ ।  
 किं एत्थ मज्ज किच्चं पढमं ? ता परियणो भणइ ॥ ३५६ ॥  
 अट्ठसयं पडिमाणं सिद्धाययणे तहैव सगहाओ ।  
 कयअभिसेया पूएह सामि ! किच्चाणिमं पढमं ॥ ३५७ ॥  
 अह सो सयणिज्जाओ उट्ठइ परिहेइ देवदूसजुयं ।  
 मंगलतूरखेहिं पढंतसुरवंदवंदेहिं ॥ ३५८ ॥  
 हरयम्मि समागच्छइ करेइ जलमज्जणं तओ विसइ ।  
 अभिसेयसभाए अणुपयाहिणं पुव्वदारेणं ॥ ३५९ ॥  
 अह आभिओगियसुरा साहाविय तह विउन्वियं चेव ।  
 मणिमयकलसाईयं भिंगाराई य उवगरणं ॥ ३६० ॥

धेत्तूण जंति खीरोयहिम्मि तह पुक्खरोयजलहिम्मि ।  
 दोसुवि गिण्हंति जलाइं तह य वरपुडरीयाइं ॥ ३६१ ॥  
 मागहवरदामपभासतित्थतोयाइं मंट्टियं च तओ ।  
 समयक्खेत्ते भरहाइंगंगसिंधूण सरियाण ॥ ३६२ ॥  
 रत्तारत्तवइण महानइ तओऽवराणंपि ।  
 उभयतडमट्टियं तह जलाइ गिण्हंति सयलाण ॥ ३६३ ॥  
 गंतूण चुल्लहिमवंतसिहरिपमुहेसु कुलगिरिदेसु ।  
 सव्वाइं तु वरओसहिसिद्धत्थयगंधमल्लाइं ॥ ३६४ ॥  
 गिण्हंति वट्टेयट्टसेलसिहरेसु चउसु एमेव ।  
 विजएसुजाइं मागहवरदामपभासतित्थाइं ॥ ३६५ ॥  
 गिण्हंति सलीलमंट्टियमंतरनइसलिलमेव उवणेति ।  
 धक्खारगिरीसु वणम्मि भहसालम्मि तुवराइं ॥ ३६६ ॥  
 नंदणवणम्मि गोसीसचंदणं सुमणदामसोमणसे ।  
 पंडगवणम्मि गंधा तुवराइंणि य विमीसंति ॥ ३६७ ॥  
 तो गंतुं सट्ठाणं ठविउं सीहासणम्मि ते देवं ।  
 वरकुसुमदामचंदणच्चच्चियपडमप्पिहाणेहिं ॥ ३६८ ॥  
 कलसेहिं ण्हवंति सुरा केई गायंति तत्थ परितुट्ठा ।  
 वायंति दुंदुहीओ पढंति बंदिव्व पुण अन्ने ॥ ३६९ ॥  
 रयणकणयाइवरिसं अन्ने कुवंति सीहनायाइं ।  
 इय महया हरिसेणं अहिसित्तो तो समुट्ठेउं ॥ ३७० ॥  
 उध्दुय मुयंगदुंदुहिरवेण सुरयणसहस्सपरिवारो ।  
 सोऽलंकारसमाए गतु गिण्हइ अलंकार ॥ ३७१ ॥

गंतुं ववसायसभाए वायए रयणपोत्थयं तत्तो ।  
 तवणिज्जमयक्खरममर किच्चनयमगं पायडणं ॥ ३७२ ॥  
 पूओवगरणहत्थो नंदापोक्खरिणिविहियजलसोओ ।  
 सिद्धाययणे पूयइ वंदइ भत्तीए जिणबिम्बे ॥ ३७३ ॥  
 गंतूण सुहम्मसभं तत्तो अच्चइ जिणिंदसगहाओ ।  
 सीहासणे तर्हि चिय अत्थाणे विसइ इंदोव्व ॥ ३७४ ॥  
 इय सुहिणो सुरलोए कयसुकया सुरवरा समुप्पन्ना ।  
 रयणुकडमउडसिरा चूडामणिमंडियसिरग्गा ॥ ३७५ ॥  
 गंडयललिहंतमहंतकुंडला कंठनिहियवणमाला ।  
 हारविराइयवच्छ अंगयकेऊरकयसोहा ॥ ३७६ ॥  
 मणिवलयकणयकंकण विचित्तआहरणभूसियकरग्गा ।  
 मुद्दारयणंकियसयलअंगुली रयणकडिसुत्ता ॥ ३७७ ॥  
 आसत्तमल्लदामा कणयच्छवि देअदूसनेवत्था ।  
 वरसुरहिगंधकयतणु विलेवणा सुरहिनिम्माया ॥ ३७८ ॥  
 आजम्मवाहिजरदुच्छवज्जिया निरुवमाइं सोवखाइं ।  
 भुंजंति समं सुरसुंदरीहिं अचलियतारुत्ता ॥ ३७९ ॥  
 नाणासत्तीइ तुलंति मंदरं कंपयंति महिवीढं ।  
 उच्छलंति समुद्दावि कामरूवाइं कुव्वंति ॥ ३८० ॥  
 सच्छंदयारिणो काणणेसु कीलंति सह कलत्तेहिं ।  
 अणुणो गुरुणो लहुणो दिस्समदिस्सा य जायंति ॥ ३८१ ॥  
 वत्तीसपत्तबद्धाओ विविहनाडयविहीओ पेच्छंति ।  
 कालमसंखंपि गमंति पमुइया रयणभवणेसु ॥ ३८२ ॥

इयरिद्धिसंजुयाणवि अमराणं नियसमिद्धिमासज्ज ।  
 पररिद्धिं अहियं पेच्छिऊण झिज्जन्ति अंगाइं ॥ ३८३ ॥  
 उन्नयपीणपयोहरनीलुप्पलनयणचंदवयणाइं ।  
 अन्नस्स कलत्ताणि य द्दूण वियंभइ विसाओ ॥ ३८४ ॥  
 एगगुरुणो सगासे तवमणुचिन्नं मए इमेणावि ।  
 हद्धि मज्झ पमाओ फलिओ एयस्स अपमाओ ॥ ३८५ ॥  
 इय झूरिऊण बहुयं कोइ सुरो अह महिद्धियसुरस्स ।  
 भज्जं रयणाणि व अवहरिऊण मूढो पलाएइ ॥ ३८६ ॥  
 तत्तो वज्जेण सिरम्मि ताडिओ विलवमाणओ दीणो ।  
 उक्कोसेणं वियणं अणुभुंजइ जाव छम्मासं ॥ ३८७ ॥  
 ईसाएँ दुही अन्नो अन्नो वेरियणकोवसंतत्तो ।  
 अन्नो मच्छरदुहिओ नियडीए विडंबिओ अन्नो ॥ ३८८ ॥  
 अन्नो लुद्धो गिद्धो य मुच्छिओ रयणदारभवणेसु ।  
 अभिओगजणियपेसत्तणेण अहदुक्खिओ अन्नो ॥ ३८९ ॥  
 पज्जंते उण झीणम्मि आउए निव्वडंततणुकंपे ।  
 तेयम्मि हीयमाणे जायंते तह विवज्जासे ॥ ३९० ॥  
 आणं विलुंपमाणे अणायरे सयलपरियरज्जणम्मि ।  
 तं रिद्धिं पुरओ पुण दारिद्वभरं नियंताणं ॥ ३९१ ॥  
 रयणमयपुत्तियाओ व सुवन्नकंतीओ तत्थ भज्जाओ ।  
 पुरओ उण काणं कुज्जियं च असुइं च बीभत्थं ॥ ३९२ ॥  
 तत्थविय दुव्विणीयं किल्लेसलंभं पियं मुणंताणं ।  
 नत्थि मणिच्छियआहार विसयवत्थाइ सुहियाणं ॥ ३९३ ॥

पुरओ परघरदासत्तणेणऽविञ्जाय उपर भरणानं ।  
 मियाइं तत्थ रमणिज्जकप्पतरु गहणदेसेसु ॥ ३९४ ॥  
 पुरओ गब्भे य ठिइं वट्ठु दुट्ठाइ रासहीए वा ।  
 सा उप्पज्जइ अरईं सुराणं जं मुणइ सव्वन्नू ॥ ३९५ ॥  
 अज्जविय सरागाणं मोहविमूढाणं कम्मवसगाणं ।  
 अन्नाणोवहयाणं देवाणं दुहम्मि का संका ? ॥ ३९६ ॥  
 सम्महिट्ठीणवि गब्भवासपमुहं दुहं धुवं चेष ।  
 हिंइंति भवमणंतं च केइ गोसालयसरित्था ॥ ३९७ ॥  
 तम्हा देवगईए जं तित्थयराणं समवसरणाईं ।  
 कीरइ वेयाविच्चं सारं मन्नामि तं चेष ॥ ३९८ ॥  
 एत्थ य चउगइजलहिम्मि परिब्भमतेहिं सयलजीवेहिं ।  
 जायं मयं च संहिओ अणंतसो दुक्खसंघाओ ॥ ३९९ ॥  
 सो नत्थि पएसो सिद्धयणम्मि तिल सतिभागमेत्तोऽबि ।  
 जाओ न जत्थ जीवो चुलसीईंजोणिलक्खेसु ॥ ४०० ॥  
 सव्वाणि सव्वलोए अणंतखुत्तोषि जीवलक्खाइं ।  
 देहोवक्खर परिभोय भोयणत्तेण भुत्ताइं ॥ ४०१ ॥  
 मयरहरोव्व जलेहिं तहवीं हु दुप्पूरओ इमो अप्पा ।  
 विसयामिसम्मि गिद्धो भवे भवे वच्चइ न तत्ति ॥ ४०२ ॥  
 इयमुत्तं विसयसुहं दुहं च तप्पञ्चयं अणंतगुणं ।  
 इण्हिं भवदुहदलणम्मि जीव ! उज्जमसु जिणधम्मो ॥ ४०३ ॥  
 वीयट्ठाणमुवट्ठंभहेयवो चितीउं सरूवं च ।  
 को होज्ज सरीरम्मि वि सुइवाओ मुणियत्तत्ताणं ? ॥ ४०४ ॥

वीयं सुक्कं तह सोणियं च ठाणं तु जणणिगब्भस्मि ।  
 ओयं तु उवट्टंभस्स कारणं तस्सरूवं तु ॥ ४०५ ॥  
 अट्टारस पिट्टिकरंडयस्स संधीओ होंति देहस्मि ।  
 बारस पंसुलियकरंडया इहं तह छ पंसुलिए ॥ ४०६ ॥  
 होइ कडाहे सत्तंगुलाइं जीहा पलाइं पुण चउरो ।  
 अच्छीओ दो पलाइं सिरं च भणियं चउकवालं ॥ ४०७ ॥  
 अद्धुट्टपलं हिययं बत्तीसं दसण अट्टिखंडाइं ।  
 कालेज्जयं तु समए पणवीस पलाइं निर्दिट्टं ॥ ४०८ ॥  
 अंताइं दोन्नि इहइं पत्तेयं पंचपंचवामाओ ।  
 सट्टसयं संधीणं मम्माण सयं तु सत्तहियं ॥ ४०९ ॥  
 सट्टसयं तु सिराणं नाभिप्पभवाण सिरमुवगयाणं ।  
 रसहरणिनामधिज्जाण जाणऽणुग्गह विघाएसु ॥ ४१० ॥  
 सुइ चक्खुघाणजीहाणऽणुग्गहो होइ तह विघाओ य ।  
 सट्टसयं अन्नाणवि सिराणऽहोगामिणीण तहा ॥ ४११ ॥  
 पायतलमुवगयाणं जंघाबलकारिणीणमुवघाओ ।  
 उवघाए सिरि वियणं कुणंति अंधत्तण च तहा ॥ ४१२ ॥  
 अवराण गुदपविट्टाण होइ सट्टं सयं तह सिराणं ।  
 जाण बलेण पवत्तइ वाऊ मुत्तं पुरीसं च ॥ ४१३ ॥  
 भरिसाओ पंडुरोगा वेगनिरोहो य ताणमुवघाए ।  
 तिरियगमाण सिराणं सट्टसयं होइ अवराणं ॥ ४१४ ॥  
 बाहुबल कारिणीओ उवघाए कुच्छिउयरवियणाओ ।  
 कुव्वंति तहऽन्नाओ पणवीसं सिंभधरणीओ ॥ ४१५ ॥

तह पित्तधारिणीओ पणवीसं दस य सुक्क धरणीओ ।  
 इय सत्त सिरसयाइं नाभिप्पभवाइं पुरिसस्स ॥ ४१६ ॥  
 तीसूणाईं इत्थीण वीसहीणाइं होंति संढस्स ।  
 नव ण्हारूण सयाइं नव धमणीओ य देहम्मि ॥ ४१७ ॥  
 सुत्तस्स सोणियस्स य पत्तेयं आढयं वसाए उ ।  
 अद्दाढयं भणंती पत्थं मत्थुल्लय वत्थुस्स ॥ ४१८ ॥  
 असुइमल पत्थल्लकं कुलओ कुलओ य पित्तसिभाणं ।  
 सुक्कस्स अद्दकुलओ दुट्ठं हीणाहियं होज्जा ॥ ४१९ ॥  
 एक्कारस इत्थीए नव सोयाइं तु होंति पुरिसस्स ।  
 इय किं सुइत्तणं अट्ठिमंसमलरुहिर संघाए ॥ ४२० ॥  
 को कायसुणयभक्खे किमिकुलघासे य वाहिखिक्के य ।  
 देहम्मि मच्चुच्चिहुरे सुसाणठाणे य पडिबंधो ? ॥ ४२१ ॥  
 बत्थाहार विलेवण तंबोलाइणि परदव्वाणि ।  
 होंति खणेण वि असुईणि देहसम्बन्धपत्ताणि ॥ ४२२ ॥  
 असुहाणिवि जलकोदवत्थप्पमुहाणि सयलवत्थूणि ।  
 सक्कारवसेण सुहाइं होंति कत्थइ खणद्धेणं ॥ ४२३ ॥  
 इय खणपरियत्तंते वोग्गलनिवहे तमेव इह वत्थुं ।  
 मन्तामि सुहं पवरं जं जिणधम्मम्मि उवयरइ ॥ ४२४ ॥  
 तो मुत्तूण दुगुंछं उम्मायकरं कयंबविप्पव्व ।  
 देहं च बज्जवत्थं च कुणह उवयारयं धम्मे ॥ ४२५ ॥  
 चउदसरज्जू उड्ढाओ इमो वित्थरेण पुण लोगो ।  
 कत्थइ रज्जं कत्थवि य दोन्नि जा सत्त रज्जूओ ॥ ४२६ ॥

निरयावास सुरालय असंखदीवोदहीहि कलियरस ।  
 तस्स सहावं चितेज्ज धम्मज्जाणत्थमुवउत्तो ॥ ४२७ ॥  
 अहवा लोगसभावं भावेज्ज भवंतरम्मि मरिऊण ।  
 जणणीवि ह्वइ धूया धूयाविट्टु गेहिणी होइ ॥ ४२८ ॥  
 पुत्तो जणओ जणओवि नियसुओ बंधुणोऽवि होंति रिऊ ।  
 अरिणोऽवि बंधुभावं पावंति अणंतसो लोए ॥ ४२९ ॥  
 पियपुत्तस्सवि जणणी खायइ मंसाइं भवपरावत्ते ।  
 जह तस्स सुकोसलमुणिवरस्स लोयम्मि कट्टमहो ॥ ४३० ॥  
 केवलदुहनिम्मविए पडिओ संसारसायरे जीवो ।  
 जं अणुहवइ किलेसं तं आसवहेउयं सव्वं ॥ ४३१ ॥  
 रागदोसकसाया पंच पसिद्धाइं इंदियाइं च ।  
 हिंसालियाइयाणि य आसवदाराइं कम्मस्स ॥ ४३२ ॥  
 रागदोसाण धिरत्थु जाण विरसं फलं मुणंतोऽवि ।  
 पावेसु रमइ लोओ आउरवेज्जोव्व अहिएसु ॥ ४३३ ॥  
 धम्मं अत्थं कामं तिन्निवि कुद्धो जणो परिश्वयइ ।  
 आयरइ ताइं जेहि य दुहिओ इह परभवे होइ ॥ ४३४ ॥  
 पावंति जए अजसं उम्मायं अप्पणो गुणब्भंसं ।  
 उवहसणिज्जा य जणे होंति अहंकारिणो जीवा ॥ ४३५ ॥  
 जहजह वंचइ लोयं माइल्लो कूडबहुपबंचेहि ।  
 तह तह संचिणइ मलं बंधइ भवसायरं घोरं ॥ ४३६ ॥  
 लोभेण व हरियमणो हारइ कज्जं समायरइ पावं ।  
 अइलोभेण विणस्सइ मच्छोव्व जहा गलं गिलिडं ॥ ४३७ ॥

कोहम्मि सूरविप्पो मयम्मि आहरणमुज्झिय कुमारो ।  
 मायाइ वणियदुहिया लोभम्मि य लोभनंदोत्ति ॥ ४३८ ॥  
 होंति पमत्तस्स विणासगाणि पंचिदियाणि पुरिस्सरस ।  
 उरगा इव उग्गविसा गहिया मंतोसहीहिं विणा ॥ ४३९ ॥  
 सोयपमुहाण ताण य दिट्ठंता पंचिमे जहासंखं ।  
 रायसुयसेट्ठितणओ गंधमहुप्पिय महिंदा य ॥ ४४० ॥  
 हिंसालियपमुहेहि य आसवदारेहिं कम्ममासवइ ।  
 नावव्व जल्लहिमज्जे जल्लनिषहं विविहड्ढिड्ढेहिं ॥ ४४१ ॥  
 लल्लियंग-धणायर-वज्जसार-वणिओत्त-सुंदरप्पमुहा ।  
 दिट्ठंता एत्थंपि हु कमेण विबुहेहिं नायव्वा ॥ ४४२ ॥  
 जो सम्मं भूयाइं पेच्छइ भूएसु अप्पभूओ य ।  
 कम्ममलण न लिप्पइ सो संवरियासव दुवारो ॥ ४४३ ॥  
 हिंसाइ इंदियाइं कसायजोगा य भुवणवेरीणि ।  
 कम्मासवदाराइं रुंभसु जइ सिवसुहं महसि ॥ ४४४ ॥  
 निग्गहिण्हि कसाएहिं आसवा मूलओ निरुब्भंति ।  
 अहियाहारे मुक्के रोगा इव आउरजणस्स ॥ ४४५ ॥  
 रुंभंति तेऽवि तवपसमज्झाण सन्नाण चरण करणेहिं ।  
 अइबलिणोऽवि कसाया कसिणभुयंगव्व मंतेहिं ॥ ४४६ ॥  
 गुण कारयाइं धणियं धिइरज्जु निमंतियाइं तुह जीव ।  
 निययाइं इंदियाइं वल्लिनिउत्ता तुरंग व्व ॥ ४४७ ॥  
 मणवयणकायजोगा सुनियत्ता तेऽवि गुणकरा होंति ।  
 अनियत्ता उण भंजंति मत्तकरिणो व्व सीलमणं ॥ ४४८ ॥

जहजह दोसोवरमो जह जह विसएसु होइ वेरगंग ।  
तह तह विनायव्वं आसन्नं से य परमपयं ॥ ४४९ ॥  
एत्थ य विजयनरिंदो चिलायपुत्तो य तक्खणं चेव ।  
संवरियासवदारत्तणम्मि जाणेज्ज दिट्ठंता ॥ ४५० ॥  
कणगावलि रयणावलि मुत्तावलि सीह कीलियप्पमुहा ।  
होइ तवा निज्जरणं चिरसंचिय पावकम्माणं ॥ ४५१ ॥  
जह जह दढप्पइन्नो वेरग्गओ तवं कुणइ जीवो ।  
तह तह असुहं कम्मं सिज्जइ सीयं व सूरहयं ॥ ४५२ ॥  
नाणपवणेण सहिओ सीलुज्जलिओ तवोमओ अग्गी ।  
दवहुयवहोव्व संसारविडविमूलाइं निदहइ ॥ ४५३ ॥  
दासोऽहं भिच्चोऽहं पणओऽहं ताण साहुसुहडाणं ।  
तवतिक्खखग्गदंडेण सूद्धियं जेहिं मोहबलं ॥ ४५४ ॥  
मइलम्मि जीवभवणे विइन्ननिट्ठिभन्न संजम क्वाडे ।  
दाउं नाणपईवं तवेण अवणेसु कम्ममलं ॥ ४५५ ॥  
तवहुयवहम्मि ख्विऊण जेहिं कणगं व सोहिओ अप्पा ।  
ते अइमुत्तय कुरुदत्तपमुहमुणियो नमंसामि ॥ ४५६ ॥  
धन्ना कलत्तनियलाइं भंजिउं पवरसत्तसंजुत्ता ।  
वारीओ व्व गयवरा घरवासाओ विणिक्खंता ॥ ४५७ ॥  
धन्ना घरचारयबंधणाओ मुक्का चरंति निरसंगा ।  
जिणदेसियं चरित्तं सहावसुद्धेण भावेण ॥ ४५८ ॥  
धन्ना जिणवयणाइं सुणंति धन्ना कुणंति निसुयाइं ।  
धन्ना पारद्धं ववसिऊण मुणियो गया सिद्धिं ॥ ४५९ ॥

दुक्करमेएहिं कयं; जेहिं समत्थेहिं जोव्वणत्थेहिं ।  
 भगं इंदिद्यसेन्नं, धिइपायारं विलग्गेहिं ॥ ४६० ॥  
 जम्मंपि ताण थुणिमो हिमं व विप्फुरिय झाणजलणम्मि ।  
 तारुणभरे मयणो जाण सरीरम्मि निविलीणो ॥ ४६१ ॥  
 जे पत्ता लीलाए कसायमयरालयस्स परतीरं ।  
 ताण सिवरयणदीवं-गमाण भइं मुणिंदाणं ॥ ४६२ ॥  
 पणमामि ताण पयषं-कयाइं धणु-खंद-पमुहसाहूणं ।  
 मोहसुहडाहिमाणो लीलाए नियत्तिओ जेहिं ॥ ४६३ ॥  
 इय एवमाइउत्त-मगुणरयणाहरणंभूसियंगाणं ।  
 धीरपुरिसाण नमिमो तियलोनमंसणिज्जाणं ॥ ४६४ ॥  
 भवरन्नम्मि अणंते कुमग्गसयभोलिएण कहकहवि ।  
 जिणसासणसुगइपहो पुन्नेहिं मए समणुपत्तो ॥ ४६५ ॥  
 आसन्ने परमपए पावेयव्वम्मि सयलकल्लणे ।  
 जीवो जिणिंदभणियं पडिवज्जइ भावओ धम्मं ॥ ४६६ ॥  
 मणुयत्तखेत्तमाईहिं विविहहेऊहिं लब्भए सो य ।  
 समए य अइदुलंभं भणियं मणुयत्तणाईयं ॥ ४६७ ॥  
 माणुस्स खेत्त जाई कुलरूवारोग्ग आउयं बुद्धी ।  
 सवणोग्गह सद्धा संजमो य लोयम्मि दुलहाइं ॥ ४६८ ॥  
 अवरदिसाए जलहिस्स कोइ देवो खिवेज्ज किर समिलं ।  
 पुव्वदिसाए उ जुगं तो दुलहो ताण संजोगो ॥ ४६९ ॥  
 अविजलहिमहाकल्लोलपेल्लिया सा लभेज्ज जुगल्लिहुं ।  
 मणुयत्तणं तु दुलहं पुणोवि जीवाणऽउन्नाणं ॥ ४७० ॥

खेत्ताईणिवि एवं दुलहाइं वणियाइं समयम्मि ।  
 ताइंपि हु लद्धूणं पमाइयं जेण जिणधम्मो ॥ ४७१ ॥  
 सो जूरइ मच्चुजराविहओ इह पावसेन्नपडिरुद्धो ।  
 तायारमपेच्छंतो नियकम्मविडंबिओ जीवो ॥ ४७२ ॥  
 आलस्स मोहऽवन्ना थंभा कोहा पमाय किविणत्ता ।  
 भय सोगा अन्नाणा वक्खेव कुऊहल्ला रमणा ॥ ४७३ ॥  
 एएहिं कारगेहिं लद्धूण सुदुल्लहंपि मणुयत्तं ।  
 न लहइ सुइं हियकरिं संसारुत्तारणिं जीवो ॥ ४७४ ॥  
 दुल्लहो च्चिय जिणधम्मो पत्ते मणुयत्तणाइभावेऽवि ।  
 कुपहबहुयत्तणेणं विसयसुहाणं च लोभेणं ॥ ४७५ ॥  
 जस्स बहिं बहुयजणो लद्धो न तएवि जो बहुं कालं ।  
 लद्धम्मि जीव ! तम्मि वि जिणधम्मो किं पमाएसि ? ॥ ४७६ ॥  
 उवलद्धो जिणधम्मो न य अणुचिन्नो पमायदोसेण ।  
 हा जीव ! अप्पवेरिय ! सुवहुं पुरतो विसूरिहिसि ॥ ४७७ ॥  
 दुल्लहो पुणरवि धम्मो तुमं पमायाउरो सुहेसी य ।  
 दुसहं च नरयदुक्खं किह होहिसि ? तं न याणामो ॥ ४७८ ॥  
 लद्धम्मिवि जिणधम्मो जेहिं पमाओ कओ सुहेसीहिं ।  
 पत्तोवि हु पडिपुन्नो रयणनिही हारिओ तेहिं ॥ ४७९ ॥  
 जस्स य कुसुमसमो चिय सुरनररिद्धी फलं तु सिद्धिसुहं ।  
 तं चिय जिणधम्मतरं सिंचसु सुहभावसल्लिलेहिं ॥ ४८० ॥  
 जिणधम्मं कुव्वंतो जं मन्नसि दुक्करं अणुट्ठाणं ।  
 तं ओसहं व परिणामसुंदरं कुणसु सुहहेउं ॥ ४८१ ॥

इच्छंतो रिद्धीओ धम्मफलाओऽवि कुणसि पावाइं ।  
 कवलेसि कालकूडं मूढो चिरजीवियत्थीवि ॥ ४८२ ॥  
 भवभमणपरिसंतो जिणधम्मतरुम्मि वीसमिउं च ।  
 मा जीव ! तंमिवि तुमं पमायवणहुयवहं देसु ॥ ४८३ ॥  
 अणवरयभवमहापहपयट्टपहि एहिं धम्मसंबलयं ।  
 जेहिं न गहियं ते पावयंति दीणत्तणं पुरओ ॥ ४८४ ॥  
 जिणधम्मरिद्धिरहिओ रंकोच्चिय नूण चक्कवट्ठीवि ।  
 तस्सवि जेण न अन्नो सरणं नरण पडंतस्स ॥ ४८५ ॥  
 धम्मफलमणुहवंतोऽवि बुद्धि-जस-रूव-रिद्धिमाईयं ।  
 तंपि हु न कुणइ धम्मं अहह कहां सो न मूढप्पा ? ॥ ४८६ ॥  
 जेणं चिय जिणधम्मणेण गमिओ रंकोवि रज्जसंपत्तिं ।  
 तम्मिवि जस्स अवन्ना सो भन्नइ कि कुलीणोत्ति ? ॥ ४८७ ॥  
 जिणधम्मसत्थवाहो न सहाओ जाण भवमहारन्ने ।  
 किह विसयभोलियाणं निव्वुइपुरसंगमो ताणं ? ॥ ४८८ ॥  
 निययमणोरहपायवफलाइं जइ जीव ! वंछसि सुहाइं ।  
 तो तं चिय परिसिंचसु निच्चं सद्धम्मसल्लिहेहिं ॥ ४८९ ॥  
 जइ धम्मामयपाणं मुहाए पावेसि साहुमूलम्मि ।  
 ता दविणण किणेउं विसयविसं जीव ! किं पियसि ? ॥ ४९० ॥  
 अन्नन्नसुहसमागमचिंतासयदुत्थिओ सयं कीस ? ।  
 कुण धम्मं जेण सुहं सोच्चिय चित्तेइ तुह सव्वं ॥ ४९१ ॥  
 संपज्जंति सुहाइं जइ धम्मविवज्जियाणवि नराणं ।  
 तो होज्ज तिहुयणम्मिवि कस्स दुहं ? कस्स व न सोवखं ? ॥ ४९२ ॥

जह कागिणीइ हेउं कोडिं रयणाण हारए कोई ।  
 तह तुच्छविसयगिद्धा जीवा हारंति सिद्धिसुहं ॥ ४९३ ॥  
 धम्मो न कओ साउं न जेमियं नेय परिहियं सण्हं ।  
 आसाएँ विनडिएहिं हा दुलहो हारिओ जम्मो ॥ ४९४ ॥  
 नाणस्स केवलीणं धम्मायरियस्स संघसाहूणं ।  
 गिण्हंतेण अवन्नं मूढेणं नासिओ अप्पा ॥ ४९५ ॥  
 सोयंति ते वराया पच्छा समुवड्ढिठयम्मि मरणम्मि ।  
 पावपमायवसेहिं न संचिओ जेहिं जिणधम्मो ॥ ४९६ ॥  
 लद्धुंपि दुलहधम्मं सुहेसिणा इह पमाइयं जेण ।  
 सो भिन्नपोयसंजत्तिओव्व भमिही भवसमुदं ॥ ४९७ ॥  
 गहियं जेहिं चरित्तं जलं व तिसिएहिं गिम्हपहिएहिं ।  
 कयसोग्गइपत्थयणा ते मरणंते न सोयंति ॥ ४९८ ॥  
 को जाणइ पुणरुत्तं होही कइयावि धम्मसामग्गी ? ।  
 रंक व्व धणं कुणह महव्वयाण इण्हिपि पत्ताणं ॥ ४९९ ॥  
 अलमित्थ वित्थरेणं कुरु धम्मं जेण वंछियसुहाइं ।  
 पावेसि पुराहिवनंदणो व्व धूया व नरवइणो ॥ ५०० ॥  
 इय भावणाहिं सम्मं णाणी जिणवयणबद्धमइल्लव्वो ।  
 जलणोव्व पवणसहिओ समूलजालं दहइ कम्मं ॥ ५०१ ॥  
 नाणे आउत्ताणं नाणीणं नाणजोगजुत्ताणं ।  
 को निज्जरं तुलेज्जा चरणम्मि परक्कमंताणं ? ॥ ५०२ ॥  
 नाणेणं चिय नज्जइ करणिज्जं तह य वज्जणिज्जं च ।  
 नाणी जाणइ काउं कज्जमकज्जं च वज्जेउं ॥ ५०३ ॥

जसकित्तिकरं नाणं गुणसयसंपायगं जए नाणं ।  
आणावि जिणाणेसा पढमं नाणं तओ चरणं ॥ ५०४ ॥  
ते पुज्जा तियलोए सव्वत्थवि जाण निम्मलं नाणं ।  
पुज्जाणावि पुज्जयरा नाणी य चरित्तजुत्ता य ॥ ५०५ ॥  
भद्धं बहुस्सुयाणं बहुजणसंदेहपुच्छणिज्जाणं ।  
उज्जोइयभुवणाणं झीणम्मि वि केवलमयंके ॥ ५०६ ॥  
जेसिं च फुरइ नाणं ममत्तनेहाणुबंधभावेहिं ।  
वाहिज्जंति न कहमवि मणम्मि एवं विभावेता ॥ ५०७ ॥  
जरमरणसमं न भयं न दुहं नरगाइजम्मओ अन्नं ।  
तो जम्ममरणजरमूलकारणं छिंदसु ममत्तं ॥ ५०८ ॥  
जावइयं किंपि दुहं सारीरं माणसं च संसारे ।  
एत्तो अणंतखुत्तो विह्वाइममत्तदोसेण ॥ ५०९ ॥  
कुणसि ममत्तं धणसयणविहवपमुहेसुऽणंतदुःखेसु ।  
सिद्धिलेसि आयरं पुण अणंतसोक्खम्मि मोक्खम्मि ॥ ५१० ॥  
संसारो दुहहेऊ दुक्खफलो दुसहदुक्खरूवो य ।  
नेहनियलेहिं बद्धा न चयंति तहावि तं जीवा ॥ ५११ ॥  
जह न तरइ आरुहिउं पंके खुत्तो करी थलं कहवि ।  
तह नेहपंकखुत्तो जीवो नारुहइ धम्मथलं ॥ ५१२ ॥  
छिज्जं सोसं मलणं दाहं निप्पीलणं च लोयम्मि ।  
जीवा तिला य पेच्छह पावंति सिणेहसंबद्धा ॥ ५१३ ॥  
दूरुज्झियमज्जाया धम्मविरुद्धं च जणविरुद्धं च ।  
किमकज्जं तं जीवा न कुणंति सिणेहपडिबद्धा ? ॥ ५१४ ॥

थवोऽवि जाव नेहो जीवाणं ताव निव्वुई कत्तो ? ।  
 नेहक्खयम्मि पावइ पेच्छ पईवोवि निव्वाणं ॥ ५१५ ॥  
 इय धीराण ममत्तं नेहो य नियत्तए सुयाईसु ।  
 रोगाइआवईसु य इय भावंताण नवि मोहो ॥ ५१६ ॥  
 नरतिरिएसु गयाइं पलिओवमसागराइंऽणंताइं ।  
 किं पुण सुहावसाणं तुच्छमिणं माणसं दुक्खं ? ॥ ५१७ ॥  
 सकयाइं च दुहाइं सहसु उइन्नाइं निययसमयम्मि ।  
 न हु जीवोऽवि अजीवो कयपुव्वो वेयणाईहिं ॥ ५१८ ॥  
 तिव्वा रोगायंका सहिया जह चक्किणा चउत्थेणं ।  
 तह जीव ! ते तुमंपि हु सहसु सुहं लहसि जमगंतं ॥ ५१९ ॥  
 जे केइ जए ठाणा उईरणाकारणं कसायाणं ।  
 ते सयमवि वज्जंता सुहिणो धीरा चरंति म्हिं ॥ ५२० ॥  
 हियनिस्सेयसकरणं कल्लाणसुहावहं भवतरंडं ।  
 सेवंति गुरुं धन्ना इच्छंता नाणचरणाइं ॥ ५२१ ॥  
 मुहकडुयाइं अंतेसुहाइं गुभासियाइ सीसेहिं ।  
 सहियव्वाइं सयावि हु आयहियं मग्गमाणेहिं ॥ ५२२ ॥  
 इय भाविऊण विणयं कुणंति इह परभवे य सुहज्जणयं ।  
 जेण कएणऽन्नोऽवि हु भूसिज्जइ गुणगणो सयलो ॥ ५२३ ॥  
 एवं कए य पुव्वुत्तज्ञाणजल्लेण कम्मवणगहणं ।  
 दहिऊण जंति सिद्धिं अजरं अमरं अणंतसुहं ॥ ५२४ ॥  
 हेमंत-मयण-चंदण-दणुसूररिणाइवन्ननामेहिं ।  
 सिरिअभयसूरिसीसेहिं रइयं भवभावणं एयं ॥ ५२५ ॥

जो पढइ सुत्तओ सुणइ अत्थओ भावएय अणुसमयं ।  
 सो भवनिब्बेयगओ पडिबज्जइ परमपयमगं ॥ ५२६ ॥  
 न य वाहिज्जइ हरिसेहिं नेय विसमावईविसाएहिं ।  
 भावियचित्तो एयाए चिट्ठए अमयसित्तोव्व ॥ ५२७ ॥  
 उवयारो य इमीए संसारासुइकिमीण जंतूणं ।  
 जायइ न अहव सव्वणुणोऽवि को तेसु अवयासो ? ॥ ५२८ ॥  
 तो अणभिनिविट्ठाणं अत्थीणं किंपि भावियमईणं ।  
 जंतूण पगरणमिणं जायइ भवजलहिवोहित्थं ॥ ५२९ ॥  
 एगतीसाहियपंचहिं सएहिं गाहा-विचित्तरयणेहिं ।  
 सुत्तागुगया वररयणमालिथा निम्मिया एसा ॥ ५३० ॥  
 भुवणम्मि जा वियरइ जिणधम्मो ताव संव्वजीवाणं ।  
 भवभावणवररयणावलीइ कीरउ अलंकारो ॥ ५३१ ॥



## ॥ सिरि वैराग्यसययं ॥



संसारंमि असारे, नत्थि सुहं वाहि-वेअणा-पउरे, ।  
जाणंतो इह जीवो, न कुणइ जिणदेसियं धम्मं ॥ १ ॥  
अज्जं कल्लं परं परारिं, पुरिसा चिंतंति अत्थसंपत्तिं, ।  
अंजलिगयं व तोयं, गलंतमाऽऽउं न पिच्छंति ॥ २ ॥  
जं कल्ले कायव्वं, तं अज्जं चिय करेह तुरमाणा, ।  
बहुविग्घो हु मुहुत्तो, मा अवरणं पडिक्खेह ॥ ३ ॥  
ही संसार-सहावं, चरियं नेहाणुराग-रत्तावि, ।  
जे पुव्वणे दिट्ठा, ते अवरणं न दीसंति ॥ ४ ॥  
मा सुअह जग्गिअव्वे, पलाइअव्वंमि कीस वीसमेह, ।  
तिन्नि जणा अणुलग्गा, रोगो अ जरा अ मच्चू अ ॥ ५ ॥  
दिवसनिसा-घडिमालं, आउ-सलिलं जीआण धित्तूणं, ।  
चंदाइच्च-बइल्ला, काल-रहट्टं भमाडंति ॥ ६ ॥

सा नत्थि कला तं नत्थि, उसहं तं नत्थि किंपि विन्नाणं,  
 जेण धरिज्जइ काया, खज्जंती कालसप्पेणं ॥ ७ ॥  
 दीहरफणिंद-नाले, महिअर-केसर दिसा-महदल्लिल्ले, ।  
 उ पीअइ कालभमरो, जणमयरंदं पुहवि पउमे ॥ ८ ॥  
 छयामिसेण कालो, सयलजीआणं इलं गवेसंतो, ।  
 पासं कहवि न मुंचइ, ता धम्मो उज्जमं कुणह ॥ ९ ॥  
 कालंमि अणाइए, जीवाणं विविहकम्म-वसगाणं, ।  
 तं नत्थि संविहाणं, संसारे जं न संभवइ ॥ १० ॥  
 बंधवा सुहिणो सव्वे, पियमाया पुत्तभारिया, ।  
 पेअवणाउ निअत्तंति, दाऊणं सलिलंजलि ॥ ११ ॥  
 विहडंति सुआ विहडंति, बंधवा वल्लहा य विहडंति, ।  
 इक्को कहवि न विहडइ, धम्मो रे जीव ! जिणभणिओ ॥ १२ ॥  
 अडकम्म-पासबद्धो, जीवो संसार-चारए ठाइ, ।  
 अडकम्म-पासमुक्को, आया सिवमंदिरे ठाइ ॥ १३ ॥  
 विहवो सज्जणसंगो, विसयसुहाइं विल्लास ललिआइं, ।  
 नलिणीदलग्ग-धोलिर, जललव-परिचंचलं सव्वं ॥ १४ ॥  
 तं कथ बलं तं कथ, जुव्वणं अंगचंगिमा कथ, ।  
 सव्वमणिच्चं पिच्छह, दिट्ठं नट्ठं कयंतेण ॥ १५ ॥  
 घणकम्म-पासबद्धो, भवनयर-चउप्पहेसु विविहाओ, ।  
 पावइ विडंबणाओ, जीवो को इत्थ सरणं से ॥ १६ ॥  
 घोरंमि गढभवासे कलमल-जंबाल-असुइवीभच्छे, ।  
 वसिओ अणंतखुत्तो, जीवो कम्माणु भावेणं ॥ १७ ॥

चुलसीइ किर लोए, जोणीणं पमुहसयसहस्साइं, ।  
 इक्किक्किम्मि अ जीवो, अणंतखुत्तो समुप्पन्नो ॥ १८ ॥  
 माया-पिय-बंधूहिं, संसारत्थेहिं पूरिओ लोउ, ।  
 बहुजोणि-निवासीहिं, न य ते ताणं च सरणं च ॥ १९ ॥  
 जीवो वाहि-वुलुत्तो, सफरो इव निग्जले तडप्फडइ, ।  
 सयलो वि जगो पिच्छइ, को सक्को वेअणा-विगमे  
 मा जाणसि जीव तुमं, पुत्तकलत्ताइ मग्ग सुहेहेऊ, ।  
 निउणं बंधण-मेयं, संसारे संसरंताणं ॥ २१ ॥  
 जणगी जायइ जाया, जाया माया पिया य पुत्तो य, ।  
 अणवत्था संसारे, कम्मवसा सव्वजीवाणं ॥ २२ ॥  
 न सा जाइ न सा जोणी, न तं ठाणं न तं कुलं, ।  
 न जाया न मया जत्थ, सव्वे जीवा अणंतसो ॥ २३ ॥  
 तं किपि नत्थि ठाणं, लोए वालग्ग-कोडिमित्तंपि, ।  
 जत्थ न जीवा बहुसो, सुह दुक्ख-परंपरा पत्ता ॥ २४ ॥  
 सव्वाओ रिद्धीओ, पत्ता सव्वेवि सयण-संबंधा, ।  
 संसारे ता विरमसु, तत्तो जइ मुणसि अप्पाणं ॥ २५ ॥  
 एगो बंधइ कम्मं, एगो वह-बंध-मरणवसणाइं, ।  
 विसहइ भवंमि भमडइ, एगुच्चिअ कम्मवेलविओ ॥ २६ ॥  
 अन्नो न कुगइ अहियं, हियंपि अप्पा करेइ नहु अन्नो, ।  
 अप्पकयं सुहदुक्खं, भुंजसि ता कीस दीणमुहो ॥ २७ ॥  
 बहुआरंभ- थिढत्तं, वित्तं विलसंति जीव ! सयणगणा, ।  
 तज्जणिय-पावकम्मं, अणुहवसि पुणो तुमं चेव ॥ २८ ॥

अह दुक्खिआइ तह, मुक्खियाइ जह चिति आइडिमाइ, ।  
 तह थोवंपि न अप्पा, विचिंतिओ जीव ! किं भणिमो ॥ २९ ॥  
 खणभंगुरं सरीरं, जीवो अन्नो अ सासयसरुवो ।  
 कम्मवसा संबंधो, निब्बंधो इत्थ को तुज्झ ॥ ३० ॥  
 कह जायं कह चलयं, तुमंषि कह आगओ कहं गमिही, ।  
 अन्नु अंपि न याणह, जीव ! कुडुवं कओ तुज्झ ? ॥ ३१ ॥  
 खणभंगुरे सरीरे, मणुअभवे अब्भपडल-सारिच्छे, ।  
 सारं इत्तियमेत्तं, जं कीरइ सोहणो धम्मो ॥ ३२ ॥  
 जम्मदुक्खं जरादुक्खं, रोगा य मरणाणि य, ।  
 अहो दुक्खो हु संसारो, जत्थ कीसंति जंतुणो ॥ ३३ ॥  
 जाव न इंदिहणी, जाव न जररक्खसी परिप्फुरइ, ।  
 जाव न रोगविआरा, जाव न मच्चू समुल्लिअइ ॥ ३४ ॥  
 जह गेहंमि पलित्ते, कूवं खणिउं न सकए कोइ ।  
 तह संपत्ते मरणे, धम्मो कह कीरए जीव ! ॥ ३५ ॥  
 रुवमऽसासयमेयं, विज्जुलया-चंचलं जए जीअं, ।  
 संज्ञाणुराग-सरिसं, खणरमणीअं च तारुअं ॥ ३६ ॥  
 गयकन्न-चंचलाओ, लच्छीओ तिअस-चाव-सारिच्छं, ।  
 विसयसुहं जीवाणं बुज्झसु रे जीव ! मा मुज्झ ॥ ३७ ॥  
 जह संज्ञाए सउणाण, संगमो जह पहे अ पहिआणं, ।  
 सयणाणं संजोगो, तहेव खणभंगुरो जीव ! ॥ ३८ ॥  
 निसाविरामे परिभावयामि, गेहे पलित्ते किमऽहं सुयामि ।  
 इज्झंत-मऽप्पाण-मुक्खिक्खयामि, जं धम्मरहिओ दिअहा गमामि ॥ ३९ ॥

जा जा वचचइ रयणी, न सा पडिनियत्तइ, ।  
अहम्मं कुणमाणस्स अहला जंति राइओ ॥ ४० ॥  
जस्सऽत्थि मच्चुणा सक्खं जस्स व ऽत्थि पलायणं ।  
जो जाणे न मरिस्सामि सो हु कंखे सुए सिया ॥ ४१ ॥  
दंडकलिअं करिता वचचंति हु राइओ य दिवसा य ।  
आउसं संविलंता गयावि न पुणो नियत्तंति ॥ ४२ ॥  
जहेह सीहो व मियं गहाय मच्चू नरं णेइ हु अंतकाले ।  
नतस्स माया व पिया व भाया कालंमि तंमि सहरा भवंति ॥ ४३ ॥  
जीअं जलविंदुसमं संपत्तीओ तरंगलोलाओ ।  
सुमिणय-समं च पिमं जं जाणसु तं करिज्जासु ॥ ४४ ॥  
संझराग-जलवुच्चुओवमे जीविए य जलविंदु-चंचले ।  
जुव्वण य नइ वेग-संनिभे पावजीव ! किमियं न बुज्झसे ॥ ४५ ॥  
अन्नत्थ सुआ अन्नत्थ गेहिणी परिअणोऽवि अन्नत्थ ।  
भूअबलिव्व कुडुवं पक्खित्तं हयकयंतेण ॥ ४६ ॥  
जीवेण भवे भवे मिलियाइ देहाइ जाइ संसारे ।  
ताणं न सागरेहिं कीरइ संखा अणंतेहिं ॥ ४७ ॥  
नयणोदयंपि तासिं सागरसलिलाओ बहुयरं होइ ।  
गालियं रुअमाणीणं माउणं अन्नमन्नाणं ॥ ४८ ॥  
जं नरए नेरइया दुहाइ पावंति घोर-णंताइ ।  
तत्तो अणंतगुणियं निगोअमज्जे दुहं होइ ॥ ४९ ॥  
तंमिवि निगोअमज्जे वसिओ जीव ! विविहकम्मवंसा ।  
विसहंतो तिक्खदुहं अणंत पुग्गलपरावत्ते ॥ ५० ॥

निहरीअ कहवि तत्तो पत्तो मणुअत्तणंपि रे जीव ! ।  
 तत्थवि जिणवर-धम्मो पत्तो चिंतामणि-सरिच्छो ॥ ५१ ॥  
 पत्तेवि तंमि रे जीव कुणसि पमायं तुमं तयं चेव ।  
 जेणं भवंधकूवे पुणोवि पडिओ दुहं लहसि ॥ ५२ ॥  
 उवलद्धो जिणधम्मो न य अणुचिण्णो पमाय-दोसेणं ।  
 हा जीव ! अप्पवेरि अ सुबहुं परओ विसूरिहिसि ॥ ५३ ॥  
 सोअंति ते वराया, पच्छा समुवट्ठियंमि मरणंमि, ।  
 पावपमाय-वसेणं, न संचिओ जेहिं जिणधम्मो ॥ ५४ ॥  
 धी धी धी संसारं. देवो मरिऊण जं त्तिरी होइ ।  
 मरिऊण रायराया-परिपच्चइ निरय-जालाहिं ॥ ५५ ॥  
 जाइ अणाहो जीवो, दुमस्स पुप्फं व कम्मवाय-हओ ।  
 धणधन्नाहरणाइं. घर-सयण-कुडुंब मिल्लेवि ॥ ५६ ॥  
 वसियं गिरीसु वसियं दरीसु षसियं समुहमज्झंमि ।  
 रुक्खग्गेसु य वसियं संसारे संसरंतेणं ॥ ५७ ॥  
 देवो नेरइउत्ति य कीड पयंगुत्ति भाणुसो एसो ।  
 रुवस्सी य विरूवो. सुहभागी दुक्खभागी य ॥ ५८ ॥  
 राउत्ति य दमगुत्ति य एस सवागुत्ति एस बेयविऊ ।  
 सामी दासो पुज्जो खलोत्ति अधणो धणवइत्ति ॥ ५९ ॥  
 नवि इत्थ कोइ निअमो, सकम्म-विणिचिट्ठ-सरिस-कयचिट्ठो ।  
 अन्नुन्नरुववेसो नडुव्व परिअत्तवे जीवो ॥ ६० ॥  
 नरएसु वेअणाओ अणोषमाओ असायबहुलाओ ।  
 रजीव तए पत्ता अणंतखुत्तो बहुविहाओ ॥ ६१ ॥

दवत्ते मणुअत्ते पराभिओगत्तणं उवगएणं ।  
 भीसेणदुहं बहुविहं अणंतखुत्तो समणुभूअं ॥६२॥  
 तिरियगइं अणुपत्तो भीम-महावेअणा अणेगविहा ।  
 जम्मण-मरणरहट्टे अणंतखुत्तो परब्भमिओ ॥६३॥  
 जावंत केवि दुक्खा सारीरा माणसा व संसारे ।  
 पत्तो अणंतखुत्तो जीवो संसारकंतारे ॥६४॥  
 तण्हा अणंतखुत्तो संसारे तारिसी तुमं आसी ।  
 जं पसमेउं सव्वोदहीणमुदेयं न तीरिज्जा ॥६५॥  
 आसी अणंतखुत्तो संसारे ते छुहावि तारिसिया ।  
 जं पसमेउं सव्वो पुग्गकासाओवि न तरिज्जा ॥६६॥  
 काऊणमणेगाइं जम्मण-मरण परिअट्टण सयाइं ।  
 दुक्खेण माणुसत्तं जइ लेहइ जहिच्छियं जीवो ॥६७॥  
 तं तह दुल्लहलंभं विज्जुलयाचंचलं च मणुअत्तं ।  
 धम्मम्मि जो विसीयइ सो काउरिसो न सप्पुरिसो ॥६८॥  
 माणुस्सजम्मं तडिलद्वयम्मि जिणिंदधम्मो न कओ य जेणं ।  
 तुट्टे गुणे जह धाणुक्कएणं हत्था मलेव्वा य अवस्स तेणं ॥६९॥  
 रे जीव ! निसुणि चंचलसहाव-मिल्लेविणु सयलवि बज्झभाव ।  
 नवभेयपरिग्गह विविहजाल संसारि अत्थि सहु इंदयाल ॥ ७० ॥  
 पिय-पुत्त-मित्त-घर-घरणि-जाय इहलोइअ सव्वनियसुहसहाय ।  
 न वि अत्थि कोइ तुह सरणि सुक्ख इक्कल्लु सहसि तिरि-निरयदुक्खं ७१  
 कुसग्गो जह ओसविंदुए थोवं चिट्ठइ लंभमाणए ।  
 एवं मणुआण जीवियं समयं गोयस ! मा पमायए ॥७२॥

संबुञ्जह किं न बुञ्जह संबोही खलु पेच्च दुल्लहा ।  
 नो हु उवणमंति राइओ नो सुलहं पुणरवि जीवियं ॥ ७३ ॥  
 डहरा बुड्ढा य पासह गब्भथावि चयंति माणवा ।  
 सेणे जह वट्टयं हरे एवमाउक्खयम्मि तुट्टइ ॥ ७४ ॥  
 तिहुअणजगं मरंतं दट्टूण नयंति जे न अप्पाणं ।  
 विरमंति न पावाओ धी धी धीट्टत्तणं ताणं ॥ ७५ ॥  
 मा मा जंपह बहुयं जे बद्धा चिक्कणहिं कम्महिं ।  
 संव्वेसिं तेसिं जायइ हिओवएसो महादोसो ॥ ७६ ॥  
 कुणसि ममत्तं धणसयण विहवपमुहेसु अणंतदुक्खेसु ।  
 सिट्ठिलेसि आयरं पुण अणंतसुक्खम्मि मुक्खम्मि ॥ ७७ ॥  
 संसारो दुहहेऊ दुक्खफलो दुसहदुक्खरूवो य ।  
 न चयंति तंपि जीवा अइबद्धा नेहनिअलेहिं ॥ ७८ ॥  
 नियकम्मपवणचलिओ जीवो संसार काणणे घोरे ।  
 का का विडंबणाओ न पावए दुसहदुक्खाओ ॥ ७९ ॥  
 सिसिरम्मि सीयलानिल-लहरिसहस्सेहि भिन्नघणदेहो ।  
 तिरियत्तणम्मि रण्णे अणंतसो निहणमणुपत्तो ॥ ८० ॥  
 गिम्हायवसंतत्तो रणे छुहिओ पिवासिओ बहुसो ।  
 संपत्तो तिरियभवे मरणदुहं ब्रहु विसूरंतो ॥ ८१ ॥  
 वासासु रण्णमज्जे गिरिनिज्जरणोदगेहि बज्जंतो ।  
 सीयानिल उज्जविओ मओसि तिरियत्तणे बहुसो ॥ ८२ ॥  
 एवं तिरियभवेसु कीसंतो दुक्खसयसहस्सेहिं ।  
 वसिओ अणंतखुत्तो जीवो भीसणभवारण्णे ॥ ८३ ॥



सिखिरगसययं (९)

जह चितामणिरयणं सुलहं नहु होइ तुच्छ विहवाणं ।  
गुण विहववज्जियाणं जीयाण तह धम्मरयणंपि ॥९५॥  
जह दिट्ठी संजोगो नहोइ जच्चंधयाण जीवाणं ।  
तह जिणमय-संजोगो नहोइ मिच्छंध जीवाणं ॥९६॥  
पच्चक्खमणंतगुणे जिणिदधम्मे न दोसलेसोवि ।  
तहविहु अन्नाणंधा न रमंति कयावि तंमि जीवा ॥९७॥  
मिच्छे अणंतदोसा पयडा दीसंति नविय गुणलेसो ।  
तहविय तं चैव जीवा ही मोहंधा निसेवंति ॥९८॥  
धीधी ताण नराणं विन्नाणे तह गुणसु कुसलत्तं ।  
सुह सच्चधम्मरयणे सुपरिक्खं जे न जाणंति ॥९९॥  
जिणधम्मोयं जीवाणं अपुच्चो कप्पपायवो ।  
सग्गापवग्गसुक्खाण फलाणं दायगो इमो ॥१००॥  
धम्मोबधूं सुमित्तोय धम्मोय परमो गुरू ।  
मुक्ख मग्ग पवट्टाणं धम्मो परमं दंसणो ॥१०१॥  
चउगइ-णंतदुहानल-पलित्तभवकाणणे महाभीमे ।  
सेवसु रे जीव तुमं जिणवयणं अभियकुंड समं ॥१०२॥  
विसमे भवमरूदेसे अणंतदुह गिम्हताव संतत्ते ।  
जिणधम्म कप्परूक्खं सरसु तुमं जीव सिवसुहदं ॥१०३॥  
किं बहुणा जिणधम्मे जइयव्वं जह भवोदहिं घोरं ।  
लहु तरियमणंत सुहं लहइ जीवो सासयं ठाणं ॥१०४॥

॥ इइ वेरग्गसययं ॥

# सिरिअभयदेवसूरिइओ महावीरत्थवो ।

जइज्जा समणे भयवं महावीरे जिणुत्तमे ।  
लोगनाहे सयंबुद्धे लोगंतिअविबोहिए ॥१॥  
वच्छरं दिन्नदाणोहसंपूरिअजणासए ।  
नाणत्तयसमाउत्ते पुत्ते सिद्धत्थरायणो ॥२॥  
चिच्चा रज्जं च रट्टं च पुरं अंतेउरं तथा ।  
निक्खमित्ता अगाराओ पव्वइए अणगारियं ॥३॥  
परोसहाणां नो भीए भेरवाणं खमाखमे ।  
पंचहा समिए गुत्ते वंभयारी अक्किचणे ॥४॥  
निम्ममे निरहंकारे अकोहे मायवज्जिए ।  
अमाए लोभविमुक्के पसंते छिन्नबंधणे ॥५॥  
पुक्खरं व अलेवे य संखो इव निरंजणे ।  
जीवे व्व अप्पडिग्घाए गयणं व निरासए ॥६॥  
वाउ इव अप्पडिबद्धे कुम्मे व्व गुत्तइंदिए ।  
विप्पमुक्के विहंगं व्व खग्गिसिगं व्व एगए ॥७॥  
भारंडेव्व अप्पमत्तेय वसहेव्व जायथामए ।  
कुंजरोव्व सोंडीरे सीहोव्व दुद्धरिस्सए ॥८॥

सागरो इव गंभीरे चंदोव्व सोमलेस्सए ।  
 स्रव्व दित्तेअल्ले हेमुव्व जायरूव्वए ॥१॥  
 सव्वंसहे धरित्तिव्व सायरंबुव्व सच्छए ।  
 सुट्टहुअहुआसव्व जलमाणेय तेजसा ॥१०॥  
 वासी चंदणकप्पे य समाणे लिट्टुकंचणे ।  
 समे पूयावमाणेसु समे मुखे भवे तहा ॥१२॥  
 नाणेण दंसणेणं च चरित्तेणमणुत्तरे ।  
 आलएणं विहारेणं मद्दवेणज्जवेण य ॥१२॥  
 लाघवेणं च खंतीए गुत्तोमुत्ती अणुत्तरे ।  
 संवरेणं तवेणं च संजमेणं अणुत्तरे ॥१३॥  
 अणेगगुणसमाइन्ने धम्म—सुक्काण ज्ञायए ।  
 घाइक्खणेणं संजाए अणंतवरकेव्वली ॥१४॥  
 वीयराए निग्गथे सव्वन्नू सव्वदंसणे ।  
 देविद—दाणविदेहि निव्वत्तिअमहामहे ॥१५॥  
 सव्व भासाणुगयाए भासाए सव्वसंसए ।  
 जुगवं सव्वजीवाणं छिन्नियं भिन्नगोचरे ॥१६॥  
 हिए सुहे य निस्सेयकारए सव्वपाणिणं ।  
 महव्वयाणि पंचेव पन्नवित्ता सभायणे ॥१७॥  
 संसार सायरं बुड्ढं जंतु संताणतारए ।  
 जाणुव्व देसियं तित्थं संपत्ते पंचमं गयं ॥१८॥  
 से सिवे अयले निच्चे अरुवे अजरामरे ।

कम्मप्पवंचविमुक्के जए वीरे जए जिणे ॥१९॥  
 से जिणे वद्धमाणेय महावीरे महायसे ।  
 असंखदुक्खखिन्नाणं अम्हाण देउ निव्वुइं ॥२०॥  
 इय परमपमोया संथुओ वीरनाहो

परमपसमदाणा देउ तुल्लत्तणं मे ।

असमदुह—सुहेसु सग्गसिद्धि—भवेसु

कणय—कचवरेसुं सत्तु—मितेसु वाचि ॥२१॥

पयडिअ वसइपहाणं सीसेण जिणेसराण सुगुरूणं ।

वीरजिणत्थयमेयं पढह कयं अभयसूरीहिं ॥२२॥

इइ सिरिअभयदेवसूरिइयं महावीरत्थवं सम्मत्तं ॥

समत्तं च श्रुतरत्नरत्नाकरस्य पढमो भागो ॥

जेसिं मणे ठिओ भयवं मंगलमइओ जिणो ।  
 सव्वया सव्व कज्जेसु ताणं हवेज्ज मंगलां ॥

